

**NATIONAL ASSEMBLY OF  
SEYCHELLES**

*Wednesday 02<sup>nd</sup> October 2024*

*The Assembly met at 0902am*

*National Anthem*

*Moment of Reflection*

*Mr Speaker in the Chair*

**MR SPEAKER**

Bonzour tou Manm Onorab. Bonzour nou bann zofisye Lasanble. Bonzour nou piblik, byenveni pou nou travay ozordi.

Nou a komanse. Avan nou al lo size ki nou ti'n komans avek yer. Bann *Leaders* Lasanble in apros mwan pou demann mwan laparol pou adres en mo lo *Teachers' Week*. Nou a fer sa. E vi ki se *LGB* ki'n apros mwan *on behalf of the 2 Leaders* mon a donn li laparol premye. Onorab Georges.

**HON BERNARD GEORGES**

Mersi Mr Speaker. Bonzour Mr Speaker. Bonzour tou bann koleg Onorab e tou dimoun ki pe swiv nou. Mr Speaker, avek ou permisyon mon a demann en *teacher* dan nou *Caucus* Onorab Samynadin pou adres sa size dan mon plas. Mersi.

**MR SPEAKER**

Mersi. Onorab Samynadin ou annan laparol.

**HON KELLY SAMYNADIN**

Mersi Mr Speaker. Bonzour Mr Speaker; tou *staff* Lasanble, tou mon bann koleg Onorab e tou dimoun a lekout.

Premyerman, mon ti a kontan remersye tou mon bann koleg enkli *staff* Lasanble Nasyonal pou tou zot sipor e zot lankourazman, pou swivan lanmor ki'n arive dan mon fanmir. Mon dir zot en gran mersi lo lapar mon fanmir.

Vi ki *Teachers' Day* i ganny selebre tou le 5 Oktob tou le-z-an, mon pe profite ozordi lo lapar mon *Caucus* pou mwan swet tou ansennyan dan Sesel en bonn fet.

Mon felisit zot pou swazir sa karyer, sa vokasyon, i en vokasyon ki tre nob - annan posibilite pou travay avek bann zenn malgre ki i pa fasil. Me selman i en louvraz i en vokasyon ki anmenn bokou rannman pou vwar bann etidyan *succeed*, vwar zot ariv lwen dan lavi i enn ki anmenn bokou lankourazman.

So mon pe profite pou mon swet zot tou en bonn fet, anmiz zot lekor byen aköz zot vremen *deserve it*. So en bonnfet ansennyan pou tou ansennyan dan Sesel. Mersi.

**(APPLAUSE)**

**MR SPEAKER**

Mersi Onorab. Onorab Pillay, ou annan laparol.

**HON SEBASTIEN PILLAY**

Mersi Mr Speaker. Mr Speaker, en mesaz alokasyon *Teachers' Week* i devret vin en mesaz natirel pou Lasanble Nasyonal i en keksoz ki mon ti pou fer menm si mon pa ti'n demann ou permisyon.

Akoz mon ti pou fer li par lefe ki mwan personnelman mon en ansennyan pandan plizyer lannen. Mon sorti dan en fanmir kot i annan plizyer ansennyan e mon menm annan mon bann ansyen etidyan ki dan sa Lasanble ozordi, notaman Onorab Samynadin, notaman Onorab Richard Labrosse.

Mr Speaker, lansennyman i enn bann vokasyon pli nob ki mon konnen e ki i demann bokou e ki bann *teachers* e tou bann dimoun ki ankadre bann zanfan pandan zot letan skoler i dedye bokou zot letan e zot donn bokou pou zot kapab kontribye dan en fason pozitiv dan devlopman nou pei.

Mon reste konvenki ki koman en ansennyan, nou tou koman ansennyan ki'n deza travay koman ansennyan, nou'n fer en bout pou ede pou fer nou pei ariv kot in arive. Mon note Mr Speaker, ki ou

menm ou, dayer ou en ansyen ansennyan e ki ou a konpran sa ki mon pe dir.

Ozordi bomaten Mr Speaker, lanfaz ki mon oule met lo la se rekonnèt lansennyman e asire ki koman en sosyete, nou rekonnèt sa ban dimoun ki donn bokou zot letan e ki pandan plizyer lannen zot reste dan sa menm karyer e zot ede form plizyer etidyan, plizyer zanfan ki vin bann adilt ki kontribye pozitivman pou nou pei.

Mon osi oule demann bann lotorite konsernen enkli nou menm Lasanble Nasyonal, pou fer tou pou rod fason pou fer ki lavi bann ansennyan i toultan vin pli fasil e ki zot ganny rekonnèt pou sa travay ki zot fer.

Mon swete Mr Speaker, ki bann ansennyan i ava pas en tre bon *Teachers' Week* e ki i ava en moman kot zot ava kapab fer refleksyon osi en moman kot zot a kapab zwenn kanmarad pou fer bann lesanz e i ava en letan pou zot si oule *blow off* en pti pe *steam* an aprosan en moman pivotal dan lavi lekòl - lavi skoler e sa se bann legzanmen nasyonal e bann legzanmen enternasyonal ki bann zanfan pou al fer.

Mon oule swet tou ansennyan en bonn fet, mon oule swet zot bon kouraz e mon oule swete ki zot a kapab

kontinyen dan sa louvraz nob ki zot fer avek devosyon, determinasyon e avek konviksyon. Mersi Mr Speaker.

### **MR SPEAKER**

Mersi Onorab. Bon, i en plezir piu mon siport bann lekspresyon ki'n ganny mete lo size ansennyen lo sa lokazyon *Teachers' Week*, mon osi wi koman en ansenyan mon konpran rol sa profesyon e sa ki i kapab kontribye.

Ozordi i lazournen petet kot nou anmenn nou respe e nou apresyasyon pou bann ansennyen ki nou menm nou, nou'n konnen e ki'n kontribye dan nou ledikasyon e dan nou lavi.

Mon krwar sa ki pli enportan dan sa rol ansennyen, se sa kontak ki en adilt i annan ek en manrmay dan son bann lannen formasyon e sa kekfwa par ler i reste i kit en souvenir inoubliyab.

Mon pou zis kit avek zot en pti souvenir. Enn bann ansenyan ki mon rapel e ki mon rapel tou mon lavi se nonmen Sir Finley Roselie. Bokou zot in konn li aköz i ti annan en karyer politik apre en karyer piblik, be mwan mon ti konn li koman en ansennyen dan leköl Grand Ane Mahe ler mon ti ankor en pti garson.

E *Sir Roselie* in reste touzour dan mon lespri aköz mon krwar i ti reste Anse Royale oubyen Anse Boileau e i ti mont lo son bisiklet pou al fer leköl Grand Anse. E tanzantan i ti donn mon pasaz lo bar son bisiklet.

So sa i en keksoz ki ou pa oubliye. E apre mon rapel li aköz i ti premye dimoun ki ti monte nou zwe futbol avek souflet ; premye dimoun ki ti met 2 group manrmay lo laplenn e diriz zot e soufle pou diriz en *game* futbol. So sa i kalite keksoz ki reste dan nou lespri.

Donk, koman en senbol tou ansennyen mon remersye bann ansennyen ki'n pran par dan mon lavi. E mon set tou ansennyen ki pe travay an se moman en bon kouraz dan zot travay e en bon lazournen *Teachers' Week* en bon semenn *Teachers' Week*. Mersi, mersi pou sa.

Bon, nou a kontinyen avek nou biznes lo *Order Paper* e mon a demann madanm Raporter pou apel Vis-Prezidan e son delegasyon.

Bon bonzour e byenveni vis-Prezidan Ahmed Afif e egalman Mr Frank Ally *Attorney General*, Mrs Julia Jean, *Legal Draftsperson* Mr Adam Afif e Asistan *Legal Draftsperson*. Mersi pou zwenn nou pou kontinyen travay lo sa *Bill*. Nou a rebran

deba kot nou ti'n arive yer. Mon rapel bann Manm ki nou annan en kantite Manm ki pou pran laparol.

So annou obzerv limit letan e silvouple vey *timing* zot letan zot menm pou anpes mwan bezwen enteronp zot e annou fer li-fer zot diskour fini atan. Premye Manm ki annan laparol se Onorab Gervais Henrie.

### **HON GERVAIS HENRIE**

Mersi Mr Speaker. Bonzour tou dimoun ki pe swiv nou bomaten sirtou bann dimoun ki travay dan sekter ledikasyon dan distrik Mont Buxton.

Bonn fet pou zot lasemenn, mon apresye sa ki zot fer e i enn bann rezon aköz Zilyet sa lannen ou ti organiz en *forum* pour tou bann profesyonnel ledikasyon e kot nou ti envit Minis Ledikasyon pou partisipe avek son *Senior Management* e sa i en keksoz ki mon pou kontinyen fer si zot konfyè mon avek sa responsabilite an 2025.

Mr Speaker, savedir la mon annan mon ziska 09 er 26 pou mwan koze, donk mon ava dey reste dan sa letan.

Dabor mon ava dir sa ki devan nou ozordi depi avan in ganny elekte an Oktob 2020 Ladministrasyon LDS ti'n fer son lentansyon kler. E dan nou *manifesto* lo paz 8 ti

annan size reform konstitisyonnèl partikilyerman pou fikse dat eleksyon.

Nou *fast forward* le 16 Me 2024, *Cabinet* i aprouv 11enm Lamannman Konstitisyonnèl e ki ganny raporte lo SBC.

Le 9 Out 2024 *Cabinet* pou en dezyenm fwa i aprouv sa lamannman ankor aköz baze lo bann lamannman ankor aköz baze lo bann pri sanzman ki'n annan. E ankor i ganny raporte lo SBC.

Le 19 Out sa *Bill* i ganny gazete lo sit *web gazette.sc* setadir 6 semenn pase.

Le 2 Septanm *Attorney Zeneral* i zwenn avek tou parti politik dan en *forum* organize par Komisyon Elektoral pou diskrit bann size eleksyon e sa size konstitisyonnèl spesifikman *Attorney Zeneral* ti vin fer avek bann parti politik.

Parey mon'n ilistre, sa konversasyon an piblik depi 2020. Mr Speaker, lamannman ki pe ganny propoze se kwa? I pe amenn en sanzman signifikan dan eleksyon prezidansyel e Lasanble Nasyonal.

Premyerman, Lalwa pe fer provizyon ki term prezidansyel i komans zour ki Prezidan i pret serman pou asire ki Prezidan i ganny en *full* term 5 an ouswa 60 mwan

e permet annan en tranzisyon pou vin o pouvwar ki annord.

I pe osi propoze ki eleksyon prezidansyel i fer ansanm ek eleksyon Lasanble Nasyonal, pou rezon finansman e senplifye prosedir eleksyon kot dimoun i ale i ganny li 2 papye vote, me provizyon an ka i bezwen annan eleksyon ki pa'n prevwar i reste.

Lot propozisyon ki sa Prozedlwa pe fer, i adres disolisyon Lasanble Nasyonal, deklarasyon dat eleksyon e prosedir ranplas en Prezidan. I retir Lartik 52A ki ti donn loportinite Prezidan *call* sa ki nou apel dan term politik en *snap election* parey pou eleksyon prezidansyel ti leka an 2001 e apre an 2015.

I amann Lartik 59 konsernen prosedir legal kont bann ansyen Prezidan e retir iminite kont zot e i sanz sit Minis Dezinyen pou vin Minis prensipal. Vwala ki sa bann lamannman pe fer.

Mon demann mon lekor e mon dir ou dan lakour ki pe ekout nou demann ou lekor kwa ki mal avek sa bann propozisyon? Pou mwan i senpleman pe moderniz i pe fer nou Konstitisyon vin relevan e i pe fer nou bann striktir demokratik pli for.

E i enportan sa pou nou Konstitisyon. Ou konnen nou lo lavey selebre senkantyenm

lanniverser nou lendepandans koman en pei souvren e alor kwa ki mal dan kontinyasyon revizyon nou Konstitisyon, sirtou aköz i Lalwa siprenm nou pei e nou fek selebre trantyenm lanniverser depi ki sa konstitisyon ti ganny adopte. Alor sa bann revizyon i neser.

Me depi yer nou'n antann ki *LDS* pe fer sa, pe entrodwir sa bann reform pou vol eleksyon, pou manipil Lepep Seselwa, pou konfiz dimoun. Mr Speaker, zanmen, zanmen *LDS* in bezwen defann son manda *State House*. I pou premye fwa ki i fer sa an Septanm 2025.

Depi retour miltiparti an 1993 *SPPF*, Parti Lepep e *United Seychelles* in fer li 6 fwa and 1993 a 2020.

Alor lekel ki konnen mannyer pou vol eleksyon? Lekel ki konnen mannyer pou manipil sistenm e manipil Konstitisyon dan zot lavantaz? E si mon donn legzanp pou ou ki pe ekout mwan, dezyenm *round* eleksyon prezidansyel 2015 i en ka klasik pou bann reserser etidye e donn en verdik lo sa sityasyon.

Mr Speaker, i en lensilt, en afron pou bann profesyonnel Seselwa byen edike, kalifye e eksperyanse ki annan etik *à mon avis* e obzektivite, pou annan lodas fer alizyon ki zot pe konplote

avek bann politisyen pou fer oubliye ki pe pase dan pei.

Sa bann lamannman Mr Speaker, in ganny anmenn pou plizyer rezon. E alor mwan mon oule konsantre mon prezantasyon pou kontinyen lo 3 pwen spesifik pou eklersi bann pwen ki Lopozisyon in leve, pou zisteman retir bann manipilasyon e konfizyon ki zot pe sey senm parmi piblik Seselwa.

Premyerman zot in dir poudir Prezidan Ramkalawan e ladministrasyon LDS i oule agrandi manda ki zot in gannyen anba Konstitisyon. Sa i fo. Akoz manda Prezidan ki fer provizyon par Lartik 52(1)(a) pa pe ganny touse i reste parey setadir 5 an ouswa 60 mwan.

E mon pou donn en pti leksplikasyon la akoz bomaten premye keksoz koman mon'n kit se mwan i annan en dimoun ki vin koz ek mwan lo la, akoz i krwar sa ki US pe dir poudir Prezidan Ramkalawan e Ladministrasyon LDS i oule *extend* plis, reste o pouvwar plis ki 5 an kontrerman avek Konstitisyon.

Prezidan Larepublik ti pret serman le 26 Oktob 2020. Aprezan si nou pou kont 60 mwan ouswa 65 an, 60, 50 an pardon, 50 an, 5 an, 60 mwan ouswa 5 an depi le 26 Oktob 2020 annavans i tonm le 25 Oktob 2025.

Aprezan, e sa i annakor avek Lartik 52(1)(a), prezan sa ki pe ganny entrodwir en formil pou kalkil dat eleksyon- i pa en dat, me i en formil baze lo semenn savedir nou bezwen retourn 5 semenn an aryer i tonm le 27 Septanm 2025. Le 27 Septanm 2025 ziska le 25 Oktob 2025 i annan 5 semenn konte zot pou vwar.

E prezan si eleksyon i fer le 27 Oktob- le 27 Septanm 2025 pran kont ladan 14 zour an ka i annan en dezyenm *round* eleksyon i dwatet fer ant le 10 a le 11 Oktob. Rezilta a ganny deklare le 12 Oktob i *still* tonm pandan sa 5 semenn pandan sa 5 semenn ki Prezidan i ankor annan manda pou dirize.

E apre i ava annakor 14 zour ant le 12 Oktob ziska le 25 Oktob, 14 zour tranzisyon pou permet si par maler i pou annan sanzman prezidansyel ki mon pa swete e mon priye e alor keksoz i annord. En tranzisyon i enportan Mr Speaker.

Menm nou letan nou vin isi dan Lasanble Nasyonal bann nouvo Manm, pa i dir nou Lopozisyon i asiz sa kote, Gouvernman i asiz sa kote, vwala kot Speaker i antre personn pa antre. Clerk i asiz la- nou fer - sa tranzisyon i enportan e *State House* osi i parey.

Pou en nouvo dimoun ki vini ou bezwen eksplik li bann keksoz sekirite ki mannyer i marse, lekel bann *staff* ki ansarz lekel bann tel seksyon. E i ti le ka osi an 2020.

E kekfwa zot pa'n ganny enformen menm apre ki Prezidan Ramkalawan in pret serman, Prezidan Faure in reste *State House* pou omwen 1 semenn kot in annan bann konversasyon ant li avek Prezidan Ramkalawan, lo bann striktir e bann keksoz pei.

E alor nou dir mersi sa 2 dirizan pou zot grander lespri, ki zot in permet Sesel annan en tranzisyon respektab, demokratik ki ozordi Sesel i ganny admire non selman lo kontinan Lafrik, me pli lwen ki sa.

Alor sa i enportan e mon reasir Lepep Seselwa ki manda pa pe ganny *extend* e sa kalkilasyon e sa ki *US* dir i pa korek. I reste mwan 5 minit Mr Speaker, vitman mon ava koz lo pas baton. Napa pas baton. Nou'n tire lontan sa. Alors *US* aret servi sa lekspresyon "pas baton."

I annan 2 lenstans kot Prezidan, Vis-Prezidan i kapab pran Lofis Prezidan. Dan premye lenstans si Prezidan i mor, i mor par i ganny touye, i ganny aksidan ouswa i malad i mor, ouswa si Prezidan i tonm malad e alor pou

lenkapasite fizik ou mantal, i bezwen ganny tire e alor Vis-Prezidan i pran son plas.

Dan sa 2 ka pa li ki pou swete in tonm malad i pa kapab kontiny son manda ouswa i rod malad pou met lo li dan sa ka Vis-Prezidan i pran labar. E si i plis ki 2 term ler Vis-Prezidan i pran, setadir plis ki 40 mwan, 2 tyer, Vis-Prezidan i kontinyen sa i ganny konte koman en term.

Me si i mwens ki 2 tyer savedir dizon i 10 mwan koumsa, i pa ganny konte koman en term e alor Vis-Prezidan i pou kapab debout dan eleksyon ki vii e debout pran en lot dezyenm term ki Konstitisyon i fer prevwar.

Lot lenstans kot Vis-Prezidan i kapab pran labar Prezidan, se ki si i ganny tire malapropo pou en keksoz ki in fer, in touy dimoun in vole eksetera, Vis-Prezidan i pran ziske ler en nouvo eleksyon i bezwen fer. Ou sinon si Prezidan i demisyonnen e la li i pa pou kapab re debout i a bezwen esper sa lot eleksyon ki vini, la Vis-Prezidan i kontinyen ziska *fresh election* i ganny fer. Alor napa sa zafer pas baton. I kler sa.

E dan dezyenm lenstans i en keksoz ki li Prezidan ki pou rode pou met lo li akoz in fer en keksoz ki mal ouswa in demisyonnen, la i perdi. So napa pas baton.

E trwazyenm se sa zafer voras pouvwar. Mr Speaker, letan ki en Prezidan i kapab *call* en *snap election* sa i en prerogativ pouvwar sa. Ou war poudir ou popiler la parey Onorab Hoareau yer in byen eksplike, apre Zwe De Zil Seselwa in vin ansanm nou santi poudir i annan en *feeling of nationalism* vitman nou *call* en *snap election*, nou *caught* Lopozisyon *off guard*.

Be ler en Prezidan i retir sa pouvwar ki i dwatet annan, eski ou apel sa boug poudir i swaf pouvwar? E lafen pouvwar? Anfet resers ki'n ganny fer atraver lemonn Mr Speaker, i prouve ki mazorite Gouvernman ki kapab *call* en *snap election* i annan 6 poursan lavantaz reganny sa eleksyon lo son bann oponan.

Be alor si Prezidan Ramkalawan ozordi i anmenn sa lamannman, i anvi asire ki eleksyon i zis, i lib, tou dimoun i kapab prepare, tou parti politik, *civil service* i kapab kalkil son bann proze.

Komisyon Eleksyon in prepar li, nou bann partner otour nou kekfwa ki oule fer en keksoz avek Sesel en proze i konnen ki pe arive, me pli enportan pou kominote biznes ek klima lenvestisman i enportan anmenn sa stabilite.

Alor la ki i reste mwan 2 minit mon ava termin an konklizyon pou dir reform

konstitisyonnel i en keksoz ki pou bezwen detanzaot arive. Akoz depandan legzizans letan ki nou pe viv ladan e 2024 i demande ki nou annan sa bann standar demokratik enternasyonal parey bokou lezot pei.

Sa zafer fikse dat eleksyon e en peryod tranzisyon Leta-z-ini pe fer li plis ki 250 an. Alor napa naryen mal avek e mon ava envit mon bann koleg dan Lopozisyon pou reflexir lo sa bann propozisyon e vwar li dan lespri nou pe fer nou pei vin pli relevan.

E mon ti *Malaysia* avek Onorab Michel, pa Michel me Richard Labrosse semenn pase e mon'n dir zot poudir nou pe fer sa lamannman e tou bann pei ki ti la depi *l'Australie*, Nor Irlann, *Malaysia* menm in felisit nou. E menm dir poudir zot pou retourn dan zot Parlman e al met presyon lo zot Gouvernman pou adopte sa model aköz i modern, i relevan e i demokratik.

Mon annan mwan detrwa segonn Mr Speaker mon fini la, zis 15 segonn e mon envit tou bann lezot Manm osi pou fer menm zafer kalkil zot 15 minit koumsa nou ava travay byen. Mersi.

**(APPLAUSE)**



**MR SPEAKER**

Mersi Onorab. Onorab Cosgrow ou annan laparol prezan.

**HON WALLACE COSGROW**

Mersi Mr Speaker. Bonzour Mr Speaker. Ou ava eskiz mon lavwa ozordi, depi yer mon lavwa pa tro bon, mon krwar zot kapab konpran akoz mon lavwa pa bon, wikenn in en wikenn imans pou parti *United Seychelles* e nou bann siporter.

Mr Speaker, mon pou komans koumsa ozordi bomaten, mon annan mon 15 minit e mon krwar mon'n fini antre 1 minit dan mon preski 1 minit dan mon entervansyon. Dan *manifesto LDS* Mr Speaker, an 2020 ti annan en kantite keksoz.

Mr Speaker, lo paz 16 *manifesto LDS* ti koz lo amelyor saler ek pansyon Seselwa. Lo sa menm paz 16 Mr Speaker, ti koz lo proteksyon pou profesyonnel Seselwa avek biznes, ti osi koz lo tenir ouswa fer desann pri lavi.

Eski Mr Speaker, Seselwa ki pe ekout mwan ozordi bomaten in war *LDS* egzokit sa bann promes lo paz 16 zot *manifesto*? Mazorite Seselwa ki pe ekout mon bomaten pou dakor avek mwan ki non! Ozordi

Gouvernman *LDS* in fer monte laz pansyon 65 an.

Sel promes ogmant pansyon bann retret, in ganny fer dan sa nespes konvansyon akoz zot konnen eleksyon pe vini zot pe sey pas dimyel obor ver vineg Seselwa e saler dan sekter prive dernyen logmantasyon ti ganny donnen anba Prezidan Danny Faure an 2019 atraver lezislasyon *minimum wage*.

Zot pa'n fer naryen pandan sa 4 an Mr Speaker! Lo paz 18 Mr Speaker i koz lo fasilitasyon fer biznes. Lo paz 19 i koz lo tourizm.

Ozordi bann dimoun Mr Speaker, ki dan biznes touris - bann pti biznes ozordi Mr Speaker, ki pe ganny difikilte pou kapab kit zot biznes *afloat*, eski *LDS* in fer okenn keksoz pandan sa dernyen 4 an? Non Mr Speaker! Larepons i non, non, non!

Zot deside Mr Speaker, ozordi vin avek sa ki zot dir ti dan zot *manifesto* fiks dat eleksyon. Sa zot in deside vin avek apre 4 an Mr Speaker. Tou saki mon'n dir naryen zot pa'n fer. Prezan akoz Mr Speaker zot deside vin avek en lamannman konstitisyonnell konsernan dat eleksyon avek bann lezot lamannman ki'n vin ladan.

E Mr Speaker, kwa ki annan mal e mon pou elabore kwa ki annan mal avek sa

lamannman ki devan Lasanble Nasyonal.

Mr Speaker, kwa akoz ki ozordi Prezidan Ramkalawan ek Gouvernman *LDS*, i war li neserer ki zot bezwen sanz provizyon Konstitisyonnèl ki dayer zot ti ganny elekte lo la. Zot ti ganny elekte lo la an 2020, e dapre sa ki Onorab Deshiela Bastienne in dir, tou tranzisyon ti pas byen ti napa okenn problem.

Be pour ki rezon alors zot decide vin avek sa lamannman konstitisyonnèl pep Seselwa? Larepons i kler, napa naryen mal dan sa provizyon Konstitisyonnèl? Napa naryen mal.

Pep Seselwa i bezwen konpran Mr Speaker, tre byen ki tousala i bann mannev e mon pou dir, mon pou repete i bann mannev pou zot vol sa eleksyon ki pe vini! Dir sa ki zot anvi, defann mannyer zot anvi, i bann mannev pou zot ganny lavantaz dan eleksyon ki pe vini e pou zot vol sa eleksyon!

Mr Speaker, i annan en travay e mon pou dir i annan en travay kordinen tre kordinen maske dan sa swadizan pozitivite pou sanz ban Lalwa Konstitisyon *political parties e Elections Act*.

I annan en mannev par Gouvernman *LDS* an kolaborasyon avek Komisyon Eleksyon pou zot sanz sa bann

Lalwa pou zot ganny lavantaz dan eleksyon 2025 ki pe vini.

E zot kapab sey demanti mwan Mr Speaker. Mwan mon war kler e nou kote *United Seychelles* nou war kler zot mannev. E nou pou lager kont zot mannev, nou pou lager kont zot mannev e si fodre fer piblik Seselwa desann dan semen pou lager kont sa mannev nou pou fer li Mr Speaker!

**(APPLAUSE)**

### **HON WALLACE COSGROW**

Les mon a eksplik zot Mr Speaker, ki mannyer zot pe anmenn- sa ki zot pe anmennen pa byen e ki mannyer zot pe sey reziste poto gol pandan ki *match* pe zwe e zot vwar defet pe vini. Zot pe re bouz poto gol Mr Speaker.

Si sa provizyon ti reste dan lanmen- ti reste, then landmen apre ki Komisyon Eleksyon i deklar Prezidan Herminie in ganny elekte i devret sermante. E i komans diriz pei parey Prezidan Ramkalawan ti fer an 2020. Sa se provizyon parey i ete ozordi.

Me lefe ki zot anvi ankor plis letan lo pouvwar Mr Speaker, zot sanz pozisyon e re enterpret seksyon 52(1) Konstitisyon ozordi pou dir ki son term i fini le 26 Oktob. Konstitisyon ozordi i dir ki

term sa Prezidan i fini ler ki Komisyoner Eleksyon i deklaras sa lot Prezidan elekte, se sa ki Konstitisyon i dir ozordi.

Prezan sa enn ki'n ganny elekte i bezwen espere li. Anba sa provizyon la i bezwen espere li, selman Prezidan Faure Mr Speaker, ti sorti e donn ladministrasyon - donn Prezidan Ramkalawan ladministrasyon lannmen eleksyon.

Zot pe sey kasyet lefe ki zot anvi rod tousort fason pou retenir pouvwar Mr Speaker, avek en bann leskiz ki bezwen *handover*, bezwen envit bann Sef Deta, bezwen donn meday, bezwen donn kopi konstitisyon e menm en sab zot oule donner. Zot sitan fikse e obsede donn zot lekor meday ek tit e tousort ki zot pe rod 1 mwan pou fer tousala Mr Speaker.

I kler Mr Speaker, ki zot pa anvi sorti e zot pe rod tou fason pou reste lo pouvwar. Be annou pa bliye Mr Speaker, dan miting piblik Prezidan ti dir, mon fek pe get en *video* bomaten in dir avan soley leve li, si Seselwa i deside pa elekte li avan soley leve i pou'n fini pran son loto e i pou mont Semen Serret. Sa ki in dir i pou mont se li.

La in dir nou i oule ankor 1 mwan, 1 mwan pou li ale. Mr Speaker, Semen Serret i apepre zis 500 met la avek

*State House, ok?* I annan en nouvo *exit* ki'n fer deryer *building Galaxy* pa pran 5 minit pou mont anler. Silvouple, silvouple annou reste, annou reste lo provizyon Konstitisyon ki ozordi napa naryen mal e annou ale.

Akoz pep Seselwa pou koz kler an 2025 e nou anvi ki ler lot Prezidan, Prezidan Herminie i ganny elekte, i kapab sermante landmen e diriz Sesel dan en nouvo semen.

Mr Speaker, prezan enn bann kekyon kardinal e fondamantal ki sa *Bill* pa pe adrese an sa ki konsern sa lamannman partikilye ki mon pe koz lo la. I sa ki konsern pouvwar Prezidan pandan sa peryod tranzisyonnel.

Nou bezwen konnen lamannman i bezwen dir nou lekel Prezidan ki annan pouvwar pandan sa letan tranzisyon, eski se Prezidan elekte ouswa sa Prezidan sortan? Sa Prezidan ki'n fini ganny pouse dan son dyob li, Prezidan sortan, lekel ki annan pouvwar?

I pa kler dan sa *Bill* e Mr Speaker, pou mwan mon krwar zot devret eklersi sa ki sa Prezidan i kapab fer. Nou pa kapab travay dan en *vacuum* Mr Speaker. Nou pa kapab pran legzanp lo Lanmerik, Lanmerik in pran sepa konbyen lannen 200 an i

annan lenstitisyon, lenstitisyon ki'n met an plas pou dil avek sa bann lenstans.

E nou, nou pa kapab zis kopi *and paste* apre dir nou pe pran legzanp Lanmerik. Nou pa kapab Mr Speaker, nou bezwen met lenstitisyon ki pou garanti nou demokrasi. Nou bezwen met lenstitisyon. *Otherwise* sa i vin zis en nespes provizyon koumsanmenm i pa ni fer sans.

Mr Speaker, lot provizyon ki mon oule koz lo la aköz mon letan pe fini. Lot provizyon ki mon oule koz lo la se sa zafer fikse dat pou eleksyon- par donn sa zafer pas baton Mr Speaker, Prezidan ki arive avek en Prezidan ouswa en Vis-Prezidan ler en Prezidan pa kapab desarz son lofis.

I annan ki kler i dir ou si Prezidan in ganny in *resign* ouswa in ganny tire par Lasanble Nasyonal *then* Vis-Prezidan i *take over* i annan eleksyon apre 3 mwan Vis-Prezidan i tenir ziske 14 zour, apre sa lot Prezidan ki'n ganny elekte i vini sa Prezidan pa kapab partisipe *and so on and so forth*.

Be aköz nou pa kapab kit sa provizyon *throughout* tou sa bann lenstans? Aköz ki en serten lenstans Prezidan in mor, Vis-Prezidan i bezwen tenir sa pozisyon ziske ler manda sa Prezidan ki'n mor i

fini? Si nou pe dir nou demokratik Mr Speaker annou kit sa provizyon *throughout*.

3 mwan Prezidan i mor, 3 mwan nou fer eleksyon nou ganny en nouvo Prezidan. Dayer pa mwan ki ti dir sa Mr Speaker ou menm ou Mr Vis-Prezidan Afif lo en *podium* ki ti dir.

I en provizyon mon ava anvoy ou *video*, si ou'n bliy sa *video* mon ava anvoy ou, ou *video*, i en keksoz ki ou, ou ti dir, zot pe koz lo la demokrasi avans lo demokrasi.

Mr Speaker, sa i zis parey mon'n dir en bann manivrans pou zot kapab vol sa eleksyon 2025. Zot pe rod toudsort fason pou zot pa sorti lo pouvwar e pou zot konsolid pouvwar, pou zot fer sir ki zot kontinyen fer tou sa bann ensinifyan ki zot pe fer ozordi.

Dernyen pwen Mr Speaker, mon oule koz sa zafer dat fikse dat eleksyon. Sa *whole* lamannman i santre lo sa zafer fikse dat eleksyon nou'n ganny dir. Me nou bezwen ganny en konpran, Prezidan Ramkalawan avek *LDS* ti ganny elekte lo en provizyon konstitisyonnel an 2020.

Nou pa kapab Mr Speaker, pran *goalpost* bouz dan milye laplenn ler in ariv 1 an avan eleksyon zis avan eleksyon. Si zot aprouv sa lamannman konstitisyon, *then*

i ava pran lefe dan *next* eleksyon e nou ava ganny en dat pou *next* eleksyon.

Nou pa kapab 1 an avan eleksyon zot vin komans dir nou poudir dat eleksyon pou tel dat, Prezidan pou reste 1 mwan, lot, lot, lot. Ou pa kapab sanz Lalwa pandan manda sa Prezidan.

*Then* i kapab fer sa ki i anvi si nou dakor ki i kapab sanz Konstitisyon *then* i kapab *extend* dir mon pou al an Desanm be si zot annan mazorite zot a vote. Zot 2 tyer yer ti pres- yer ti pres pou napa 2 tyer, zot 2 tyer i la zot ava vote i kapab fer sa ki i anvi.

Be i pa kapab fer sa ki i anvi, i bezwen respekte la demokrasi, respekte sa Konstitisyon ki'n in ganny elekte lo la Mr Speaker. I bezwen respekte Konstitisyon ki'n in ganny elekte lo la.

E Mr Speaker, avan mon terminen nou pe koz lo *snap elections*, ozordi, ozordi Mr Speaker pei Lerop mazorite bann pei demokratik Lerop tousala i fer *snap elections*, so *what is wrong with snap elections?*

Sa ki zot pe sey fer se ki zot pe sey fer en fashion ki ler zot la, la zot vini zot pa sorti Mr Speaker. Sa ki aköz tou pe sey fer e sa i ranforsi mon largiman ki zot pe sey rod en

fason pou vol e organiz eleksyon 2025.

E mwan mon garanti zot, mon garanti zot ki sa lafors sa divan sanzman ki la deor ozordi, Seselwa in war zot, lamazorite Seselwa in war zot, lamazorite Seselwa ki dezapwente ek zot aköz zot pa'n *fulfil* zot *manifesto* preski antye.

Ozordi zot deside vin avek en pwen *manifesto* pou zot re aranz *goalpost* pou zot vol eleksyon Mr Speaker e sa pa pou arive - zot kapab aprouve ozordi me lafors pep Seselwa pou fer sir ki zot pa pou vole sa eleksyon 2025! Mersi Mr Speaker.

**(APPLAUSE)**

### **MR SPEAKER**

Mersi Onorab. Laparol pou Onorab Terence Mondon.

### **HON TERENCE MONDON**

Mersi Mr Speaker. Mon pran laparol pou aport mon kontribisyon lo sa Prozedlwa pou amann Konstitisyon nou pei. E mon profite pou remerisi Vis-Prezidan pou son prezantasyon e sa lekip ki'n met lespri ansanm pou fer sa travay enportan pou Sesel.

Lobzektif sa revizyon i kler, fikse dat pou eleksyon prezidansyel e asire ki eleksyon i ganny fer dan

senkyenm semenn avan lafen en manda 5 an.

Sa propozisyon pou fikse dat eleksyon i bon pou Sesel e dan benefis tou parti politik. Sa provizyon i retir pouvwar dan lanmen Prezidan e osi permet tou parti prenon setadir parti politik. Komisyon eleksyon e lezot lorganizasyon sipor pou pli byen prepare pou eleksyon.

Sa 5 semenn avan lafen manda en Prezidan ki pe ganny entrodwir pou permet en peryod tranzisyon avek en eleksyon prezidansyel. Sa peryod tranzisyon i nesese e pe ganny pratike dan bokou pei. Sa provizyon i osi enportan dan ka kot i annan en dezyenm *round* eleksyon. Sa i kapab ganny fer dan 14 zour parey Lalwa i demande.

I osi enportan ki sanzman pouvwar i ganny fer avek respe e dinyite. Sa 2 eleman i ranforsi linite. Ler en Prezidan i *swear in* i en moman solannel e i devret ganny plis lenportans.

Lo sa pwen mon salye Prezidan Ramkalawan pou donn ansyen Prezidan Faure letan nesese avan i pran sa lofis. Seselwa i apresye vwar sa linite e respe mityel ki sa 2 dirizan in demonte dan sa pti gin letan.

Sa Prozedlwa pe propoz ki eleksyon prezidansyel e Lasanble i ganny fer ansanm.

En provizyon ki pou ede koup depans pou fer eleksyon dan nou pei. Sa provizyon pou osi ranforsi nou sistenm eleksyon an zeneral.

Prozedlwa pe propoze pou *repeal* Lartik 52A ki permet en Prezidan *resign* pandan son manda e rod en lot manda avek elektoral. Sa provizyon i nesese akoz i adres sa problenm eleksyon pli boner parey nou'n vwar dan lepase.

En Prezidan i bezwen onor son manda. Provizyon nesese in ganny fer pou serten sirkonstans tre spesifik tel ki ler en Prezidan i demisyonnen, oubyen i ganny retire pou move konportman ouswa i annan en problenm lasante ki pa permet li desarz son responsabilite e osi dan ka lanmor.

Prozedlwa i klarifye e i ranforsi bann prosedir dan ka kot Prezidan pa pe desarz son bann fonksyon. Prozedlwa i propoze ki Lartik 59 ki protez en Prezidan kont aksyon legal apre en peryod 3 an i ganny *repeal*.

I vremen enportan ki nou protez nou pei kont okenn form koripsyon e sa provizyon i devret asir pep Seselwa ki nou pa krwar ki en Prezidan i devret ganny iminite apre ki in ganny konfye pou zer resours Leta. Napa personn ki par lao Lalwa dan nou pei.

Nou konnen ki *US* pa oule retir iminite en Prezidan, akoz zot ti vot kont en Prozedlwa ki Onorab Larue ti anmennen dan sizyenm Lasanble. Prozedlwa i osi klarifye en rol enterim pou *Principal Minister* dan labsans Prezidan e Vis-Prezidan.

Mr Speaker, propozisyon ki dan sa Prozedlwa i kler me Lopozisyon i swazir pou koz lo lezot size ki pa relevan e parey labitid e se senm konfizyon e lafreyer dan lespri nou pep.

Wi, sa seri propozisyon pou ranforsi demokrasi e anmenn plis laklerte lo eleksyon Prezidan e lezot size elevan. Mon konnen ki i annan serten mo ki *US* pa oule tande ler nou koz la demokrasi, rann kont, la transparans e bon gouvrenans an zeneral *US* i fini per e zot komans rabase.

*Leader* Lopozisyon in dir nou, in dir nou yer si zot retourn o pouvwar zot pe al sanz tousala. I kler ki *US* pa krwar ki nou devret kontinyen ranforsi nou demokrasi e donn loportinite tou parti politik pou konnen boner kan eleksyon pou ganny fer.

Mon pa bezwen retourn dan lepase pou fer Seselwa rapel nou vre listwar. Tou sa ki'n pase Seselwa in ganny sa *live* lo televizyon nasyonal atraver *TRNUC* e Seselwa pa pe aspir pou reviv sa lepok.

*LDS* Mr Speaker pe travay pou elev standar gouvrenans dan nou pei. E kot nou annan defayans nou pou adrese. Mersi Mr Speaker.

**(APPLAUSE)**

**MR SPEAKER**

Mersi Onorab. Laparol pou Onorab Spiro.

**HON RACHEL SPIRO**

Bonzour Mr Speaker. Bonzour Vis-Prezidan ek ou *panel*. Bonzour tou koleg Onorab e bonzour tou dimoun ki a lekout.

Mr Speaker, mon pa pou manke pou mon adres 2 pti mo lo sa size 11enm Lamannman. Mr Speaker tou lanmor i annan son siny. Serten fwa nou pa vwar me selman i la.

**(APPLAUSE)**

**HON RACHEL SPIRO**

E atraver sa bann lamannman ki pe ganny propoze mon trou en siny dezespwar ki Gouvrenman *LDS* in met devan nou e zot pe sey fer nou anvale konmsi nou pa war kler e nou pa konpran.

Sa bann amannman pe ganny anmenn lo non la demokrasi, latransparans. Dan sa bann menm lamannman mon war dezespwar atraver sa

lamannman dan sa Konstitisyon ki zot pe sey rod lavantaz dan en Fason ou en lot.

Tou sa problem ki sa pei i annan Mr Speaker Gouvernman LDS i decide vin avek lamannman lavey en eleksyon. Vis-Prezidan i dir nou ki sa i dan zot *manifesto*. Me dan sa *manifesto* i annan en kantite keksoz ki pa ankor ganny delivre en? E si Lepep Seselwa i vreman vir tou sa paz sa *manifesto* zot pou vwar ki mannyer zot in ganny desevar.

Annou get en pti pe pli pros sa bann lamannman ki pe ganny propoze. En dat fiks pou eleksyon prezidansyel. Sa Gouvernman i anons en dat fiks pou eleksyon prezidansyel. Rezon se ki zot dir pou fer en *smooth transition*, en tranzisyon ki tou dimoun i okouran e an menm tan tou parti politik i ganny letan prepar zot byen.

Me selman ou'n anons dat 1 an avan eleksyon, 1 an pou ou prepar tou ou lozistik, prepar ou tranzisyon, i parey mon'n donn ou en louvraz ou bezwen donn mwan 1 mwan notis.

La ou menm ou'n donn ou lekor notis depi 1 an davans ki ou'n anons sa dat eleksyon. Ki tranzisyon ou pe koz nou kan depi ou biro eleksyon, ou lofis zot tou zot

konnen ki dat eleksyon in ganny...

*(Interruptions)*

**MR SPEAKER**

*Order!*

**HON RACHEL SPIRO**

Fikse e prezan oule reste dan lofis 1mwan ankor pou konplet sa manda. Si ou ti anvi konplet ou Manda ou ti ava annons ou dat eleksyon en pe pli pros avek letan ki ou pe sorti dan lofis.

Ou pa kapab reste o pouvwar e kontrol tou keksoz ler en lot Prezidan in ganny elekte dan lofis Prezidan e ou, ou pou decide reste lanmenm e ou a *swear* li in 1 mwan pli tar. Be sa i apel malonnet. Ou pa kapab vol sans ou kanmarad. In fini gannyen ou sorti ou sed laplas, *pack and go* !

Sa Konstitisyon ti byen. Me ou konnen kwa? Nou defons sa bato, apre nou dir nou pe vini pou nou vin repare. Be akfer ou ti defonse ou kit en trou vid?

*(Interruptions)*

**MR SPEAKER**

*Sorry.* Esper en kou. Mon komans ganny en pe enteripsyon lo tou lede kote latab, silvouple Onorab



Woodcock, Onorab Loze,  
Onorab Pillay gard lord!

Mon pa anvi, mon pa  
anvi, mon pa anvi met personn  
deor, silvouple gard lord!  
Onorab Spiro silvouple  
kontinyen.

**HON RACHEL SPIRO**

Mr Speaker, mon rebran. Sa  
Konstitisyon napa naryen mal  
avek. Eleksyon Prezidan  
Ramkalawan in gannyen lo sa  
menm Konstitisyon. Ozordi zot  
oule defons sa bato, kre en  
trou ladan apre dir nou zot  
pou fikse trou, be napa trou  
pou fikse ek sa Konstitisyon.

**(APPLAUSE)**

**HON RACHEL SPIRO**

Dan sa peryod tranzisyon lekel  
ki asir proteksyon sa Prezidan  
ki pe antre? Parske la li i napa  
okenn pouvwar li, tou  
pouvwar i reste ek sa Prezidan  
ki ankor la, en *sitting President*  
ki li dimoun in fini *vote* li *out*.  
E Seselwa pou *vote* li *out*!

**(APPLAUSE)**

**HON RACHEL SPIRO**

Mr Speaker, eleksyon  
Lasanble Nasyonal- eleksyon  
Manm Lasanble ansanm avek  
eleksyon prezidansyel, sa in  
toutan leka, naryen pa'n  
sanze i pa nouvo.

Me ki lesplikasyon se sa i  
riske annan ler ou ankor

annan en Prezidan ki li i pa  
ankor termin son manda, i  
ankor annan tou son pouvwar,  
ki i kapab fer an sa ki konsern  
sa bann Manm Lasanble ki la  
in ganny elekte pou sa lot  
Prezidan ki pe vini?

I ankor annan 1 mwan li,  
ki son pouvwar ki i kapab fer  
pandan sa letan li an sa ki  
konsern Lasanble? Eski i  
kapab *convene* Lasanble? Eski  
i kapab dizourd Lasanble?  
Nou anvi konnen ki i kapab fer  
ler i ankor la dan sa lofis?

Mon war sa i enkyetan,  
akoz sa Gouvernman i ankor  
promet keksoz ki apre i pa  
delivre. Kantite promes in  
ganny fer, e eski sa enn  
promes la ki dan sa  
amanman pou ganny  
respekte? Parske nou'n war  
nou, ler nou koz lo *long service*  
*allowance*, Prezidan in koupe  
sa li, selman ozordi tou sa *long*  
*service award* li ki pe donner.

Be sa bann dimoun li i  
satisfes zis avek *long service*  
*award*? I pa ti pou kontan  
ganny son pti larzan ki i ti pe  
gannyen tou le 5 an? *Come on!*

**(APPLAUSE)**

**HON RACHEL SPIRO**

Mr Speaker, mwan osi war sa  
zafer si en Prezidan i nepli  
kapab desarz son  
responsabilite oubyen i mor  
Vis-Prezidan pou pran labar.

Me pas baton i annan plizyer fason fer en? Ou menm kapab pran en dimoun met lo ou ledò e letan ou, ou'n fatige poz li ater dir li pran, taye ou. E sa ki mon war pe arive.

Konmsi nou pe fasilite en keksoz deryer laport ki avan nou ti dir nou pa dakor avek, nou pa dakor pas baton pwen final! Nou tir pas baton net, nou *call for election*. I senp sa. Napa naryen difisil, me selman nou pa pe eksplik sa pep sa e nou pe kontinyen fer li krwar poudir sa ki in gannyen la - en gato ek *icing* lo la tre bon, me selman nou pa dir li anba la in brile.

Mwan mon war poudir sa bann lamannman pa fer okenn sans e mwan mon pa pe donn mon laprouvasyon pou sa lamannman. E si nou kontinyen, mon konnen zot annan zot *super* mazorite. Yer, atraver ou Mr Speaker *Leader Government Business* in fer tou son *super* mazorite la pou zot pas sa Lamannman. Me selman, me selman sa ki enportan se ki Lepep Seselwa pe ziz zot e 2025 pou *write* zot *off*. Pou tir zot vre !

**(APPLAUSE)**

**MR SPEAKER**

Mersi Onorab. Laparol pou Onorab William.

**HON WAVEN WILLIAM**

Mersi Mr Speaker. Mr Speaker, avan tou mon remersi Bondye nou kreater pou son faver e lagras lo nou pei. Mon remersi tou sitwayen ek krwayan ki pe soutenir nou pei dan lapriyer.

Mr Speaker, *manifesto* parti LDS pou eleksyon parti zeneral 2020 dan lentrodiksyon i koz lo misyon parti LDS dan Gouvernman, ki ou koman Prezidan Parti Mr Speaker ou ti ekrir ki mon tonm dakor ek sa ki ou'n ekrir.

Mon *quote*; -

“Nou anvi donn sak sitwayen Seselwa en garanti ki zot annan en plas e en par dan sa pei, i pou zot pou konstrir pou zot benefisye atraver sa ki pei i annan. Nou deklarasyon nou linite nasyonal, bonn governans, loportinite e lazistis zot ganny ankre dan sa fraz, i zot pei e nou anvi ki zot erit li.

Sa *manifesto* i demontre nou bann prensip e nou target pou governen. Zot anliny anver kwa ki pou fer Sesel vin sa pei ki pou ganny byen governen dan en fason pli inik dan listwar dan devlopman la demokrasi Sesel e ek en Gouvernman LDS pou en nouvo lespri e en nouvo lapros governans” *unquote*.

Mr Speaker *goodbye* e so *long* sa moman viv lo petet ek dat eleksyon. Nou pe zet anba bann lespri kapris, diktater ler

i fer politisyen plezir, tat delo pou konnen si lopinyon...

**(APPLAUSE)**

**HON WAVEN WILLIAM**

...nou pe zet anba bann lespri kapris, diktater ler i fer politisyen plezir, pou tat delo pou konnen si lopinyon piblik i dan son faver pou *call* en eleksyon.

Mr Speaker, en lord pe ganny mete ki ek sa lespri Sesel pou tou son zanfand sitwayen Seselwa, fanmir Seselwa bann investiser ek sekte prive a konnen davans piu planifye zot dan zot plan familyal e zesyon zot Bidze.

Tou dimoun pou serten me pa pe viv dan lensertitid pou *get on* ek zot plan personnel. Mon pa konpran lafreyer Lopozisyon ek sa dele letan apre eleksyon pou fer en tranzisyon byen, rann kont e fer lavi en lot Gouvernman vin pli fasil.

Pa parey in leka dan dernyen eleksyon, kot serten keksoz pa'n ganny fer byen. De lot kote, frer e ser Seselwa par lefe ki lartik ki donn liminite en Prezidan 3 an pe ganny tire. Sa lamannman a permet ki Prezidan a kapab ganny zize apre eleksyon si in vole detrir bann dokiman, lenformasyon enportan.

Mr Speaker, atraver sa bann seri lamannman

konstitisyonnell mon anvi fer konnen pep Seselwa ki lo sa *Bill* bann entervansyon pe zis *mislead* zot in ganny fer par Lopozisyon. Senm lafreyer, polariz sa pep, kontinyen egzers kontrol lo fason panse serten kous popilasyon e set fer zot krwar ki ti en lerer pou met zot lo minorite an 2020.

Zot anvi fer sa pep e atraver zot deba lo sa lamannman konstitisyonnell vin kontinyen fer diskour zot *rally* isi dan sa Lasanble akoz ti napa ase dimoun pou ekout zot Sanmdi Pase.

**(APPLAUSE)**

**HON WAVEN WILLIAM**

Mr Speaker, mon'n koz ek plizyer endividi lo sa bann lamannman. Mazorite ki mon'n koz avek zot in dir mwan ki sa i byen, pe met lord e sitwayen pa ava fye lo kapris politisyen e ki sa bann lamannman i annan bann eleman anmenn stabilite, sekirite e linite dan pei.

Mr Speaker, sa pep pa anvi kontinyen viv dan *denial*, sa *denial* ki sa 43 an in sey zwe ek zot panse ek zot lespri. Kontrol zot lanvi piu liver zot panse e sa swa pou swazir en pozisyon.

La nou vwar Onorab Spiro ki ankor pe fer sa pep-fer krwar sa pep ki son dokiman konstitisyonnell i en

dokiman mor, sakre e ki pa devret amande pou met lord, fer keksoz pli kler. Sa bann lamannman pa pe vyol drwa sa pep, sa bann lamannman pe retir kontrol politisyen lo drwa lezitim sa pep Mr Speaker.

Mr Speaker, sa Prozedlwa pe osi endike atraver son bann lamannman ki letan eleksyon in arive sa Gouvernman i annan- i fer keksoz kler ki ler nou pas pouvwar ek Lepep pou swazir en Gouvernman e dir donn mwan 5 ouswa pe dir ki mon pe donn ou 5.

Pep pa anvi ki ler in vot en kontra 5 an politisyen baze lo son kapris mank konfyans e kas kontra pep, *call election* apre 3 an, 3 an edmi, 4 an kan sa pep in vot pou en Prezidan e son reprezantan prefere pou 5 an Mr Speaker.

Drwa sa pep e tou bann ki'n debout dan eleksyon lepase zot kontra in ganny vyole atraver bann fason fer lepase Mr Speaker.

Mr Speaker, mon anvi fer pep Seselwa ki zot kapab kont lo s akote latib, kont lo s akte latib akoz nou annan zot lentere a ker. Nou an en Prezidan ki krwar dan la demokrasi e pou progresyon sa pep. Lekip *LDS* dan sa Lasanble pou fer li pou Seselwa.

Ozordi sa ki Sesel ouswa aletranze akoz nou la Mr Speaker pou menm rezon. Nou tou nou la pou menm rezon pou Sesel ek en vizyon kler. Nou tou nou la pou menm rezon pou en Sesel avek en vizyon kler. Sa ki nou bezwen tate pou *call election*. E Mr Speaker nou pa pou zanmen les tonbe! Mersi.

**(APPLAUSE)**

**MR SPEAKER**

Mersi Onorab. Laparol pou Onorab Adelaide.

**HON FRANCOIS ADELAIDE**

Mersi Mr Speaker. Bonzour Mr Speaker. Bonzour tou mon koleg *MNA*. Tou dimoun ki pe ekoute, espesyalman bann ansenyan Baie Lazare. So, mon swet zot tou de bon lo dan zot travay e dan zot lafet osi, pour ki zot pas en bon letan.

Mr Speaker, - e mon pa pou rat sa sans osi pou remerci Lafors Lapolis Sesel pour sa vreman bon travay ki zot in fer dan *Ex-Gondwana*. Sa nou apel Dan Fatak kot ti annan en lenfestasyon drog. E mon demann zot pour zot kontinyen akoz nou bezwen netway nou distrik e fer sir ki nou zabitan i viv en lavi trankil.

Mr Speaker, e mwan mon pou al lo sa 11enm lamannman. E mon parey

mon bann koleg lo sa kote latab mon pou dir ki sa lamannman i enn ki Sesel ti bezwen. E sa i pe fer ki nou pe kontinyen anbras sa vre demokrasi e transparans, ki parey mon koleg Onorab Henrie in dir, ki menm nou pe ganny felisite par bann lezot pei.

E zot pe osi forse ki zot Parlman i adopte sa bann Lalwa modern, pou fer ki nou viv sa demokrasi ki nou ti pe rode. E atraver sa bann lamannman ki pe vini – sa 11enm lamannman, mon krwar sa i pe montre lentansyon *LDS*.

Parey nou pe dir, i ti dan nou *manifesto*. E nou bezwen fer sir ki nou kontinyen gete ki i annan dan nou *manifesto* pour nou kontinyen anbras sa bann sanzman, pour ki nou fer en Sesel ki pli modern.

Mr Speaker, sa lamannman ler mon pe gete, mon pa vwar naryen mal avek sa. Nou pe donn detay lo ki manner en Prezidan si li i anv *resign* ouswa si li in fer *gross misconduct*. E sa i pa en fason ki en Dirizan, si li Lepep in donn li en Kontra pour 5 an. I pa kapab dan milye son manda li i deside *resign* e i pou rod – petet tat delo pour li kapab rod en lot Kontra.

Apard sa osi, si en Prezidan in fer ki i annan en – in fer en fot. En *gross*

*misconduct*. E sa i bann fason ki en Prezidan pou bezwen – pa pou kapab konteste en eleksyon ankor tre prosennman. E sa mon krwar i en vreman en bon keksoz. E mon pa war naryen mal avek sa.

Mr Speaker, nou'n dir osi, ki manner en Vis-Prezidan i kapab pran manda son Prezidan si i arive i ariv en keksoz ki sa Prezidan li menm li i napa kontrol lo la. Lanmor, person napa kontrol lo la. E maladi osi, person napa kontrol lo la.

E si zanmen i arive ki dan letan ki en Prezidan pe kontiny son manda, i ariv sa 2 keksoz. E Lepep ti'n deside ki zot ti donn sa Prezidan sa manda. Byensir sa Prezidan ti al avek en Vis-Prezidan. An ka si i ariv sa evantyalite, sa Vis-Prezidan i kapab kontinyen. Akoz sa lafot i pa lafot en Prezidan. Me i en keksoz ki i napa kontrol lo la. E sa osi mon krwar i byen Mr Speaker.

Mr Speaker, ler zot pe dir zafer pas baton voras pouvwar. Mwan mon war i drol ki manner Lopozisyon i kapab anmenn en largiman koumsa. Akoz, si i dir ou en Prezidan son manda i 5 an. *Ok?*

Si i annan en mwan. Nou pe dir en mwan tranzisyon dan son manda. So, mon pa war sa i en voras pouvwar. En voras

pouvwar se ki si ou pa kapab esper ou 2 semenn, 3 semenn si ou'n ganny elekte Prezidan, pour ou espere pou pas atraver sa tranzisyon pour ou vin Prezidan. Mwan mon krwar sa ki i en voras pouvwar!

**(APPLAUSE)**

**HON FRANCOIS ADELAIDE**

So, nou bezwen anvoy sa mesaz la deor pou dir avek Lepep Seselwa. Mon krwar ozordi i tonm en bon letan, ozordi Lazournen Ansenyan, mon krwar nou isi dan Lasanble Nasyonal nou devret osi vin sa profeser ki nou'n ganny elekte avek nou bann dimoun pour nou kapab donn zot bann bon lenformasyon.

E ozordi mon krwar i devret sa letan kot nou isi lo kote latab isi, nou devret *shine*. Nou devret anvoy sa bann bon lenformasyon pour nou piblik e fer zot kontinyen ekout nou. Akoz lot kote laba, zot pou zis *derail* lenformasyon. Zot pou donn tou sort kalite zis akoz zot anvi konfiz sa pep pour zot retourn o pouvwar.

Me mwan mon pe dir zot poudir sa pep la deor, sa pep i en pep ki matir, sa pep i en pep ki malen. E sa pep i en pep ki vremen enformen. E mon demann sa pep deor pour zot lir zot *Bill* zot menm. Pa

zanmen les bann dimoun laba lot kote lir en *Bill* pour zot.

*(laughter)*

**HON FRANCOIS ADELAIDE**

Mon krwar i *available* lo *gazette.sc*. Pran zot responsabilite, lir zot *Bill* e zot a vremen konpran ki sa Lasanble ki nou pe pase, e ki nou pou kontinyen pase pour lavenir.

Mr Speaker, mwan mon krwar parey nou'n dir, en tranzisyon i vremen enportan. Mon'n rod lenformasyon lo ki mannyer sa bann keksoz i ganny fer. E mwan mon konvenki e mon konnen poudir avan sa ti napa en protokol lo ki mannyer pou fer sa tranzisyon.

E atraver sa bann Lalwa ki nou pase, byensir nou pa kapab met tou keksoz dan en Konstitisyon. Akoz sansan Konstitisyon pa pou fermen. Mon pa konnen kote nou bezwen *store* sa Konstitisyon.

Byensir si i annan bann lezot Lalwa ki nou bezwen *follow-up* apre, byensir bann parti politik i ava tonm dakor e nou ava met keksoz – e pa zis parti politik. Tou bann dimoun ki enterese pour zot kapab partisip dan sa prosesis.

Byensir i ava en lot travay ki pou fer pour nou kapab konpliment sa Lamannman Konstitisyon.

Byensir pa tou keksoz ki nou kapab met dan en Konstitisyon.

Mr Speaker, en lot keksoz ankor ki enportan avek sa fiks dat eleksyon. Nou pa kapab mazine Sesel i zis pou sa bann dimoun ki pe viv la Sesel. I annan en *diaspora* deor.

Nou annan en *diaspora* deor – Seselwa, ki petet li osi i anvi vin egzers son drwa Sesel. I kontribye. Kantmenm i pa reste isi, i anmenn son larzan isi. Son fanmir i isi. Byensir i en Seselwa. Be ler i ariv son bann letan li osi ki i anvi vin egzers son drwa. Mon krwar i devret annan sa posibilite pour li kapab fer sa.

Lontan ki ou ti fer? Petet ler zot ti konnen ti annan eleksyon, zot ti rod bann dimoun ki siport zot. Pey tiket, fer desann pour zot ganny lavantaz.

**(APPLAUSE)**

**HON FRANCOIS ADELAIDE**

E ozordi nou pe dir, tou Seselwa ki laba deor, ou pou konnen kan Sesel pou annan eleksyon. E si ou enterese pour ou vin partisip dan devlopman ou pei, mon krwar sa i en bon keksoz.

Se sa latransparans. Kot tou dimoun i konnen ki mannyer keksoz i ete e tou dimoun i prepar li. Napa

naryen mal avek sa. So, sa osi i vin en lavantaz pour tou bann dimoun ki deor.

Mr Speaker, mon pa pou tarde. Mon pou – petet i annan dimoun ki pou annan plis kontribisyon ki mwan. Me selman mon pe dir pou dir, mwan mon'n ganny vote Baie Lazare. Mon pe dir bann zabitan Baie Lazare, mwan mon pe dir zot sa ki byen.

Sa lamannman ki nou pe fer la set en keksoz ki byen. En keksoz ki transparan e en keksoz ki nou pou kontinyen anbras la demokrasi avek.

So si zot in donn mwan konfyans pou vin defann zot dan sa Lasanble Nasyonal, ekout sa ki mon pe dir. Sa i en bon keksoz. E zot menm zot parey mon'n dir zot, lir sa bann keksoz pour zot menm. Pa ekout laba. Pa ekout US, akoz zot pa pou aprann naryen ek US! Mersi Mr Speaker.

**MR SPEAKER**

Mersi Onorab. Laparol pour Onorab Richard Labrosse.

**HON RICHARD LABROSSE**

Mersi Mr Speaker. Dabor VP mon ti a kontan dir ou bonzour ansanm ek ou lekip. Bonzour spesyal osi pour tou dimoun ki a lekout ek bann ki pe ekout sa deba depi yer.

Mr Speaker, sa deba ki devan nou parey in ganny dir

depi yer, nou pe koz lo 11enm Lamannman dan nou Konstitisyon kot plizyer pwen in ganny dir. Sak Manm ki'n koze lo tou lede latab in pous zot sizesyon devan, ouswa zot in pous zot kestyon devan.

Me mwan ozordi mon pa ti a kontan kekfwa pou al dan en repetisyon. Me kekfwa pou konsantre lo 2 keksoz dan sa *Bill* li menm ki'n atrakte mwan. E osi kekfwa mon santi ki nou a kapab osi ganny en pti pe plis klarite.

Ozordi dan sa lamannman li menm ki pe koz devan nou, deba ki bokou pe koz lo la depi bomaten e depi yer, i sa dat fiks pour Eleksyon Lasanble Nasyonal.

Mr Speaker, dat fiks pour Eleksyon Lasanble Nasyonal dan nenport ki eleksyon ki fer dan tou pei, mon krwar i en keksoz ki demokratikman i sipoze byen ganny obzerve. Akoz mon pou dir sa?

Ler ou pe gete apre sak eleksyon, eleksyon li menm li i en prosedir ki pa arete dan li menm ler ou pe gete. Apre sak eleksyon son prosedir i kontinyen kot i annan son bann *circle of election* parey nou dir, ki ale.

E la parey la ozordi kot nou ete, nou dan en lot *circle* sa prosesis dan sa eleksyon li menm. Dan prosesis eleksyon li menm. E sa i apel *pre-election* li menm. E pour ou

annan en fiks dat pour eleksyon, kot i pou vin avek tou son bann lozistik ek tou son bann lezot travay ki vin avek.

E son bann travay li menm i pa konpri zis kot Biro *Electoral Commission*, ki li i annan sa pli gro travay parey nou konnen e i ganny *involved* partou kote ek popilasyon parey nou dir li menm. Sitwayen, si mon servi sa mo byen. Kot nou dir kot la sitwayen osi, zot bezwen osi pe obzerve kwa ki pe pase dan pei. Zot bezwen obzerve kwa ki zot in vote. Zot bann reprezantan e osi bann parti politik ki annan.

E ler nou pe koz en fiks dat pour eleksyon Mr Speaker, i osi annan en lot moman osi li menm dan sa prosedir kot la, kot tou dimoun ki pou vin *onboard* zot ava ganny en konpran poudir napa person ki annan lavantaz lo kanmarad. E *by now* la, i annan – bomaten mon'n tann dir ki Prezidan i sipoze anons sa en pti pe pli pres.

Mon pa konnen ki manner, ki dan lavantaz i ti pou annan si dan Konstitisyon, parey nou dir, oubyen dan en dokiman ki'n dir ki si eleksyon par egzanp ti pou fer Septanm 2025, si i ti pou ganny anonse dan Out 2025, ouswa kekfwa en pti pe 2 mwan avan, ki lavantaz ki



lezot dimoun ek bann travay ki en eleksyon li menm li i pou vin avek.

Mr Speaker, zafer dat fiks eleksyon i en konversasyon ki bokou Seselwa dan lepase e menm konmela zot in kontinyen koz lo la. Parey nou'n konnen, dan lepase manner eleksyon in ganny deroule isi Sesel.

Kot parfwa menm bann dimoun – parey mon'n tann Onorab William mon krwar, atraver ou Mr Speaker, mon krwar in fer resorti sa. Kot menm bann dimoun ki ganny elekte zot pa finalman deservi zot manda ordinerman.

Tou bann eleksyon ki'n pase dan Sesel sa bann dernyen lannen nou'n vwar ki bann manda in ganny *cut short*. Kot sa in vin apre ki sa politisyen li ki'n o pouvwar kekfwa in santi li i pa konfortab. Ouswa kekfwa i pa popiler avek lapopilasyon sa bann letan. Ouswa i vey en lokazyon. Ouswa i vey en keksoz, parey nou dir en keksoz dou pou li anvoye pou li santi ki son lavantaz i vin koumsa.

E la kot laplipar di tan kot li menm li son lavantaz pour li i ganny koupe aköz i pe rod en *fresh mandate*. E Lasanble laplipar di tan kot reprezantan oubyen kontinyasyon travay i ganny

arete. I pa ale lo sa manda parey i sipoze ale.

So, la mon krwar la ozordi ki nou pe koze apre ki sa Lalwa li menm li i pou ganny vote isi. La tou dimoun i ava lo menm paz, nou ava konnen kan ki eleksyon pou fer.

Me en keksoz ki mon ti a kontan kekfwa *VP* ler ou pe fer ou *summing up* kekfwa ou ti a kapab met en pti pe plis klarite lo la, oubyen donn mwan en pti pe plis detay lo la.

Si apre ki nou'n vot pour sa Lalwa, i annan en dat fiks eleksyon ki'n ganny anonse, eski sa dan li menm li i pa pou kapab annan en sanzman ler letan pe ale li menm? Oubyen eski sa dat li menm i pou kapab sanze? E si pou kapab sanze, dan ki sirkonstans ki sa i kapab arive?

Mr Speaker, apre osi dan sa Lalwa li menm, en keksoz osi ki'n *fix* mon latansyon osi, i sa peryod letan kot sitwayen li menm li i kapab prosekit en Prezidan. Ouswa si en Prezidan in fer en keksoz, parey nou dir, ki'n kont Lalwa.

E mon rapel parey in ganny dir ler mon ti pe ekout Lasanble, mon krwar dan Lasanble avan ki nou ete la, Onorab Larue ti anmenn en Mosyon devan ki sa letan *SPPF* pa ti aksepte. Zot ti vot kont.

E dan li menm ozordi ler ou'n vwar ki manner ler

*manifesto* – nou pe koz lo *manifesto*. Lo bann promes ki LDS in fer. E nou'n vwar ki ozordi sa i form parti bann promes ki nou bezwen fer sir ki keksoz i ganny aranze drwat.

Bomaten mon'n tann zot koz lo plizyer promes zot santi kekfwa ki pa ankor ganny akonplir. Wi, Mr Speaker, nou bezwen fer sir ki tou zafer i bezwen konmans – nou lakaz i bezwen konmans prop.

Nou bezwen fer sir ki tou bann lezislasyon i annord. E si foudre vwar kote nou bezwen amande, pou fer sir ki i vin avek realite lavi ki nou pe viv ozordi ek letan ki nou ladan ozordi. Nou bezwen fer sir ki nou pou aranze kantmenm parfwa zot pou santi ki i pa popiler pour zot.

Se pour sa rezon ki ozordi nou pe vwar sa i en form parti sa bann travay ki pe ganny fer. E mwan mon ti a kontan i al pli lwen ki sa ankor. Ki nou regard Konstitisyon an zeneral li menm.

Akoz ozordi parey nou konnen, ki sa letan ki sa bann dokiman li menm sa dokiman ti ganny ekrir. E letan ozordi sa lepok ki nou, nou pe viv ladan, i annan en ta keksoz ki'n ganny sanze. En ta fason viv dimoun osi. E menm konmela nou pe tann osi pe

koz kantite letan ki en dimoun pe viv osi e konpare ek lontan.

Tousala mon krwar i bann konversasyon ki nou merit anmenn li en pti pe pli lwen ki sa. E la osi mon ti a kontan osi parey in ganny dir bomaten. Bann dimoun osi dan lakominote, zot bezwen osi kekfwa parfwa regard en pti pe pli pros sa bann dokiman.

E osi mon konnen ki i annan bann sizesyon osi ki ganny met devan avek bann reprezantan distrik, kot kekfwa la osi ler nou pe fer sa travay, i ava annan en pe plis lespas kot bann lezot konversasyon ek topik ankor i kapab leve.

Nou'n vwar *hate speech* osi 2 semenn pase kot in pas isi dan Lasanble. Sa mon krwar i osi bann travay ki pe moderniz nou Lalwa. E Sesel li menm i pe ganny gete ozordi dan lemond. Bokou dimoun pe swiv byen sa ki pe pase isi ozordi. E mon santi ki si pou annan keksoz ki pou mal. Seselwa la deor zot menm zot, zot pou kapab zize.

E osi bomaten mon'n – e depi yer nou pe tann Lopozisyon pe servi sa mo ki sa bann Lalwa li menm li zot pe – nou, nou pe fer li kekfwa nou pe al dan topik nou pou vol eleksyon.

Eski ozordi Lopozisyon zot menm zot, zot in fini

aksepté ki 2025 zot pe al perdi eleksyon? Eski zot pe osi war bann lezot rezon ozordi ki zot pe vwar pou demen pou zot pa aksepté rezilta?

Mwan mon krwar nou merit revwar sa Lalwa dan son fason profesyonnalizm. Nou bezwen met diferans politik de kote. Annou met nou pei avan tou. E si fodre vwar bann lezot lamannman kekfwá pour zot amelyor li en pti pe pou vwar dan en lot fason.

Me ankòr enn fwa, mon santi ki sa Lalwa li menm Mr Speaker, ek tou son bann lamannman ki mon'n swiv ladan, mon'n ganny sans swiv. Mon pa pe vwar okenn kontansyon ladan. E mon ava ekout *VP* ler i ava donn son *summing up* lo bann keksoz ki mon'n met devan. Mersi Mr Speaker.

### **MR SPEAKER**

Mersi Onorab. Laparol pour Onorab Loze.

### **HON JOHAN LOZE**

Mon a dir ou en gran mersi Mr Speaker pou donn mwan laparol ozordi bomaten. Mr Speaker, mon anvì konmans par poz Lasanble en kestyon pou etabli en premiz.

Dir mwan, zot rapel lekel ki'n deza mont lo televizyon pou eksplike ki mannyer pou vol eleksyon? I la anndan li. I annan zis en dimoun dan sa

Lasanble ki'n deza mont lo Televizyon Nasyonal, pas son lekor konman en eksper dan vol eleksyon e montre Seselwa tou ki mannyer eleksyon i ganny vole! Sa se Vis-Prezidan Ahmed Afif. Napa personn ankòr ki'n deza fer sa. En fe ki mon'n...

### **MR SPEAKER**

Onorab. Onorab. Mon pa konn fe ki ou pe fer referans avek. Me selman mon pe dir ou, pa fer lakizasyon lo bann zofisye ki la, lo bann Manm Elekte. Mon pa pou al fer lanket la dan bann fe. Me selman mon pa aksepté ki ou akiz dimoun. Mersi.

### **HON JOHAN LOZE**

Mersi Mr Speaker. I pa en lakizasyon letan ou dir keksoz ki en dimoun in fer.

Mon lot kestyon ki mon anvì demann Lasanble Mr Speaker. Letan nou ganny dir pou dir pas baton pe retournen konman en *deterrent* pangar en dimoun i touy Prezidan. E si en dimoun i sey touy Prezidan, *then* i a konnen poudir son Vis-Prezidan ki pou *takeover*.

Be konmsi, lamazorite ka lasasina lo bann Prezidan se bann Vis-Prezidan menm ki sey fer. Alors ki *deterrent* nou'n mete la? Eski – konmsi letan ou dir nou pou pas baton an ka lanmor Prezidan pou

*deterrent* en lasasina lo Prezidan.

Be ou pa pe ankouraz Vis-Prezidan fer lasasina li menm la. Be oli zot lozik konmsi? Zot vin avek en lozik fay ki kit en gran trou dan zot prop rezonnman. Be Mr Speaker, be mon pa pe konpran zot la mwan.

Bon, zot paret mwan zot byen ofanse par sa zafer vol eleksyon. Mon a *remind* zot enn de keksoz en. St Louis - e mon get byen mon rezilta eleksyon ler i anonse. Ti anons 14,155 pour Onorab Rachel Spiro, ti anons 12,081 pour son oponan. Ti ekrir. Mon ti lir mwan. Apre *somehow* ti vire. *Anyway*. Mon pa konnen ki manner sa in arive mwan.

(*laughter* and  
*Interruption*)

### **HON JOHAN LOZE**

Be selman, ti lo televizyon. Ti lo televizyon. Bon. I paret mwan zot pe *upset* Mr Speaker. La zot pe dir mwan koz lo eleksyon.

Beau Vallon. Beau Vallon, kot Prezidan Faure ti perdi par en bon *chunk*. Ki nou ti war? Depi son bwat vote, son talan vot, son stanp, son bann bwat administratif. Tou son dokiman ti ganny kit deryer dan Stasyon Vot laba.

E *somehow* sa in zis reste la. Ni Komisyon Eleksyon, ni

personn pa'n rapel. Zot konnen kwa? Mon defen granpapa in deza dir mwan "si ou war en boutikye i rann ou larzan an plis, konnen i en voler." In perdi kont son vol ki i pe vole li. Prezan in rann ou larzan an plis. I pa'n zanmen rann ou larzan an plis akoz i kontan ou.

Mr Speaker, konbyen distrik ki *somehow* pour premye fwa dan listwar Sesel an 2020, Komisyon Eleksyon pa ti konnen konbyen *ballot paper* pou anvoye? (La ou pa tande Mr Speaker la pe *disturb*? Zot pa *disturb* ler mwan mon koze. Napa problem. *Carry on*) Pare?

La Digue *helicopter* ti bezwen mont 2 fwa akoz nou annan en Komisyon Eleksyon ki pa ti konnen konbyen voter i annan La Digue. Zot pa konnen, en?

Anse Royale *ballot paper* ti mont en fwa. Port Glaud ti mont 2 fwa. Pointe Larue zot pa ti konnen konbyen *ballot paper* pou anmennen. So, ti *ok* menm tousala. Napa problem. In byen deroule Eleksyon 2020.

Selman mwan mon pou dir zot en keksoz. Prezidan Faure i en dimoun ki ti posed en grander lespri imans. Ti pour premye fwa ki ti pou annan pasasyon pouvwar Sesel, in prefere pa fer vilenn.

Pa fer okenn kontestasyon e al trankil.

Menm si i ti kler pour tou sa ki ti pe obzerve, kwa ki zot, zo ti'n fer? Ti kler! Tou Seselwa i konnen, i konpran zot in vol Eleksyon 2020! E zot pe re set kondisyon pour zot vol eleksyon ankor.

Be selman ou konnen kwa ki zot konnen pou diferan. Lemoman ki nou les zot konpran poudir Prezidan Patrick Herminie i pa pou vin zot marspye, i pou konteste zot bann vol!

Onorab Porice i asiz laba i konmans kriye “I revanz. Akoz zot kontan revanze.” Mon a dir zot en keksoz. Dizyenm Lamannman Konstitisyon. Sa osi zot bann preparasyon sa. Nou lo 11enm la. Zot rapel dizyenm? Met larme dan semen.

Aprè Onorab Arissol i dir nou “Be pa'n mete. Zanmen in mete. Pa ti zot plan mete so *far*.” Ou konnen kan zot pe mazin mete zot? Zour nou komans kontestasyon e protestasyon rezilta eleksyon ki zot pe *plan* vole! La! La ki nou pou war aköz zot in fer Dizyenm Lamannman Konstitisyon.

Lontan zot pe prepar zot lekor zot. Lontan zot pe prepar zot lekor zot. Mon'n deza dir zot dan sa Lasanble. Zot en group dimoun ki sers *unfair advantage*, toultan dan tou sa

ki zot fer. Toultan zot annan en demars pou annan zot ganny en lavantaz.

Ler nou anmenn en demars devan sa Lasanble, zot kale zot tou, les nou tou isi koze aköz nou ki'n anmenn Mosyon. Zot tou zot pou koz lo apre midi e Speaker i les zot san problem. Yer zot pa'n prepare pour zot prop *Bill*. Zot pa'n prepare. Zot pa'n pare pou koze. E Onorab Georges laba ti pe dir “be nou a vote.”

Lamannman Konstitisyonnel Sesel ki govern eleksyon, zot ti pou vote yer bomaten zot. E *subsequently to that*, ki'n arive? Forse lev lanmen. Tou dimoun pou lev lanmen.

Aküz sez vid. Mazorite sez vid. Napa naryen pou dir si zot pa vin reponn nou. Si nou, nou pa koze. Zot pa kapab defann zot prop propo zot. Zot sitan pa kapab defann e eksplike ki ler zot pe anvoy dimoun lir *Bill* li menm.

Wi, lir *Bill* ou menm aköz sa group ki sipoze defann sa *Bill* e anmenn devan ou e eksplik ou, zot pa'n fer zot resers. Zot pa pare e zot pa kapab. Mandan en Prezidan i termin ler nouvo Prezidan i ganny deklare.

Lemoman ki Prezidan Patrick Herminie i ganny deklare son viktwar, pran li ki Prezidan Ramkalawan in fini

ganny *dismissed*, in ganny pouse ek Seselwa. Ki annan pou fer la li? Ou al Semen Serret avan soley i leve.

Be lekel ki'n dir? Mon ki'n dir? En zonm i bezwen kapab gard son parol. Ou ki'n dir ler Seselwa i deside, ou pou pran avan soley leve. Ou pou pran ou lot parey ou ti vini, ou pou ale. Ki 30 zour? Ki preparasyon? Ki *handover*?

Zot, zot ti bezwen Prezidan Faure tyonbo zot lanmen, fer ta tar baba avek zot. Montre zot marse aköz zot pa ti pare pou gouvernen. 4 an pli tar zot *still* pa ankor pare pou gouvernen. Zot *still* bezwen kelken tyonbo zot lanmen fer ta tar baba avek zot.

Be nou nou'n demann zot pou tyonbo nou lanmen nou? Prezidan Patrick Herminie en zonm eksperyanse ki'n pare pou komans travay. Mon garanti zot. Mon garanti zot. Deklar eleksyon 4 er bomaten. Fer *swearing-in* 4 er en kar. 4 er 30 sa zonm i konmans travay!

*(laughter)*

### **HON JOHAN LOZE**

I pa bezwen zot pou foutkwa naryen ditou aköz zot en bann enkapab zot tou. Zot tou! Depi sa ki anler laba avek zot ta sez vid ki zot annan la anndan.

E si zot ti kapab, foutkwa zot pe mont Lasin pou al demann pardon sa ki zot in maltret kominis pandan 30 an? E ki dayer, nou pa'n ganny okenn proze ek li depi 2020. La zot bezwen al demann pardon pou ganny en pti proze la apre ki zot in maltret li.

Be si zot ti pe diriz byen, akfer zot bezwen taye monte al demann pardon? *Arh* donn nou 4 pti lakaz silvouple. Prezan enn pou asize la; “nou'n war rezilta Prezidan Lasin. Nou'n war bann proze anonse.” In bezwen al demann pardon apre ki'n pas 30 an maltret sa bann zans kominis.

Foutkwa zot bezwen monte al demann pardon. Tonm lo zot zenou. *Arh* Mr Kiba, *sorry* donn nou 2 dokter. Apre ki zot in kas nou Sistenm Lasante par pous sa bann Spesyalis Kiben. Selman zot krwar zot pou fer nou krwar zot annan konpetans, zot kapab diriz en pei?

Zot pe kas tou bann sistenm mazer dan en pei par zot inabilite, enkapasite pou dirize, prezan, kwa zot pou vin tyonbo nou anmenn fer ta tar baba ek nou parey Prezidan Faure ti fer ek zot? Be nou pa bezwen sa nou.

Lemoman eleksyon i deklare, Prezidan Patrick Herminie i ganny deklare son viktwar, al se zot! Semen Serret silvouple. In fini la. Ki

en mwan ankor, 30 zour? Mr Speaker lo kestyon akoz nou pe pran sa pozisyon? I senp. Prezidan in ganny elekte anba Konstitisyon aktyel e i annan pou li onor sa.

Zot pe koz lo kontra. Onor son kontra. Sa se son kontra. Parey i ete. Zot le fer sa bann sanzman ki zot le fer? Anvoy li. Fer li pran lefe zis apre eleksyon 2025. La nou a dakor.

Selman, tir zot 30 zour e tir pas baton! Zot pa kapab kont en keksoz apre anmennen zot menm. I pas baton sa. Lekel ki pou al fouraye pou al gete ler Prezidan in vin avek son sertifika medikal sorti *Abu Dhabi* ki deklar li *unfit to work*?

Lekel ki pou al fouye pou al gete sertifika medikal Prezidan sorti *Abu Dhabi* ki pe organiz son pas baton? I pas baton li. Apre zot a dir nou, nou pe donn fo lenformasyon. Kan zot pa kapab ni admet kwa ki zot in met ladan dan sa dokiman.

Zot le anlev iminite Prezidan? Be anlev li. Akfer zot bezwen met sa bann lapay dan snak? Akfer tou sa bann pikan dan *burger*? Konmdir Onorab Ferrari ti kontan dir nou lontan.

Lontan sak fwa ti vin en kontrovers, Onorab Ferrari i dir nou nou'n met pikan dan

*burger*. Be la i paret mwan zot in vin spesyalis pikan.

Mr Speaker, zot la, parey Onorab Cosgrow in dir zot bomaten. Zot in enkapab pou realiz okenn zot bann propo ki zot, zot in vin avek. Zot ti pou fer baz lo zil elwanye pour peser stasyonn bato pou al lapes. Zot rapel? *SNP*.

Mon konnen Vis-Prezidan Ahmed Afif pa pou konn sa Mr Speaker, akoz i pa ti dan *SNP* avek ou li. I ti *busy* dan *SPPF* sa bann letan. I pa pou konnen. In pa'n zanmen dan *SNP* akote ou li. Ou konn sa laverite ou.

Be *SNP*, zot ti pou fer baz lo zil pou stasyonn bato lapes pour peser al lapes konzele. Zot in mete baz lo zil? Perser pe al lapes?

### **MR SPEAKER**

Onorab, Onorab. I reste ou 2 minit. Si ou annan keksoz pou dir lo *Bill*, dir li silvouple.

*(laughter)*

### **JOHAN LOZE**

Mr Speaker, be mon pe koz lo – la ou pa tande pe *disturb* mwan dan mon 2 minit?

### **MR SPEAKER**

*Order!*

### **HON JOHAN LOZE**

Yes, Mr Speaker. Byen dir zot.

*(Interruption)*

**HON JOHAN LOZE**

Mr Speaker, zot pa'n nobou realiz okenn zot propo. La ozordi, zot pou vin *challenge* nou ler nou dir koz lo laz Sekirite Sosyal. E zot senm konfizyon parey zot labitid. Sak fwa nou koz lo laz Sekirite Sosyal, zot vire zot dir – Mr Speaker, be sa enn laba! Zot vin dir nou, nou pe koz lo *Pension Fund*.

Minis yer swar in tay lo televizyon in dir nou “be ki manner zot pou *fund?*” Sorti 2025. Pa pran 30 zour. Sorti ale, nou a montre ou ki manner nou fer anndan, Minis Hassan.

***(APPLAUSE)***

**HON JOHAN LOZE**

Akoz *Social Security* la, nou'n anmenn li depi 1978 ziske ozordi. Sa la, pour nou sa. Parey zot dir nou *SPPF*. Pour nou *SPPF* sa. Pa pour zot sa! Nou konpran aköz zot pa kapab *manage* li.

Ou konnen kwa ki pour zot? *TRNUC* i pour zot. In zot propo depi komansman ziske ozordi e zot *still* pa ankor kapab fer naryen avek! Ni sa ki pour zot, zot pa kapab *manage!* *TRNUC* zot in anmennen. In zot seval batay. Ziske ozordi zot pa kapab delivre lo naryen. Ni en

lapousyer. Zot sitan en..ka..pab!

E sa ki nou, nou pe dir Lepep Seselwa; Met konfyans dan Prezidan Patrick Herminie...

*(Interruption)*

**HON JOHAN LOZE**

...aköz problem ki nou ladan ozordi i annan pou fer avek mank leksperyans sa Prezidan, son lekip ek son 30 ekek sez vid ki i annan la anndan. 40 sez vid in donn zot, zot pa kapab fer naryen !

So met konfyans dan leksperyans en zonn ki kapab. E sa se Prezidan Patrick Herminie. Zot zour zot ganny pouse travay. Lannmen eleksyon, mont se zot. Al Semen Serret! Mersi Mr Speaker.

***(APPLAUSE)***

**MR SPEAKER**

Mersi Onorab.

*(Interruption)*

**HON JOHAN LOZE**

Pa tro fol laba deryer.

**MR SPEAKER**

Bon, in ariv ler pour en poz. Lasanble i a rebran 11 er. Mersi.

***(BREAK)***



**MR SPEAKER**

Zis pou reasir Onorab Esparon ek Onorab Samynadin ki pa ti la yer, ki'n notifiye mwan pou dir zot ti a kontan ganny zot non lo lalis. Mon'n azoute. Nou a kontinyen. Onorab Monthy, ou annan laparol.

**HON PHILIP MONTHY**

Mersi Mr Speaker. Mr Speaker, depi Oktob 2020 ler par en gran mazorite Seselwa ti met zot konfyans dan Parti LDS e swazir Prezidan Ramkalawan pou diriz nou pei, annan serten prensip ki sa nouvo Ladministrasyon i fonksyon lo la. E ki pe ganny enkilke dan lafason ki Sesel i ganny dirize e osi dan lafason ki Sesel pou kontinyelman ganny dirize a lavenir.

Sa bann prensip Mr Speaker, nou konn tre byen ki sa parti ki ti la avan pa'n zanmen a okenn moman akord en gran lenportans avek zot. E i pa'n zanmen neserman ganny enplimante dan lafason ki zot, zot ti diriz sa pei.

Ler Vis-Prezidan in prezant *Bill* yer bomaten, in nonm 2 sa bann prensip. E i enportan ki nou pep la deor i konpran ki sa ki nou pe fer la bomaten Mr Speaker. Ki sa ki nou pe fer i pa zis pou onor en promes eleksyon, oubyen pou onor en promes ki dan

*Manifesto LDS*. I bokou pli gran ki sa.

Akoz nou en parti ki pa mazin nou lekor avan. Ki pa mazin ki mannyer nou kapab ganny lavantaz politik lo lezot nou bann oponan, parey ti leka avan. Me nou o kontrer en parti ki met byennet pei e son pep aker.

Mr Speaker, ler Vis-Prezidan in koz lo ranforsi la demokrasi e asir latransparans e bonn gouvernans, se egzaktaman sa ki sa *Bill* pe fer ozordi. E sete egzaktaman lo sa bann prensip ki LDS in touzour prese ler nou ti ankor en parti dan Lopozisyon. E nou ozordi pe montre Lepep Seselwa ki nou pa zis en parti ki koze. Me nou osi enn ki kapab *walk the talk*.

Mr Speaker, sa legzersis ozordi kot nou war Konstitisyon pei ki Lalwa Siprenm en pei pe ganny amande, i en moman istorik. E i pa en legzersis ki Lepep i donn en parti politik a bonnavini. En mazorite absoli dan Lasanble Nasyonal ou ganny li ler en pep in demontre konfyans dan ou.

E ozordi Mr Speaker, nou pe asir zot ki sa konfyans ki zot in mete dan LDS, pe ganny servi byen. E pe ganny servi pou fer ki Sesel i ganny dirize dan en fason pli kler e transparan. E non pa parey

serten lo lot kote in sey fer zot krwar ki *LDS* pe fer konsolidasyon pouvwar atraver sa detrwa lamannman.

Mr Speaker, ki mannyer atraver sa bann lamannman nou pe fer konsolidasyon pouvwar, kan dat eleksyon pou dezormen deza fini ganny deside a lavans e vin dan latansyon tou dimoun?

E sa ki ranport sa eleksyon apre sa peryod tranzisyon, parey pe osi ganny determinen la parmi bann lamannman ki pe ganny proze, i ava akse pouvwar? Oli konsolidasyon pouvwar la Mr Speaker?

Eski ler nou pe dir avek pep Seselwa ki, dezormen se pa politisyen ki pou determinen kan eleksyon pou fer, ler i fer zot plezir oubyen ler i dan zot lavantaz politik, sa i apel konsolidasyon pouvwar?

Mr Speaker, Sesel pa en parti politik. E i pa pou zanmen ganny dirize konman en parti politik ankor. E sa ki nou pe fer la ozordi i pou asire ki olye annan en konsolidasyon pouvwar parey in ganny dir. Me ki o kontrer annan konsolidasyon la demokrasi, la transparans e bonn gouvrenans.

Mr Speaker, dan en lentervansyon mal prepare ki in sirprann nou lo sa kote, ki in menm sirprann son bann

Manm lo lot kote latab. E apre bomaten ou annan enn i vin dir nou esper zot koze pour nou ganny keksoz pour nou dir. Be i sanble mwan i lenvers. Zot ki esper nou koze pou ganny keksoz pou dir.

*(Interruption)*

### **HON PHILIP MONTHY**

Akoz yer sa kalite lentervansyon ki mon'n war zot *Leader* la lot kote in fer, be - Mr Speaker, in ganny dir dan sa - si mon kapab dekrir li konman en lentervansyon, ki - en mazavarou. Mon krwar wi.

Ki atraver sa bann lamannman ozordi, ki Prezidan pe vyol Konstitisyon e pe *extend* son manda 5 an ki in prevwar dan Konstitisyon.

Mr Speaker, sa i swa; akoz i pann lir sa *Bill*. Oubyen akoz in zis anvi vin konfiz e anbet pep Seselwa. Setou.

En Prezidan i ganny elekte pour en peryod 5 an oubyen 60 mwan. Sa peryod tranzisyon apre ki en Prezidan in ganny deklare viktorye par Komisyon Eleksyon e ler i sermante, i tonm dan son manda 5 an oubyen 60 mwan. Oli manda ki pe ganny prolonze sa Mr Speaker?

Sa pep Seselwa deor i bezwen konpran sa byen kler. Akoz i sanble mwan zot pe konmans sey konfiz sa pep la deor pou dir ki nou, nou pe vin

prolongz nou manda. E sa i fo! Seselwa fodre pa les zot ganny anbete avek sa bann kalite politik bonmarse.

Parey plizyer bann Onorab ki'n koz avan mwan, Mr Speaker, in fer resorti, sa peryod tranzisyon i tonm dan sa 5 an ki Konstitisyon in fer provizyon. Pa ni en zour an plis. Ni en zour an mwens.

En lot lamannman enportan Mr Speaker, ki pe ganny fer la ozordi se iminite Prezidan. Kot nou'n war Lartik 59 pe ganny tire. Bokou in ganny dir lo la dan lepase. E menm in annan *Private Members Bill* ki'n ganny anmennen pou sey retir sa iminite.

Mr Speaker, be ki nou ti war? Nou ti war en parti ki ti vot kont. E san en mazorite absolli sa letan, sa Lalwa pa ti pase. Ozordi mon pou demann zot en kestyon atraver ou Mr Speaker.

Sa bann Manm lo lot kote latab, dir pep Seselwa aköz zot ti vot kont sa *Private Members Bill*, ler Onorab Larue ti anmenn la dan sa Lasanble, dan 6enm Lasanble Mr Speaker!? Dir aköz. Eski zot ti pe sey kasyet serten ansyen dirizan?

Mr Speaker, pep Seselwa ti note sa. E se pour sa rezon ki an 2020 zot ti donn nou sa mazorite neser pou ki prezan nou kapab tir sa lartik.

Ler nou pe fer sa - e i enportan ankor pour pep Seselwa konnen Mr Speaker, ki premye Prezidan ki sa pou aplik pour li, se pa lot ki Prezidan Ramkalawan.

Kan i termin son manda - ler i pou termin son manda, sa ki annan okenn kes kont li, okenn ka koripsyon ki zot santi in fer. Zot kapab anmennen. Zot pou kapab anmennen e zot pou napa okenn limit letan pour zot fer li Mr Speaker. Aköz la anler *State House* nou annan en zonm ki annan prensip. Nou annan en zonm ki son lanmen i prop e ki napa naryen pour li kasyet.

Ler ou pep i fer ou konfyans e met ou dan sa pli o lofis dan pei. An retour ou bezwen donn garanti ou pep ki ou pou onor sa konfyans ki zot in met dan ou, e ki ou pou fer en travay ki zis e prop. E se sa ki nou pe fer la ozordi Mr Speaker.

Nou pe dir avek pep Seselwa ki Prezidan Ramkalawan i pou onor sa konfyans ki zot in demontre anver li e i pa bezwen kasyet anba okenn iminite, parey zot bann ansyen Prezidan ti fer.

Eski nou kapab dir menm keksoz lo serten sa bann ansyen Prezidan Mr Speaker? Larepons i malerezman non. Pep Seselwa

antye i konn rikord serten sa bann ansyen dirizan.

E i pa drol alors akoz la ozordi se nou dan *LDS* ki pe tir sa proteksyon ki zot ti pe zwir anba sa ansyen sistenm ki ti la. E i pa drol akoz ler Onorab Larue ti vini parey mon'n dir boner, zot, zot ti vot kont Mr Speaker.

La ozordi, zot ki bann pli bon dimoun. Nou ki pli move. Nou pe sey vol eleksyon. Sel keksoz ki zot annan pou dir. Ler ou vwar defet pe vini. Ler ou'n get ou – mon pa konnen si laserenad, si *motorcade*, si kwa ki zot ti fer Dimans. Ou vwar defet pe vini. Sel leskiz ki ou annan pou vin avek se ki *LDS* pou al vol eleksyon.

Mr Speaker, ozordi i en moman istorik dan nou listwar. I en moman istorik pour mwan personnelman, akoz mon war mwan la anndan pe ede ranforsi la demokrasi.

E pe dir avek pep Seselwa ki sa konfyans ki zot in met dan *LDS*, pa enn ki pe ganny abize. E pa enn ki pou zanmen ganny abize anba direksyon Prezidan Ramkalawan e anba direksyon en lot Prezidan *LDS* ki pou vini a lavenir. Me ki plito en konfyans ki nou pe servi li byen, osi lontan ki nou pou la.

Nou asir zot ki zanmen ankor pou arive dan sa pei kot en Prezidan i servi son

pouvwar pou dikte lavenir sa pep ek sa pei Mr Speaker.

Avek sa detrwa mo Mr Speaker, se avek lafyerte ki mon pou lev mon lanmen byen o, pou asire ki la demokrasi, latransparans e bonn gouvrenans i ganny ranforsi dan sa pei ki apel Sesel. Mersi Mr Speaker.

**(APPLAUSE)**

**MR SPEAKER**

Mersi Onorab. Laparol pour Onorab Bistoquet.

**HON ANNE BISTOQUET**

Mersi Mr Speaker. Bonzour tou mon bann koleg. Bonzour tou dimoun a lekout.

Mr Speaker, avan mon konmanse mon oule zis eklersi en pti keksoz ki'n ganny dir par en Manm Onorab lot kote latab. Mon pa vwar li la. Atraver ou Mr Speaker, Onorab Loze ti dir ki an 2020, *LDS – US* ti perdi eleksyon akoz *LDS* ti vol eleksyon.

Be mon le fer kler poudir sa letan mwan mon ti en aktivis lot kote. E *LDS* ti ganny sa eleksyon zisteman akoz *US* pa ti kapab vole sa eleksyon.

**(APPLAUSE)**

**HON ANNE BISTOQUET**

Akoz zot pa ti kapab al fer sa ki zot ti abitye fer. Akoz zot pa ti kapab pase granmaten kot

bann Stasyon vote pou fer sa ki zot abitye fer. Zot pa ti kapab met bann ta 25 pou met 3 anler *US*, apre tou anba ki ti pour *LDS* oubyen *SNP* parey zot ti abitye fer.

**(APPLAUSE)**

**HON ANNE BISTOQUET**

Mr Speaker, letan nou rantre dan Lasanble Nasyon, nou war en tenm tre enportan ki fer nou pran an-konsiderasyon travay ki nou vin fer koman *MNA* pour nou pei: '*Serving a modern Democracy*' oubyen 'O-servis en demokrasi Modern'.

I dan sa konteks ki mwan personnelman, mon regard travay nou Lasanble atraver bann Lalwa ki nou pase. Me pli enportan letan nou tous Lalwa Siprenm nou pei, savedir nou Konstitisyon.

I sa fason ki mon war sa 11enm lamannman: *LDS* in met son *manifesto* devan Lepep Seselwa. Seselwa in dakor avek e donn li en manda 5 an. Alor i bezwen gard promes ki i ti fer avek nou pep. Mon pa war okenn konplikasyon ladan.

Mr Speaker, Konstitisyon Larepublik Sesel i pa selman zis en dokiman legal, ki ankadre separasyon pouvwar e lobligasyon Gouvernman anver nou pei e sitwayen. Me i osi enkorpor nou bann valer,

laspirasyon, langazman en pep anver son patri. E en kontra sosyal ki enkli Gouvernman, sitwayen ek pei.

Letan ki nou pe fer sa 11enm Lamannman nou Konstitisyon, nou bezwen rekonnet levolisyon nou sosyete. Mr Speaker, sa seri lamannman i nesese dan en sosyete demokratik e i anliny avek *Manifesto LDS 2020*. *LDS* ti met son lentansyon lo papye. I pa bann propozisyon ki'n fek ganny envante. *Leader Lopoziyon* i bezwen realize ki se lo sa bann menm propozisyon ki *LDS* ti bat *US* dan eleksyon apre ki Lepep Seselwa ti rezet zot *manifesto*.

Napa tou sa bann zistwar vol eleksyon, konsolid pouvwar ek tou sa bann nanm ki *US* ozordi in vin rakonte. Keksoz i tre senp. Sesel i bezwen bouze pou kontinyen fer grandi son demokrasi dan tou modernite.

Mr Speaker, premyerman sa lamannman i kouver laspe otour iminite Prezidan. *LDS* atraver nou *manifesto*, nou'n donn sa langazman ki '*rule of law*', oubyen respe pour Lalwa i bezwen reste prensip kardinal nou demokrasi.

Personn pa par lao Lalwa e ki Lalwa i bezwen siprenm e aplik pour tou endividi san leksepsyon. Sa prensip i

bezwen reste o sant tou program politik e gouvènmantal.

Mr Speaker, pou retir iminite lo Prezidan apre ki in kit lofis, i anvoy en mesaz kler pour tou dimoun ki okip sa lofis pli o dan nou pei. Letan ou vin Prezidan, fodre ou fer sa ki byen anba Lalwa. *US* in rezet sa prensip, menm kan *LDS* ti anmenn en *Private Members Bill* par Onorab Larue.

Ozordi *LDS* i pe retir liminite lo Prezidan pou asire ki prensip rann kont e pran responsabilite ou aksyon dan en sistenm demokratik i ganny plis lenportans.

Sa i vedir ki servis piblik i en privez ki vin avek en responsabilite enorm. E nou Ladministrasyon pe ranforsi sa prensip rann kont. Nou ti a mazine ki Lopozisyon ti a dakor avek sa. Me o kontrè, zot kriy lasasen.

Eski sanmenm zot anvi vin o pouvwar? Pou fer sa ki zot anvi e retourn avek koripsyon koman en prensip ki pou ganny kouver anba liminite?

Dezyenman Mr Speaker, sa lamannman pe etabli en dat fiks pour eleksyon. Ankor enn fwa, sa i kouver en lot langazman lo paz 8 dan *manifesto LDS*. *LDS* in donn langazman Lepep ki dan son bann zefor pour ranforsi la

demokrasi, i pou kontinyen revwar nou Konstitisyon e bann Lalwa pour etabli en dat eleksyon. Pour ki napa okenn politisyen ki manipil eleksyon dan son lavantaz.

Aprezan zour lanons rezilta eleksyon pou donner, Komisyon Elektoral pou bezwen osi anons dat lot eleksyon ki pou fer dan 5 an. Rezon par deryer sa se pour etabli lasertitid ek stabilite.

Eleksyon pa merit ganny servi pour manipil azanda politik okenn endividi. Eski pa i byen ki tou dimoun e parti politik i konn dat eleksyon pou kapab prepar zot pli byen, olye zis fann rimer lo kan eleksyon pou ganny fer?

Lepep Seselwa in dir ki otan pouvwar i kapab ganny tire dan lanmen politisyen, tire. Be se egzaktman sa ki *LDS* pe fer. Lopozisyon i demande; si sa lamannman pou aplikab pour eleksyon 2025? Byen sir wi. Letan Konstitisyon i ganny amande, tou lezot Lalwa i bezwen tonm anliny avek Konstitisyon.

Eski zot in oubliye ki apre premye eleksyon an 1993, deswit zot ti fer Lamannman Konstitisyon pou sanz sistenm proporsyonnel dan Lasanble akoz zot ti per *UO* sa letan? Be zot bann lamannman pa ti ganny egzekite dan eleksyon 1998?

Alor, mon pa konpran ki zot largiman.

Sa i fer mwan mazine ki vre *US* zot memwar i vremen kourt. Ozordi se zot ki pe koz lo laliberte lekspresyon, demokrasi ek drwa imen. Kan nou annan Rapo *TRNUC* ki montre ki si sa i annan en parti politik ki pa devret koz lo sa bann size. Se zot menm.

Ozordi zot in vin pli rwayalis ki Lerwa, zis pou esey anbet Lepep Seselwa. Me erezman pour nou pei, Lepep Seselwa pe dir ki le 27 Septanm 2025, zot pou redonn Prezidan Ramkalawan ek *LDS* en lot manda 5 an.

**(APPLAUSE)**

**HON ANNE BISTOQUET**

Nou pou rezwenn zot le 28 Septanm, 2030!

Mr Speaker, dan sa lamannman, napa okenn sa zafer Prezidan Ramkalawan pe rod ankor en mwan dan lofis. Seselwa i bezwen konpran byen ki manda en Prezidan i reste 5 an. Sa peryod en mwan apre eleksyon i bezwen byen ganny konpran.

Si dan eleksyon i annan en dezyenm *round*, sa eleksyon i bezwen ganny fer pandan 14 zour apre premye eleksyon. Alor sa i ganny pran an konsiderasyon e i kit 2 semenn pour swa preparasyon

linogirasyon, oubyen tranzisyon.

E pour lenformasyon Onorab Lemiel atraver ou Mr Speaker, pou napa okenn linogirasyon ki pou ganny fer imedyatman letan ki Prezidan i ganny eleksyon an 2025. Akoz i pou deza Prezidan e alor i ava atann le 26 Oktob pou komans son dezyenm manda. Mon espere ki sa i byen kler prezan.

Mr Speaker, en lot lamannman ki pe ganny propoze i konsern rol Vis-Prezidan dan lenstans kot en Prezidan i mor, i malad, i demisyonnen, oubyen i ganny retire akoz in komet en lofans grav.

Ankor enn fwa, Lopozisyon i esey senm konfizyon kan keksoz i kler. Me annou ankor enn fwa repete kwa ki dan Lalwa;

Vis-Prezidan i lo tiket Prezidan dan en eleksyon. Savedir tou lede i ganny elekte. E se pour sa rezon ki Vis-Prezidan pa bezwen ganny laprouvasyon Lasanble parey Minis Prensipal, oubyen bann Minis.

Lamannman pe kontinyen rezet pas baton ki ti prensip *US*. Pas baton sete letan en Prezidan ki ti ankor byen, ti senpleman pas pouvwar avek son *VP* pour rezon politik. Sa nou'n rezete e nou kontinyelman rezet li.

Ozordi nou pe dir ki dan 2 lenstans, savedir kan i an deor kontrol sa Prezidan, VP i kontiny sa manda. Sa 2 lenstans i kler: Dan ka lanmor ek maladi. Eski en Prezidan pou anmenn lanmor lo li menm? Eski en Prezidan pou anmenn maladi lo son prop lekora? Larepons se, non.

Alor dan lenstans kot Prezidan i mor oubyen i malad, son VP i kontiny son manda. Sa i osi swiv menm prensip ki deza dan Konstitisyon, ki si en kandida prezidansyel i ranport eleksyon, me i mor avan sermantasyon, se VP ki ganny sermante koman Prezidan.

Me par kont, si en Prezidan i aret prezidans par en aksyon ki li i annan kontrol. La i pou annan nouvo eleksyon e VP pou zis pran lofis dan sa peryod kot eleksyon pe ganny organize. Sa 2 lenstans se letan en Prezidan i demisyonnen oubyen si i ganny retire pour lofans grav ki in komet anba Konstitisyon.

E nou pe menm al en pe pli lwen pou dir ki sa lofis i sitan enportan. E lefe ki ou pa'n montre respe, alor ou pa pou ganny drwa debout dan eleksyon ki ou menm ou lakoz. Alors Mr Speaker, ankor enn fwa, LDS pe moderniz nou demokrasi e nou pe anmenn sa pei dan bon direksyon. Mon

pa war kote problemn i ete. Mr Speaker, mon dernyen pwen i lo premye tranzisyon politik ki'n arive Sesel depi ladopsyon 3enm Konstitisyon Larepublik an Oktob 2020. E se sa Ladministrasyon ki'n konnen kwa ki meyer fason pou fer sa tranzisyon.

Wi, ti annan en tranzisyon trankil e kalm an 2020. Sa i vin apre ki Prezidan Ramkalawan ti verbalman agree e demann Mr Faure pou reste dan lofis pour en semenn pour fasilite sa tranzisyon.

Me tou sa letan, Prezidan Ramkalawan koman Prezidan Elekte pa ti kapab rantre dan lofis koman Prezidan, menm si i ti'n fini fer son inogirasyon. Senpleman akoz ti napa en Lalwa an plas ki kapab permet sa tranzisyon.

E la mon propoze pour nou Gouvernman al en pe pli lwen e etabli en *Transition Act* pou permet ankadre tou bann prosedir dan en kad legal. Prensip tranzisyon sete Mr Faure avek Mr Ramkalawan ki ti etabli, si zot pa konnen. Alors ozordi nou pe ranforsi li plis ankor, e met li dan son kad legal pour tou dimoun konnen.

Mr Speaker, sa 11enm Lamannman nou Konstitisyon i kouven langazman nou *manifesto* LDS. Sa se premyerman; fer Lepep Seselwa annan pouvwar e



dezyenmman, batir en pei pli meyer.

Avek sa Mr Speaker, mon pour donn tou mon sipor sa *Bill* e asire ki nou kontinyen kit Sesel avan tou e fer Sesel en pei pour tou son zanfan. Nou pa pou zanmen les tonbe. Mersi.

**(APPLAUSE)**

**MR SPEAKER**

Mersi Onorab. Laparol pour Onorab Audrey Vidot.

**HON AUDREY VIDOT**

Mersi Mr Speaker. Bonzour Mr Speaker. Vis-Prezidan ek ou delegasyon. Tou Manm Onorab. Tou dimoun ki a lekout. E en bonzour spesyal pour zabitan Roche Caiman.

Mr Speaker, ankor enn fwa mon oule dir en gran mersi tou nou bann dimoun aze ki'n deservi zot leksperyans ek lasazes. Pou gid e siport nou pep. Pour kontribisyon imans ki zot in fer pour lavansman nou sosyete. Mon swete ki zot in byen pas en zournen ki zot in selebre yer.

Mon le osi swet bann Kretyen. Espesyalman bann sorti dan Kominote Roche Caiman, Plaisance ek Les Mamelles bonn fet Ste Therese ki li osi in ganny selebre yer. Mon swet boner ek prosperite tou nou bann ansenyan ki zot

pe selebre zot Lasemenn Ansenyan.

Mr Speaker, mon pa pou kapab mank sa loportinite pou osi dir en gran mersi tou mon bann dimoun Roche Caiman e tou lezot endividi dan lezot distrik ki ti desann an gran group pou partisip dan nou gran *motorcade* ki ti fer dan rezyon nor, swivi par nou rankont dan *United Square*.

Se avek konviksyon e determinasyon ki *United Seychelles* anba direksyon Prezidan Patrick Herminie, nou debout for akote pep Seselwa pour ki 2025 nou ranport laviktwar pour en nouvo sours Sesel.

Mr Speaker, in ganny site ki nou Konstitisyon i sa dokiman enportan an term lidantite, krwayans e fason fer nou pep. Par kont, depi yer ler mon'n ekout prezantasyon sa 11enm Lamannman dan nou Konstitisyon, swivi komanter par bann Manm *LDS* dan deba, i kler ki sanzman ki zot pe anmennen pe al kont prensip ki'n ganny site dan nou Konstitisyon.

Nou Lasanble Nasyonal i bezwen fer byen atansyon ki ler en Ladministrasyon ki pe gouvern pei i oule anmenn nide ek fason fer bann gran pei dan nou Konstitisyon ouswa Lalwa. Nou pa al kont lidantite, krwayans e kiltir nou pep.

Mr Speaker, Vis-Prezidan yer in koz lo promes son Prezidan ek promes *manifesto* son parti politik, otour 11enm Lamannman dan nou Konstitisyon. Ki nou osi konsider sa dokiman enportan. E bann Manm LDS osi in kontiny zot lentervansyon dan menm laliny.

Be Mr Speaker, si i annan en group dimoun ki pa konsistan e senser dan parol ki zot prese, se pa lot ki Mr Prezidan John Wavel Charles Ramkalawan ek son bann Minis.

Seselwa ti konfye dan li ek son lekip pou pratik sa ki zot prese. Seselwa ti konfye dan zot pou fer pli byen. Me, ki zot in fer? 4 an in pase. Seselwa pa ankor war zot sitye dan sa slogan “Sesel pour tou son zanfana.”

4 an in pase, Seselwa pe viv ek regre pou fer LDS vin son Gouvernman. 4 an in pase, sa loportinite pou viv en lavi pli eze koman en Seselwa in fini les tonbe. 4 an in pase, sa ta promes eleksyon 2020 ek sa *manifesto* ki zot koz labous plen, pa pe adres sa lalis problem ki egziste dan pei ozordi anba zot governans.

Mr Speaker, yer serten komanter fer par Dirizan Lopoziyon ti ganny vwar koman pa prop. Be kot nou pou met lentansyon sa 11enm

lamannman ki devan nou Lasanble Nasyonal ozordi? Les mon a dir zot.

Sa lamannman pa prop e i pa onnet. Akoz promes *manifesto* i aplikab zis ler Prezidan Ramkalawan i fer plezir. E zot *timing* i montre zot malonnet. Lavey en lannen eleksyon, zot vin anmenn Lamannman Konstitisyon ki annan pou fer avek tranzisyon pouvwar apre en eleksyon.

Avek tou sa problem ki i annan dan pei pou adrese e olye regard dan byennet nou pep. Priyorite LDS se zve avek Lalwa nou Konstitisyon, zis pour zot vol eleksyon.

Mr Speaker, si rod fason pou vin vol eleksyon 2025 i en fason pour zot elev nou demokrasi. LDS i per! LDS i santi e konnen ki Seselwa in perdi konfyans dan zot. Mon bann frer ek ser Seselwa ki pe swiv deba depi yer e ozordi. LDS in *fail* zot. Sa bann promes eleksyon 2020 ki ti sipoze pe tous zot konman bann zanfana Sesel, ti zis bann propagann pou anbet zot.

Ler mon ti anmenn Mosyon pou koz pour nou bann dimoun aze. Ki LDS ti fer? Olye koz pour sa bann dimoun aze ki ti met konfyans dan zot pou vin reprezantan zot Lalwa, LDS ti kale. Zot ti prefere atak mon karakter e zot ti vot kont Mosyon.

Aprè, yer nou'n war zot pe al fer lipokrizi, al selebre *State House* avek bann dimoun aze.

Mr Speaker, tou sa koze ki *LDS* in koze lo son fason fer pli byen, se bann retorik ki zot in konplent e kritike Gouvernman *SPPF* ti fer.

Fer tou zot brode avek sa Lamannman Konstitisyon. Seselwa i konpran zot lenterpretasyon pas baton. Tou fason Seselwa nepli dormi boner. Seselwa i vwar zot dan gran kler. Zis parey zot mazin Onorab Wavel Woodcock atraver ou Mr Speaker, dan en protestasyon avek son plakar 'Pas baton, *out!*'

E li sa letan, personn pa ti trenn li pou al reponn keston dan kord gard parey bann dimoun Cascade pe ganny fer ozordi avek.

La zot ki pli konnen ki pli bon fason pou pas baton. Tou fason, Seselwa pa bliy zot parol ki ozordi zot pe sanz *tune* zis pou satisfè zot azanda personnel.

Atraver ou Mr Speaker, Vis-Prezidan Afif i konn byen ki mon pe dir, akòz se li ki ti debout dan *pick-up* dan son triko ek son *logo* "pil lo li" o bor son Prezidan, ek ou menm ou Mr Speaker dan en *pick-up*.

Ou konnen Mr Speaker, sa bann Minis dan Ladministrasyon *LDS* i kontinyen donn pep Seselwa

plis rezon pou mefye zot. Les mon a donn legzanp pou sipòrt mon komantr.

Prezidan Wavel Ramkalawan dan son Kanpany Eleksyon 2020 i ti dir ki i krwar dan fer desann pri lavi. I ti menm dir ek zournalis ki i krwar tou i posib.

Aprè, nou'n tann son prop Minis Finans avek zournalis dir ki pri lavi pa desann. I en term ki politisyen i servi ki'n kree pour i fer krwar poudir pri lavi i desann.

Dan kanpany eleksyon 2020, Prezidan ti koz lo nou Konstitisyon i garanti bokou drwa. Ler i ganny elekte konman Prezidan, dan enn son konferans lapres i dir dimoun napa drwa. Dan Konstitisyon napa okenn drwa.

Nou pa osi bliy Minis Derjacques ler i ti vin donn nou Lasanble en bilan lo logmantasyon larzan ki bann nouvo *allowance* li ek son bann koleg i resevwar. Letan Sesel ti lo son zenou. Aprè, son koleg Finans i vin sey fer nou krwar le kontrè.

Ou kapab konpran Mr Speaker, akòz Seselwa in fini perdi konfyans dan zot *LDS*? Prezan, Vis-Prezidan ek son bann Manm *LDS* a vin koz nou, Prezidan pe onor son promes dan *manifesto* atraver sa Lamannman Konstitisyon

ki devan nou Lasanble. Be pour ki zot pe pran Seselwa?

Ki arive ek parol Prezidan Ramkalawan, i avan soley *matin* i pou sorti *State House*? La prezan zot pe vin rod en mwan? Zot pa ankore prepare? En mwan pou prepare. Prepar kwa? Be pa zot ti'n fini desidat eleksyon? Zot ti'n merit fini prepare. Ler son manda i fini, i annan pou li zis *pack and go*, zis parey nou bann Manm Lasanble.

Mr Speaker, ki annan mal avek sa Konstitisyon ozordi ki zot bezwen vey lavey en eleksyon, olye oli lopinyon piblik ki'n ganny konsilte lo sa bann lamannman?

Ki annan pou les arive ler rezilta eleksyon i ganny anonse, les pep Seselwa vwar nouvo Prezidan antre dan lofis. Ki zot pe per? E nou konnen lekel ki pou antre. Se pa lot ki Prezidan Patrick Herminie ki pou antre.

**(APPLAUSE)**

*(laughter)*

**HON AUDREY VIDOT**

Mr Speaker, avek tou respe ki mon annan pou Prezidan Larepublik avek son tim *LDS*, Zot kontinyen dezapwent pep Seselwa.

Par kont, mon bezwen dir e zwenn Onorab Lemiel kot i ti dir yer e felisit Prezidan Faure

pour lafason ki i ti fer sa tranzisyon pouvwar. E sa ankore in ganny siporte par en Manm lo kote latab *LDS*.

Leskiz pou reste dan lofis e tarde san - ler Seselwa in fer son desizyon. Tou fason, Seselwa pe get zot tre pre. Seselwa in fini konmans konte Mr Speaker. Depi Sanmdi menm nou'n konmans konte pour 2025! Seselwa i konnen ki *US* i sel opsyon pour Sesel! Seselwa i konnen ki Prezidan Patrick Herminie i sel opsyon pour en meyer Sesel! Mersi Mr Speaker.

**(APPLAUSE)**

**MR SPEAKER**

Mersi Onorab. Laparol pour Onorab Labonte.

**HON ANDY LABONTE**

Mersi Mr Speaker. Bonzour Mr Speaker. Bonzour *VP* avek *panel*, tou koleg Onorab ek tou dimoun ki a lekout.

Mr Speaker, *comme d'habitude*, mon pou toultan kontinyen remersye Bondye akoz se li ki'n kree lesyel ek later. E anba sa soley, nou tou nou annan menm drwa e menm responsabilite.

Mr Speaker, ler nou pe koz lo nou Konstitisyon. Nou Konstitisyon i en keksoz ki vivan e vibran. Permet mwan Mr Speaker, pour mwan tir en pti ekstre dan *Essai* 33:22.

“Senyer i nou ziz. Senyer i nou sef. Senyer i nou Lerwa. Li menm ki pou sov nou.”

Mr Speaker, rezon mon dir sa set akoz Labib i premye keksoz ki nou swiv. E dezyenman se nou Konstitisyon.

Mr Speaker, ler mon pe get sa lamannman ki'n anmennen - sa 11enm lamannman, i en keksoz ki nou Gouvernman LDS pa'n zis predir oubyen reve. Me i en keksoz ki pep Seselwa ti okouran.

Akoz parey in ganny dir par plizyer mon bann koleg. Dan nou *manifesto* pour eleksyon 2020 paz 8 dezyenm paragaf, i koz lo dat eleksyon fiks.

E i dir “Gouvernman LDS pou kontinyelman revwar nou Konstitisyon ek nou Lalwa. Pou sa reponn a nou laspirasyon demokratik, nou pou al etabli dat eleksyon fiks pour tou lede Eleksyon Prezidansyel ek Lasanble Nasyonal pou etabli sertitid ek stabilite. Eleksyon pa dwatet ganny manipile pou servi lobzektif politik.”

Mr Speaker, i kler ki nou Gouvernman i pe tir sa pouvwar diktatir ki Gouvernman US oparavan ti annan dan zot disan SPPF. Kot menm mon fanmir i sorti dan sa Gouvernman Mr Speaker.

E sa Gouvernman US, zot in toultan la pou zot manipil dimoun. Servi dimoun apre zet lo kote. I zis parey enn nou aktivis ki zot byen konn li konman Pti Keddy.

Ki ozordi ler in sanz kote, in war poudir zot vreman bann dimoun ki zis servi dimoun, apre zet akote e maltrete. E zot pe *still* maltret li dan tou sort fason. Menm par zot Prezidan parti Mr Speaker.

*(Interruption)*

**HON ANDY LABONTE**

Sa i montre ou egzakteman ki mannyer zot ete e ki kalite latitid ki zot annan. Lalang. Mon tann Onorab Pillay. En LOTO ki'n dereye. Ki pe koz lo mansonz lo lalang Mr Speaker!

*(Interruption)*

**HON ANDY LABONTE**

Les mwan dir zot kote lalang sorti, Mr Speaker!

**MR SPEAKER**

*Order!*

**HON ANDY LABONTE**

Mon'n tann Onorab Loze!

**MR SPEAKER**

Order Onorab! Onorab. Onorab Pillay!

*(Interruption)*

**MR SPEAKER**

Ou! Ou ou'n enteronp Lasanble. Ou ki'n lev sa parol. Onorab! Onorab Labonte, mon pe demann ou –

**HON ANDY LABONTE**

Mersi Mr Speaker -

**MR SPEAKER**

...evit provokasyon e evit adres remark lo bann lezot Manm. Mersi.

**HON ANDY LABONTE**

Mr Speaker, atraver ou akoz se zot ki'n konmanse.

*(Interruption)*

**MR SPEAKER**

Ale, kontinyen ek ou diskour.

**HON ANDY LABONTE**

Onorab Loze bomaten, ou'n dir nou bann sez vid. Me ou, ou en barik. En barik vid.

*(Interruption)*

***(APPLAUSE)***

**HON ANDY LABONTE**

Onorab Spiro...

**MR SPEAKER**

Onorab! Onorab Labonte, ou a...

*(Interruption)*

**MR SPEAKER**

*Order!*

*(Interruption)*

**HON ANDY LABONTE**

Mersi Mr Speaker.

**MR SPEAKER**

Onorab Labonte, ekout mwan. Ekout mwan. Nou'n ganny ase avek lesanz parol.

**HON ANDY LABONTE**

Mr Speaker...

**MR SPEAKER**

Ou osi retourn lo *Bill* silvouple.

**HON ANDY LABONTE**

Mr Speaker, mon respekte. Me akoz mon zabitan La Rivière Anglaise i ofanse ler i tann zot pe maltret, sirtou mwan konman zot *MNA* ki zot in elekte.

***(APPLAUSE)***

**MR SPEAKER**

Mersi.

**HON ANDY LABONTE**

E li, li menm li sa bann Onorab ki pe maltret nou, zanmen zot in ganny eleksyon zot. Zanmen zot in debout dan en eleksyon.

***(APPLAUSE)***

*(Interruption)*

**MR SPEAKER**

*Order!*

**HON ANDY LABONTE**

Mon kapab koze Mr Speaker?

**MR SPEAKER**

Yes, kontinyen.

**HON ANDY LABONTE**

Mr Speaker, Onorab Spiro in dir tou lanmor i annan son siny. Wi, tou lanmor i annan son siny. Akoz ler mon pe ekout zot depi yer, e plizyer depi ler nou'n antre dan sa Lasanble. Zot zis ronfle zot gronnyen Mr Speaker.

*(Interruption)*

**HON ANDY LABONTE**

Yer Onorab Pillay – Onorab Pillay atraver ou Mr Speaker, in dir nou pe pas par laport deryer. Be si nou ti pe pas par laport deryer Mr Speaker...

*(Interruption)*

**MR SPEAKER**

Onorab. *Order! Order!* Onorab Loze, mon'n deza – mon'n deza averti ou pou aret enteronp Lasanble. Onorab – Onorab Loze mon pe demann ou sorti dan lasal!

***(APPLAUSE)***

**HON JOHAN LOZE**

Mr Speaker, selman ou bezwen kriy...

**MR SPEAKER**

Onorab. Onorab Loze, mon pe demann ou sorti dan lasal.

*(Interruption)*

**HON ANDY LABONTE**

Mersi Mr Speaker.

**MR SPEAKER**

Ou a kapab retournen apre midi.

**HON ANDY LABONTE**

Mr Speaker, avan ler ki i sorti...

**MR SPEAKER**

Onorab. Onorab Labonte, ou'n fer plizyer remark. Wi, mon da... *hold on!* Mon dakor sa bann Manm in dir sa bann keksoz. Be selman pa bezwen pas tou ou *speech* lo reponn sa bann parol. Kontinyen silvouple e retourn lo *Bill*. Mersi.

**HON ANDY LABONTE**

Mr Speaker, mon pou respekte ou akoz mon annan gran respe pour ou. Pa parey sa bann dimoun lo lot kote.

Me selman, mon'n reste trankil tou sa letan dan sa Lasanble. Be i nepli tan pour mwan reste trankil. Akoz mon dimoun i dir mwan fodre mon koze mon rann zot, zot repons

ler zot imilye mwan konman zot Manm ki'n ganny elekte dan sa Lasanble.

**MR SPEAKER**

Ok.

**HON ANDY LABONTE**

Mr Speaker, ou konnen ler nou pe get sa Lalwa. Sa Lalwa napa naryen ki pe dir lo vol eleksyon. E zot in koz lo vole Mr Speaker.

Mr Speaker, permet mwan, ler nou pe koz lo vole mon kapab eksplike. Ou konnen *Maison Du Peuple* ti ganny donner pour pep Seselwa. Lekel ki'n vol sa pep *Maison Du Peuple* Mr Speaker?

**(APPLAUSE)**

**HON ANDY LABONTE**

E menm, mon Sant La Rivière Anglaise ki dimoun i ankor pe lager. Zot in vann li avek en etranze.

*(Interruption)*

**HON ANDY LABONTE**

Mr Speaker, mon rezon ki mon pou siport sa lamannman i senp Mr Speaker. I senp. Akoz mon war ki nou pe tir iminite. Nou pe tir iminite ki si en Prezidan ler i dan sa lofis Mr Speaker, apard ki fikse dat eleksyon.

Me ler ou dan sa lofis, ou sipoze deservi ou

responsabilite dan fason ki merite. Me ou war klerman ki 3 an ki en Prezidan i sorti dan en lofis, *still* son iminite pa pou egziste. Ki vedir sa Prezidan pou kapab ganny anmennen kot i merite si in fer okenn aksyon ki mal.

E dezyenmman Mr Speaker, ler nou pe koz lo pas baton, Mr Speaker, i kler ki zot pe kontinyen koz mansonz. Se zot ki koz mansonz. Pep Seselwa i war e pep Seselwa i konnen poudir zot pe zis servi bann mannev pour zot zis met bann keksoz ki pa egziste.

Me si zot menm zot, zot lir Lalwa. E mwan mon pou kontinyen konsey bann dimoun silvouple, annou kontinyen reste azour bann devlopman ki pe deroule dan pei. Ler Manm Lasanble pe diskite, pa bezwen ekout sa bann dimoun. Me ekout keksoz. Pran en desizyon dapre zot lespri, dapre zot zizman.

Mr Speaker, pour mwan sa lamannman ki'n anmennen ozordi dan nou Konstitisyon, mon pou siport li, akoz mon war merit. E ankor enn fwa mon pou dir; i kler, i ti dan nou *manifesto*. E ozordi nou pe kontinyen akonplir nou bann promes ki nou'n fer avek pep Seselwa.

Mr Speaker, avek sa 2 mo, mon pou donn *full* sipor sa



lamannman nou Konstitisyon.  
Mersi Mr Speaker.

**(APPLAUSE)**

**MR SPEAKER**

Mersi. Mersi Onorab. Laparol  
pour Onorab Sandy Arissol.

**HON SANDY ARISSOL**

Mr Speaker bonn apre midi.  
Bonn apre midi *VP*. Pa ankore  
arive midi, be selman mon a  
fer li bonn apre midi parske  
deba in enteresan. E mon ti a  
kontan dir en bonzour spesyal  
pour tou bann dimoun aze ki  
ti *State House* yer. Mon ti a  
kontan remersi lorganizasyon  
ki'n organize. Ti deroul byen.

E mon kontan letan  
Onorab Audrey Vidot in  
*remind* nou poudir nou'n en  
bann ipokrit, parske nou'n  
asize avek nou bann dimoun  
aze *State House*. Mwan mon  
anvi dir li; sel lipokrizi se zot  
bann *US*, parske zot koz lo  
dinyite dimoun aze, ler pou  
siport dimoun aze, zot refize  
partisipe.

**(APPLAUSE)**

**HON SANDY ARISSOL**

Sa ki apel vre lipokrizi deryer  
Parti *US*. Mr Speaker, en  
keksoz fodre nou ganny kler  
ozordi, sel dimoun ki pou  
sermante an 2025 se pa lot ki  
Prezidan Wavel John Charles  
Ramkalawan.

**(APPLAUSE)**

**HON SANDY ARISSOL**

Napa personn sa Patrick  
Herminie ki mon tann zot pe  
ronfle lo la, la.

*(laughter)*

**HON SANDY ARISSOL**

Pa pe monte *State House*. Sa i  
kler! E zot, zot konnen zot Mr  
Speaker. Ou konnen ki  
mannyer zot konnen? Onorab  
Spiro in dir ek nou tou lanmor  
i annan en siny. Wi, i vre! Zot  
siny ki zot in vwar zot in vwar  
li dan zot *motorcade* ki zot in  
fer Sanmdi.

*(laughter)*

**HON SANDY ARISSOL**

Sa pli gro siny ki zot in vwar.  
Zot in konmans war nanm pe  
pase. Alor Onorab Pillay yer in  
vin dan nou Lasanble, semenn  
pase i dir mwan i ti donn en  
*verbal diarrhoea*. Li yer in fer  
ekstrenm. In al dan tou  
direksyon.

Akoz, zot in konmans  
war nanm dan sa *motorcade*  
fay, somad ki zot in fer  
Sanmdi. Alor prezan zot vini.  
Zot sel defans lo sa Proze  
Lalwa ou konnen kwa? Nou  
pou vol eleksyon 2025. Sel  
keksoz zot in koz lo la zot. Vol  
eleksyon 2025.

Be annou fer letour *d'horizon* Mr Speaker. Annou demann Lepep Seselwa lekel ki annan rikord vol eleksyon dan sa pei? Lekel ki annan rikord vyol sa pep isi Sesel? Lekel ki annan rikord vyol nou pei Sesel? Lekel ki'n fer nou pei sennyen dan sa pei? Lekel zot sa bann dimoun?

Sa bann ki lo sa kote latab. Zot in manz tou sort groser bannann, prezan zot war sa bann lapo bannann i ale avek nou. La zot la. Onorab Pillay avek son lekip.

Apré Onorab Pillay i vin dan nou Lasanble, ou konnen ki i dir ek nou lo sa Proze Lalwa? Zot ti perdi eleksyon akoz ti annan divizyon dan zot parti. E la ler i pe koze, napa divizyon dan zot parti.

Mr Speaker, mon a dir ou kot divizyon i ete. Ler nou pe koze la ozordi, Parti *US* pe rode lekel ki pou vin *VP*. Sa enn pe dir mwan. Lot pe dir mon'n deza Minis. Lot pe dir met mwan. Divizyon sa.

Dezyenmman Mr Speaker – divizyon. Nou pe koz divizyon. Lekel ki ti ganny elekte avek pli gran mazorite pou vin *Leader* Parti *US*? Onorab Pillay! Lekel ki ti fors li, ki ti *bully* li pou tir son partisipasyon Mr Speaker? Divizyon sa. Zot pa koz lo la ditou.

Tou dimoun ti kontan pour li konman Onorab

Sebastien Pillay. En zenn garson ki ti travay byen pou li vin *Party Leader US*. Tou son koleg i konnen. Zot tou zot reste trankil lo la. Apré i vini i dir ek nou napa divizyon dan son parti.

E la ozordi i kriye; “mansonz.” Divizyon dan zot parti egziste. Oli Simon Gill Mr Speaker? Oli Marie-Louise Potter Mr Speaker? Tou sa bann dimoun ki'n ede pou tal later pour sa bann zenn Onorab ozordi kapab asiz dan sa Lasanble Nasyonal.

Nou pa war zot. Sa ki apel divizyon dan *US* Mr Speaker, ki zot kanmi, zot onte pou koz lo la. Zot a vin donn nou leson lo Parti *LDS*. Mr Speaker, Onorab Pillay i koz zis *State House*. I anvi mont *State House*.

Be Onorab Pillay kot ti travay avan ti vin dan Lasanble Nasyonal, Pa i ti travay *State House* li? Lekel ki ti fer tir li *State House* pou met li dan Lasanble Nasyonal? Pa James Michel ki ti tir li.

Akoz James Michel ti tir li *State House* pou met li dan Lasanble Nasyonal? Mon pa ava dir. Mon a kit sa pour Lepep Seselwa ki pe swiv, ki pe ekoute. Zot ava ziz Onorab Pillay zot menm.

Mr Speaker, Onorab Wallace Cosgrow li i vin dan nou Lasanble i koz zis lo nou *manifesto*. Dimoun pe mor

lafen. *STC* keksoz i ser. Tou sa ki nou'n mete, *manifesto* pa pe marse.

Si i ti al fer son konmisyon kot *STC*, i ti pou vwar poudir i annan en progre. Sa pake disel R10 ki i ti koz lo la, la. I ti ava war poudir i annan en rediksyon lo la Mr Speaker.

Letan *PUC* i ofer R300 nou bann dimoun aze pou ed zot ek zot *bill*, i ti ava konnen Mr Speaker. Letan bann trwazyenm az i ganny li en logmantasyon lo son Sekirite Sosyal pou soulaz li dan sa moman difisil. I ti a konnen. Ou konnen ki i fer li? I koz zis lo *allowance* ledan. *Allowance* linet. *Allowance* lopital. Akoz li alors en zour, i bliye i ti gannyen li konman Minis li.

**(APPLAUSE)**

### **HON SANDY ARISSOL**

La prezan son leker i sitan fermal. Sitan fermal, i pa pe gannyen. Prezan dan Lasanble olye koz keksoz pozitiv, I vini i koz lo *allowance* ledan. Lo *allowance* linet, ki li i ti gannyen alors en zour.

E la ozordi in aret gannyen. Alor i pas son letan zis i plennyen, i plennyen ziska son lavwa in anwe ozordi e i demann nou leskiz lo la, Mr Speaker.

*(laughter)*

### **HON SANDY ARISSOL**

En lepok dan Lasanble Nasyonal, lo tou Proze Lalwa *US*, Onorab Pillay avek son lekip zot ti dir; “nou napa goute, zanfan pe mor lafen.” Finalman, personn pa'n mor lafen dan nou pei. Tou zanfan in kontinyelman ganny son goute.

Me enn zot Manm Lasanble Nasyonal ti vin dan nou Lasanble i ti dir; “byento son bann zanfan pou vin bann milyonner dan nou pei!” Lekl ki ti dir sa Mr Speaker? Si nou pep pe sitan mor lafen, kote ou zanfan i antre i vin milyonner dan sa pei, ki sa menm pep pe mor lafen?

Tousala i laba sa. I pa lo Lalwa Mr Speaker. Be selman yer Onorab Pillay, anvi konman en *Leader* ki pa'n prepar naryen. Zis in vini in al dan tou direksyon. E nou'n ekout li pour 1erdtan dan sa Lasanble Nasyonal.

La ozordi i vini i donn nou leson. Nou pa pe koz lo Lalwa. Me par kont in vini in dir ek nou; “pou annan vol dan eleksyon!” Se pour sa rezon, Mr Speaker, sel largiman zot in anmennen pou annan vol. Ou konnen akoz? Mon repet ankor pour dimoun tande.

Zot *motorcade* in en *failure*. Dimoun nepli siport zot. Dimoun nepli krwar dan zot konman sa parti ki'n la pandan 43 an ki'n fer Lepep

Seselwa soufer. Ozordi, zot rev zis *State House*. Zot koz zis voyaz *VIP*. Zot koz zis *caviar*. Zot pa pou war ankor. Zot a kontinyen reve.

Onorab Audrey i dir ek nou Wavel Ramkalawan pou *pack and go*. Manm Lasanble Nasyonal ki pre pou li *pack and go* la, la i laba. Onorab Audrey Vidot.

*(laughter)*

### **HON SANDY ARISSOL**

Ti ganny zis par 5 vot li. I bliye. Dan sa eleksyon ki pe vini i pou *pack and go* Mr Speaker.

Dir mwan kote dan sa Lalwa ki annan vol eleksyon letan nou koz en dat fiks pour eleksyon. Kote sa? Lanmerik i annan en dat fiks pour eleksyon tou le 4 an Mr Speaker.

Eleksyon i fer Novanm. Le 5 Novanm. Kan *handing over* i ganny fer? An *janvier* mon tande, egzaktaman midi edmi. *Ok?* Ozordi zot in arive per tou keksoz. Ziska tranzisyon zot per Mr Speaker.

*CEPS* fek fer zot nouvo eleksyon la. Zot ti ganny elekte an Out. Kan ki zot fer sa *process* tranzisyon? Kan ki lot in *take over* an Septanm? Ti napa lager. Parske sa i bann moman tranzisyon ki tou pei demokrasi modern i anvi pour son pei Mr Speaker. Se tou ki Prezidan Ramkalawan ek son

Gouvernman pe rode! Napa vol eleksyon ladan sa.

***(APPLAUSE)***

### **HON SANDY ARISSOL**

Dezyenmman Mr Speaker, en keksoz zot pa'n koz lo la. Liminite Prezidan ki'n ganny tire anba sa Proze Lalwa. Zot pa'n koz lo la ditou zot. Parske zot, zot ti protez zot bann politisyen.

Semenn pase dan *Penal Code* zot in dir ek nou, nou pe pas Lalwa pou protez politisyen. Be la ozordi ler nou pe tir proteksyon politisyen, ki zot fer zot, bann *MNA US* iresponsab ki la? Ki zot fer Mr Speaker zot? Zot reste trankil. Zot al dan tou direksyon. En lot i deklar son lekor konman en gro mazanbik epe.

*(laughter)*

### **HON SANDY ARISSOL**

Tousala zot fer dan nou Lasanble Nasyonal koman bann Manm iresponsab! Apre zot vini zot koz ek nou divizyon.

Divizyon letan Paul Ernesta ki devret asiz dan sa Lasanble Nasyonal i ganny war li deor pe kriy lasasen. En lot in pran son plas Mr Speaker.

Mon trwazyenm e mon dernyen pwen. Prezidan/Vis-Prezidan; oli problem letan

Mr Afif nou Vis-Prezidan i ganny elekte lo menm tiket avek Wavel John Charles Ramkalawan?

2 keksoz ki dimoun pa anvi dan lavi se maladi avek lanmor. Be i ariv en moman kot nou Prezidan, ki nou pa swete e i pa pou arive, i malad. Swa i mor. Eski i mal si son VP i kontiny son manda? Eski sa i vedir en pas baton deryer laport Mr Speaker? Eski i vedir en pas baton deryer rido? Zot in sitan fer keksoz deryer rido, Sebastien Pillay- Onorab Pillay ek son lekip, zot per tou keksoz.

I vini Onorab Pillay i dir ek nou dan Lasanble Nasyonal, nou pe pas sa zafer deryer rido. Selman sa diskisyon, sa 11<sup>th</sup> *Amendment* pe ganny pase dan Lasanble Nasyonal!

**(APPLAUSE)**

**HON SANDY ARISSOL**

Kot Lepep Seselwa pe swiv! Menm son bann fanmir ki reste Lostrali, *Canada*, Langleter pe swiv. Be oule dir mwan i annan trik dan zwe? I annan trik dan zwe Mr Speaker?

Napa okenn trik dan zwe. Zot in fini vwar defet pe vini 2025. Zot vin avek sa kart “nou pe vol eleksyon.” Alor, zot pe konmans kree zot *file* pou al avek Ankour zot. Apre zot pou

dir ek zot bann siporter “nou ti ek zot, zot rapel? Nou ti dir zot nou.”

Aprezan, zot in perdi. Zot in fini perdi. Depi 2020 zot in perdi. Zot pe sey lager sa detrwa *seat* ki la anndan. Nou, nou ava negosye dan lot eleksyon. Nou ava kit zot avek zis en *seat* dan Lasanble Nasyonal...

**(APPLAUSE)**

**HON SANDY ARISSOL**

...pour nou ganny en Manm pour nou koz avek. Larestan, nou pe al pran tou 2025 e nou pe al dir zot “*pack and go!*”

**(APPLAUSE)**

**HON SANDY ARISSOL**

Mr Speaker, mon ava fini lo sa pwen. Mon ava fini lo sa pwen. Letan zot pe dir “sel opsyon pour Sesel *US.*” Mon anvi dir avek zot “*mmm, mmm. Mmm, mmm.* Zot fay marmay!” Mersi Mr Speaker.

**(APPLAUSE)**

**MR SPEAKER**

Ale! Annou – Annou reste en pe kalm silvouple. Mersi Onorab. La...

*(Interruption)*

**MR SPEAKER**

Laparol pour Onorab Gabriel.

**HON CONRAD GABRIEL**

Mersi Mr Speaker. Mon a dir bonzour tou dimoun a lekout. Espesyalman bann zabitan La Pointe Larue. Mon swet – mon a pran lokazyon mon osi pou swet tou bann ansenyan ozordi en bon “Lazournen bann Ansenyan” osi byen bann dimoun aze yer.

Mr Speaker, 31 an pase i annan 2 parti. *SPPF*, *DP* ti zwenn ansanm pou fer adopte sa nouvo Konstitisyon pour Sesel. Annefe, sa ti nou trwazyenm Konstitisyon dan lespas 17 an. Ti en lafyerte nasyonal e menm rezyonal.

Sa letan ti annan en parti apele *UO* ki ti fer kanpany pou vot non dan *referendum*. Parey nou konnen, i ti *fail*.

*(Interruption)*

**MR SPEAKER**

Onorab – Onorab Pillay, aret enteronpe.

**HON CONRAD GABRIEL**

Zot ti *fail* e vot wi ti ranport apepre 75poursan. Ozordi sa menm parti ki dezormen in ganny rebatize *LDS*, pe *enjoy* tou pouvwar ki sa Konstitisyon in donner. Swa konman pouvwar prezidansyel, parlamanter, militer ou sekiriter.

Se sanmenm sa Konstitisyon ki serten zot bann dirizan sa letan ti apel li

en konstipasyon. Zis kontinyen *enjoy* li avan i tro tar. Depi 1993, sa i a fer nou 11enm lamannman sa Lalwa fondamantal.

Dan mon lespri Mr Speaker, pour mwan ler ou anmenn en lartik dan Konstitisyon pou aranze, se ki ou'n dekouver en serten lerer ou anomali dan enn de lartik, e ou ti a kontan korize.

Par egzanp, laplipar sa bann amannman ki ti ganny fer, ti napa gran kontrovers parey an '95 lo sitwayennte ler nou ti kree en pozisyon pour Vis-Prezidan '96. An 2011 ler nou ti kree pozisyon *Electoral Commission*. E ankor an Avril 2016 nou ti limit term Prezidan sorti 3 an pou vin 2 an. Larestan sete bann koreksyon.

Bokou bann pei diktatir sirtou dan Lafrik, bann dirizan otoriter ki per zot lonbraz, zot taye pou sanze e amann Konstitisyon pour zot reste lo pouvwar apre 2 ou 3 term apre kanmarad. Ouswa larme i bezwen fer koudeta.

Zot profit lafebles ek lafreyer zot pep. Mon vremen per ki nou prop Prezidan pe fer son lespri lo sa senaryo. Sa *Bill* ozordi se zis pou tat delo. Mon demann *Le Seigneur* pou fer li sanz son lespri si vremen i pe al lans li dan sa lavantir fou.

Gouvernman ti a kapab par egzanp propoz en

lamannman pou enkli en lartik lo “*The right to food security*” anba *Chapter 3*. E la sa kestryon mankman manze dan lemonn i lo azanda laplipar pei e lorganizasyon mondyal.

**(APPLAUSE)**

**HON CONRAD GABRIEL**

Sepandan, nou osi konnen ki pou bezwen pas atraver en *referendum*, ki mon krwar i pa dan lentere Gouvernman *LDS*.

La aprezan Mr Speaker, nou pe anbank sa pep lo en bato ki napa ni gouvernay, ni *skipper*. Eski sa bann Dirizan *LDS* zot naryen fer pou perdi letan dimoun koumsa? Depi kan ki dat eleksyon ti en problem dan listwar Sesel?

Mr Speaker, mon'n ekout *VP* atantivman kot in prezant rezon pou amann nou Konstitisyon dan sa moman aktyel ki nou ladan, zis avan en eleksyon enportan. In dir ki sa en seri lamannman ki neser pou amelyor serten laspe governans pei. E sa i istorik dan listwar Sesel.

I enportan note ki zot in pas plis ki 30 an dan Lopoziyon. E nou lo sa kote latab nou pou fer selman 5 an dan Lopoziyon...e rebran nou pei dan lanmen sa group diktater liberal ki pe fer tou pour nou parti disparet. Sa dernyen aktivite ki ti organize

par *United Seychelles* Onorab Sandy, le 28 Oktob 2024, in montre lemonn ki nou la pou reste e kontribye dan devlopman nou pei.

Mon profit lokazyon pou remersi tou dimoun ki ti partisip dan nou gran *motorcade*. Espesyalman mon bann zabitan Pointe Larue. Mon konvenki ki *LDS* in fini remarke ki zafer pa bon. Lontan mon pe dir ki atansyon dan plas nou disparet. Zot ki disparet e les pouvwar mont dan zot latet. Mr Speaker, sa ladministrasyon i enn ki'n vremen ipokrit.

Onorab Vidot ti anmenn en Mosyon ki lir koumsa; mon site; “Sa Lasanble pe demande ki Gouvernman i fer le neser pou nou bann dimoun aze viv dan plis dinyite.” Lo rikord Lasanble in ganny note ki tou *MNA* lot kote latab ti vot kont. Vre ou fo? Ki zot ti fer? Ti vot kont.

*(Interruption)*

**HON CONRAD GARBIEL**

Rezilta vot kont ti anmenn sa bann dimoun *State House* e sey anbet zot. Malerezman in tro tar. Seselwa nepli dormi boner.

Sa Mosyon in fer en lenpak pozitiv kot Gouvernman in bezwen sorti pou sey koriz sa fot. Mersi Onorab Vidot. Ou Mosyon in

*attend* son Legzekitiv, malgre zot pa oule admet e pa oule kanmi.

Zot annan en gro problem e zot menm ki responsab zot *downfall*. E sa se gras a bad *leadership* e *management* resours Leta.

Prezidan i oule melanz dan tou keksoz. 4 pti pye dibwa pou koupe Beau Vallon, Prezidan i bezwen *involved*. E legzanp i tro bokou. Menm tro bokou pou site. Nou pa kapab annan en Prezidan ki enterfer dan tou keksoz. Enposib Mr Speaker. Sa i pirman diktater e diktatir.

Nou lo sa kote latab nou konnen poudir sa Lamannman Konstitisyonnèl se pou donn Prezidan letan netway lofis e sey detri levidans o pli vit posib.

**(APPLAUSE)**

**HON CONRAD GABRIEL**

Nou konnen poudir sa set en mannev politik. Seselwa in dir li “pran sa meday ki in donn son lekor, e ale trankil.”

*En d’autres mots; “pack and go.”* Nou kestyonn lentansyon lamannman nou Konstitisyon. Sa Konstitisyon i bon mannyer i ete. E plizyer Onorab in deza dir sa. *LDS* pe servi son mazorite pou fer pase zot azanda politik.

Annou dir legzanp ki tou dimoun pe servi, ki Patrick

Herminie i vin Prezidan pei. Lekel ki pou protez li aköz i pou bezwen esper en mwan. Be sa kisisa sa?

*(Interruption)*

**HON CONRAD GABRIEL**

Onorab Lemiel yer in fer sa byen kler. Onorab Lemiel yer in fer sa byen kler e in demann serten kestyon pertinan kot menm finalman, Speaker in koup son *micro*. Kwa ki i kapab pase dan en mwan ki i pe espere pou diriz pei? Kwa ki pe fer zot taye ek sa 11enm lamannman? Lafreyer mon krwar.

Mr Speaker, *Election Act* i fer kler si eleksyon i al dan 2 *round*, Lalwa i fer kler ki pou arive. Kwa ki zot pe kasyet e kwa ki zot per? Lafreyer? Prezidan Faure ti ale byen trankil - en mous vole. Byen zantiman i ti sed laplas. Lemonn antye ti admir sa proses ki ti deroul dan lape.

Nou demann nou lekor kwa ki'n sanze en sel kou. Kan en proses ki ti pe marse byen, zis avan eleksyon ou le sanz li. Ankor enn fwa mon dir lafreyer.

Mon bann frer ek ser Seselwa, letan pe aprobe pour nou deside si vreman nou anvi sa kalite Gouvernman pou diriz sa pei. Swadizan i ti'n ganny en kales kase e i ti pe



vin met larzan dan pos kreol. Oli?

Mon 'G' parey Gabriel, nou annan bokou pou aprann. Bokou leson pou tire. Bokou analiz pou fer. Eski sa sanzman transformasyon pe benefisyè ou? Sa parti progresis US pou la pou demaske nenport ki kalite zwe sal ki zot pe vin avek zis avan eleksyon.

Laprev i la atraver sa *motorcade* kot Seselwa in demontre zot solidarite e dir ek sa Gouvernman ki *enough is enough*.

Savedir nou'n ganny ase nonsense, *nonstop*. Sa bann lamannman se zis en mannev pou sey derob sa pep aköz zot ti dir ki dan sa pei pou nepli annan ankör pas baton dan sa pei. Avan soley leve mon pou kit *State House*. Ou a krwar zot anvì fer pas baton retourn par deryer.

Prezidan in ganny elekte atraver en Konstitisyon kot bokou travay dir ti ganny mete ladan pou drafte li par bann profesyonnel dan nou pei. En sel kou zot oule deranz tou. En sel kou *LDS* in vin kas tou. Nou bezwen admet ki zot senpleman anvì vol sa eleksyon.

Sa voyaz pou napa 2 fwa *helicopter* mont La Digue. *Helicopter* pou mont *State House* direk, aköz ou pou

bezwen sorti konman rezilta i anonse.

Byensir ek zot *supermajority*, zot bann Lalwa lamannman pou pase san dout. Me atansyon son reperkisyon. Mon demann Bondye pou beni nou pti pei Sesel anvì ki i reste 360 zour pour lot eleksyon.

Depi kan en Prezidan i bezwen *enjoy* 1 mwan vakans *State House* avan i tir lekor? Mon termin lo sa not. En Onorab lot kote latab ti dir son Prezidan lanmen i prop.

Onorab, si son lanmen i prop, aköz i oule ankör 30 zour pou reste dan lofis? Les sa Konstitisyon trankil. Mersi.

**(APPLAUSE)**

**MR SPEAKER**

Mersi Onorab. Laparol pour Onorab Loizeau.

**HON NORBERT LOIZEAU**

Mersi Mr Speaker. Bonzour tou Manm e tou dimoun a lekout. Mr Speaker, mon'n vwar ki ou pe dir evit diskisyon, vin en pe pli kalm. Me mwan mon pou fer li a ou plezir pour mwan vin en pe pli kalm lo sa *Bill*.

Mr Speaker, mersi dabor pou ganny en sans pour mwan kapab pou permet mwan delibere lo sa lamannman Konstitisyonnel ozordi. E pou

konmanse Mr Speaker mon anvi fer sorti en keksoz.

Yer ler mon ti pe selebre ansanm ek nou bann dimoun aze sorti Bel Air e dan tou lezot distrik Mr Speaker. Dan mon pe parwaze pe koz ek bann dimoun aze, ti annan detrwa dimoun aze. Sirtou bann madanm ki kontan ler mon koz ek ou akoz zot kontan mon vin –

Pou zot konpran. Zot ti dir mwan; “Onorab, nou konfize ek Lopozisyon. Demen ler ou koze, sey fer en fason eksplik nou pli byen pour nou kapab konpran ki pe pase.”

I dir mwan Mr Speaker, “mon pa en *l’homme de loi* - en avoka.” Me selman mon anvi dir ek sa bann dimoun aze, mon pou sey mon mye pour mwan enterpret keksoz dan en fason pour zot konpran. Mon pou desann pli ba posib ek bann dimoun ki en pti pe pli ba pour zot kapab konpran.

Mr Speaker, mwan mon anvi siport sa lamannman Mr Speaker, parey Vis-Prezidan in dir yer, ki sa lamannman Konstitisyonnèl pou anmenn konsistans dan Lalwa Eleksyon.

Mr Speaker, mwan mon krwar ki *VP* in dir en keksoz enportan akoz sa i pou anmennen konsistans dan Lalwa Eleksyon.

Mr Speaker, mwan mon en dimoun mon pa krwar ki

set en politisyen swa Prezidan ou nenport, oubyen en parti politik ki determin dat kan eleksyon pou ganny fer dan en pei.

Mr Speaker, mwan mon pa krwar ladan. *Ok*. Sirtou Prezidan Mr Speaker – mon tann zot pe gronnyen ladan, ki pou pran sa pouvwar li menm ler i santi li annan en lavantaz pou li fer, parey ti arive plizyer lannen pase dan politik Sesel.

Mr Speaker, mon pe dir sa akoz fodre pa i arive ankor dan politik Sesel kot en parti politik i pran kontrol en eleksyon pour li ganny lavantaz politik lo la. Mr Speaker, sa mon krwar en keksoz ki enportan i fini dan nou pei Sesel.

Sa ki byen ek sa Lalwa Mr Speaker, i pe tir pouvwar dan lanmen Prezidan, ki byensir i en politisyen parey mon tann zot pe dir Mr Speaker. I pou tir pouvwar Mr Speaker. E sa en keksoz ki nou lontan nou ti pe demande. Mr Speaker, pour li pa abiz pouvwar.

Mr Speaker, nou rapel dan lepase toultan in arive sa, kot pouvwar par Prezidan in ganny abize. E nou'n vwar laplipar di tan dan pei Lafrik, toultan pouvwar in ganny abize.

Ozordi si ou trouve ki serten pei Lafrik e menm serten pei zil o bor nou, zot

sityasyon politik pa stab. Set akoz bann pouvwar ki bann dimoun par lao ki servi zot lavantaz pou zot kontinyen reste la ziska ler zot, zot anvi sorti.

Mr Speaker, sa lamannman i vremen kler ki mwan mon pou fer sorti zis en pwen ki'n enteres mwan plis. Sa pwen i enteres mwan plis akoz depi ler mon ti form parti *SNP* sa letan, nou'n koz longman lo la.

Mr Speaker, mon pe koz ou plis ki 20 an pase. Ou rapel. Ou osi ou ti la ansanm avek nou. E ozordi mon fyer ki sa rev ki nou ti a pe reve ansanm avek ou Mr Speaker, ozordi i a vin vre.

Sa ki pli enteresan Mr Speaker, se ki mwan mon fyer ozordi se ki se ou ki Speaker ki pe diriz sa sesyon lo sa lamannman vremen enportan ki ozordi pe pase dan Lasanble.

Akoz ou'n la dan politik avek nou pou lager pour ki la demokrasi i rennyen dan nou pei. Alors, mon fyer e mon kontan ou ki la dan Chair ozordi. Pa en lot dimoun ki pou diriz sa sesyon ozordi.

Mr Speaker, dat fiks pour en eleksyon, mwan *à mon avis* mon krwar i tre enportan. I tre enportan Mr Speaker, akoz sa i pou fer sir ki tou dimoun – tou dimoun ki annan lentansyon partisip dan en

eleksyon, pa pou war zot dan dout. Kan pou fer. Pou fer la. Pa pou fer la. Mr Speaker, zot pa pou war zot dan dout.

Keksoz Mr Speaker aprezan ek sa lamannman, i pou fer keksoz *black and white*. E sa i a ede pour tou parti politik, nenport ki dimoun kapab prepar zot. Prepar zot annavans, akoz tou keksoz pou kler. Tou keksoz pou kler e i pou ganny pibliye. E pou napa okenn konfizyon parmi popilasyon e bann lezot dimoun ki pou partisip.

Mr Speaker, nou'n tande par Lopozisyon ki nou pe anmenn en lamannman ki napa laspirasyon Lepep Seselwa ladan. Mr Speaker, ozordi Lopozisyon, napa naryen ki annan laspirasyon Lepep Seselwa ladan. Tou keksoz pa byen. Zis zot ki ti fer byen.

Mr Speaker, la i fer mwan rapel, malgre ki mon pou sorti en pti gin lo lamannman, ki mon pou retournen apre. I fer mwan rapel kot ti annan en moman ti annan en ta keksoz ki ti ganny met devan par Gouvernman presedan – *SPUP/SPPF/US* Mr Speaker, ki ti sipoze annan laspirasyon Lepep Seselwa ladan.

Mr Speaker, me selman naryen pa'n marse. E la i fer mwan mazin laspirasyon 2013 pour bann zenn. Gro liv Mr Speaker. Laspirasyon tro

bokou ladan. Ozordi – dernyen fwa mon pe koz ek Prezidan, mon dir ek Prezidan “be ti annan sa Laspirasyon 2013, i ankor dan *shelf State House*?” Prezidan i dir mwan i pa war.

(laughter)

### **HON NORBERT LOIZEAU**

Kot sa liv in ale, mon pa konpran. E la i fer mwan mazin en parol ler mon ti pe koz ek Onorab Anne Bistoquet, ti annan en moman tou bann *files* ti ganny anvoye *State House Annex* anba lot kote pou brile. Zot ti menm met dife dan sa batiman Mr Speaker, pour zot bril sa bann dokiman.

E ler mon tann dokiman brile Mr Speaker, i fer mwan mazin sa, akoz mwan mon reste zis lanmenm la Bel Air e mon rapel tre byen kan sa ti arive.

Mr Speaker, Aspirasyon Vizyon 2020 ti bann keksoz ki ti sipoze annan laspirasyon Lepep Seselwa ladan. E ti annan en dimoun ki ti ganny nomenen avek en bidze enorm pour zot, pour li kree –

Pour tou dimoun ki'n war vizyon 2020 kot Sesel pou al *beyond 2000*. Gro, gro *flat screen* Mr Speaker.

(laughter)

### **HON NORBERT LOIZEAU**

Naryen pa'n arive. Zot rapel? Mon ti al vizite mwan. Ti annan apepre en 40 ekek gro *flat screen* ki ti pe prezante. Apre legzibisyon Mr Speaker, *flatscreen* ti perdi...

(laughter)

### **HON NORBERT LOIZEAU**

Setaki ti ganny en *flat screen*. Vizyon pou anmenn Sesel *beyond 2000* Mr Speaker.

Dernyen fwa ankor, mon ti pe koz ek VP. VP i rapel. Mon dir “VP, be sa *file* i la Vizyon 2020?” VP i dir mwan napa.

(laughter)

### **HON NORBERT LOIZEAU**

Dapre konpran dapre Onorab Anne Bistoquet, sa ti ganny brile mon rapel dan *Annex Maison Du Peuple*. Mr Speaker, ti napa naryen ki'n aspir sa pep pandan sa letan.

E la Mr Speaker, pour mwan retourn lo lamannman, i fer mwan mazin en keksoz ki ti arive Mr Speaker. Ler mon rapel, zenn garson pe frekante dan politik *UO* dan eleksyon mon krwar '94. En eleksyon ki ti fer, kot nou ti ganny nou anviron 8 a 9poursan.

E sa ti permet nou Mr Speaker, *UO*, pou antre ek en Manm dan Lasanble. E sa Manm ki ti antre i Prezidan Ramkalawan. Sa Prezidan ki anmenn en gro anmer dan zot

labous e ki zot pou mars ek sa gro anmer ziska 2 mil zanmen ler zot antre dan Gouvernman Mr Speaker. Se li ki ti antre. E ki ti arive Mr Speaker? An - mon pa pou tro mazine. An 96 Mr Speaker. An 1996, parti *SPUP/SPPF* ki ozordi i *US*. Mr Speaker, ti sanz sa lamannman - ti fer en lamannman pour ki i sorti kot i ete 8 a 9, pou mont 10poursan Mr Speaker.

E zot ti vote pou sanz sa Mr Speaker. Akoz? Akoz zot ti panse ki Lopoziyon pe monte. Alors met en barenm 10poursan ki en fason i ava anpes nou ganny plis Manm. E Mr Speaker, sa pa ti anpes nou. Nou ti ale nou ti ganny 11 Manm ziska dernyenrer nou'n ranport laviktwar.

E Mr Speaker, e mwan ler mon get tousala. Eski sa ler zot ti fer, i ti annan laspirasyon Lepep Seselwa ladan? E pourtan Mr Speaker, sa menm *Leader* ki pou debout konman kandida prezidansyel pour *US*, i ti dan Lasanble li Mr Speaker. I ti vote pou fer sir ki tou sa bann pti parti i ganny peze anba, akoz zot ti krwar ki zot pou toultan reste anler.

E Mr Speaker, keksoz in sanze ozordi. Sa ki anler in desann. E sa ki anba in monte.

E nou ler nou monte Mr Speaker, nou mont *for good* nou. Nou pa pe desann. Tire

dan zot lespri. Desann, *no way*.

Mr Speaker, nou, nou Gouvernman i enportan ki Lepep Seselwa ater ek sa bann dimoun aze i konpran ki nou, nou Gouvernman ler nou pas en Lalwa Mr Speaker - ler nou amann en Lalwa, nou fer sir ki i vin dan zentere Lepep Seselwa. I form parti laspirasyon tou Seselwa Mr Speaker. Nou konman en Gouvernman. E se sa ki mon fer.

E la Mr Speaker dan mon pe koz lo la, i fer mwan mazin en keksoz. I fer mwan mazin *Public Order Act*. Zot rapel? *VP* ti rapel. Nou ti dan 6enm Lasanble ansanm. Mr Speaker, lekel ki ti vot kont en Lalwa enportan ki nou ti anvi larg lanmen Seselwa Mr Speaker? Zot ki ti vot kont Mr Speaker. *Case* ti bezwen al Ankour.

Onorab Pillay i rapel byen Mr Speaker. Zot ti vot kont. Ozordi Mr Speaker, sa menm Onorab *Leader* Lopoziyon ek son bann Manm, pe koz otreman. Ozordi se zot ki pe benefisyé.

Mr Speaker ler nou ti dan Lopoziyon nou, ler nou ti pe fer sa bann keksoz, pas sa bann bon Lalwa. Nou pa ti pe fer li zis pour nou, parey toultan mon dir. Nou ti pe fer li pour tou dimoun. Pour zot osi ler zot vin dan Lopoziyon.

E ozordi zot pe servi sa byen Mr Speaker. Lekel ki pe anpes zot fer *rally* Mr Speaker?

**MR SPEAKER**

I reste ou 1 minit Onorab, konklir silvouple.

**HON NORBERT LOIZEAU**

Wi Mr Speaker, mon pe al terminen. Lekel ki pe anpes zot rasanble? Personn Mr Speaker.

Ozordi, zot telman napa keksoz pou dir, zot koz zis mansonz Mr Speaker, an terminan. Zot koz lo vwayaz Prezidan. Kan zot *Leader* ler ti ansarz *APDAR* i ti monte desann. Pou al negosye *methadone* i ti ale Mr Speaker. Tousala zot ti fer Mr Speaker. E napa keksoz ou pa dir.

Ozordi Mr Speaker, dan zot pe reve - dan zot *Leader* pe reve pou li mont *State House* 2025 - mwan mon dir 2mil zanmen. Mr Speaker, i reve ki en dimoun pe tir son zong ek en tenay.

*(laughter)*

**HON NORBERT LOIZEAU**

Mansonz Mr Speaker. Mansonz. Bann mansonz ki zis fabrike Mr Speaker, zis pou zot tourn lespri Lepep Seselwa. Mr Speaker...

**MR SPEAKER**

Onorab, terminen.

**HON NORBERT LOIZEAU**

Wi, mon a terminen Mr Speaker. Mr Speaker, ozordi zot dir nou pe vol eleksyon. An terminan mon annan zis en dernyen pwen.

Zot dir nou pou vol eleksyon ansanm avek Komisyon Eleksyon. Selman zot dir zot pou gannnen. Ki mannyer zot dir nou pou vole, selman zot pou gannnen? Mr Speaker, an terminan...

**MR SPEAKER**

Mersi. Mersi Onorab. Mersi. Bon, in ariv ler pour nou pran poz. Avan -avan nou ale, mon pou zis repas lo mon lalis. I annan 7 Manm ki reste. Lo sa kote i annan Onorab Aglae ek Onorab Gill. Lo kote isi i annan Onorab Woodcock, Larue, Georges, Esparon e Samynadin.

Si napa personn ki pou lev lanmen ankor, mon a ferm mon lalis la. E nou a termin avek sa bann entervansyon apre poz dezennen. Mersi bokou. Lasanble a rezwenn 2 er.

***(BREAK)***

**MR SPEAKER**

Bonn apre midi tou dimoun. Bon, nou a rebran. Mon krwar sa i ava nou dernyen *round* entervansyon. Laparol pour Onorab Wavel Woodcock.

**HON WAVEL WOODCOCK**

Mersi Mr Speaker. Mr Speaker, dan sa 2 zour, nou konman bann Manm Lasanble, nou pe dil avek en *Bill* vreman enportan.

Annefe, nou pe dil avek 11enm lamannman dan nou Konstitisyon avek bi pou ranforsi nou demokrasi e pou ranforsi osi bonn gouvènanans. E pou osi ede garanti bonn tranzisyon pour tou lede eleksyon. Eleksyon Lasanble Nasyonal. E sirtou Eleksyon Prezidansyel.

E enn bann lobzektif sa *Bill* se pour nou anpese ki bann labi osi ki'n arive dan lepase, dan nou prosesis elektoral, i repet ankor.

Mr Speaker, mon pou koz en pti pe lo enn de – lo plizyer bann lamannman. Bann lamannman kle dan sa *Bill*. Pli enportan Mr Speaker, lo sa size dat fiks pour Eleksyon Prezidansyel.

Mr Speaker, lamannman pe fer ki, dezormen apre ki sa *Bill* ki pase, tou Seselwa pou konnen ki dat eleksyon ki pou ganny fikse. I pou tir bann *uncertainty* kot parey nou'n vwar dan lepase *case* tipik, ler Mr Michel ti *call for early election* an 2015. Son term ti sipoze fini an 2016 e i ti santi poudir i pe perdi popilarite. E sa ti montre klerman, akoz an 2016 nou ti ranport laviktwar 15 lo 10 dan Eleksyon

Lasanble Nasyonal. E alor i ti per 2016. I ti *call* eleksyon pli boner Mr Speaker, pou donn li en lavantaz politik.

E ozordi, nou pe retir sa lavantaz ki en Prezidan – sa bann Prezidan dan lepase ti annan. E si vreman nou Prezidan aktyel ti anvi konsolid son pouvwar. *Then* i ti ava kit sa parey i ete. Li osi i ti ava annan sa lavantaz dan le fitir pour son term la avek son lot term ki pou gannyen an 2025 osi Mr Speaker.

Me li - nou, nou krwar dan “*the rule of law.*” Nou krwar nou bezwen fer keksoz dan en fason ki tou dimoun i annan menm lavantaz.

Mr Speaker, eleksyon pour Prezidan pou ganny fer dan 5 semenn avan lafen term - son term sa Prezidan. E sa pou permet donn letan pour en dezyenm *round* eleksyon an ka i arive.

Mr Speaker, in annan legzanp dan lepase pour premye fwa ti arive dan nou listwar apre retour miltiparti kot Mr Speaker, an 2015 Mr Speaker, apre ki Prezidan Michel ti *call for early election*. Ki ti arive Mr Speaker? Eleksyon ti al dan en dezyenm *round*.

Eleksyon ti al dan en dezyenm *round* ki ti sok Parti Lepep sa letan, apre ki in vin *US*. Zot pa ti pe ekspekte. Zot ti'n fini *print* zot triko “*first*

*round knockout.*” Triko “*First Round Knockout*” ti ganny zete dan bannann Mr Speaker, aköz nou ti al dan dezyenm *round*. E avan 2016 zot ti anmas en bate kondire dan Eleksyon Lasanble Nasyonal.

E, Mr Michel ti *resign* an 2016 e i ti pas baton. I ti pas baton avek Prezidan Faure. Mr Speaker, en keksoz ki, Mr Speaker, sa Lalwa i pou anpese arive ankor Mr Speaker. Lafason ki zot ti fer li ler Prezidan ti kapab *resign*.

E deswit apre *resign*, sa lot dimoun i vini i kontiny son term a plen tan. E sa en keksoz ki sa Lalwa pe dil avek pou anpes arive ankor, parey zot in fer a de repriz ki mon pou bouz lo la en pti pe pli longman pli tar.

So eleksyon Lasanble ek Prezidansyel pou ganny fer ansanm. Sa pou ede koup depans dan plas fer 2 eleksyon ki 2 diferan kou. Ou fer tou lede ansanm. *Economies of scale obviously*. I pou kout mwens pou fer 2 eleksyon ansanm ki pou fer 2 eleksyon separe.

Pli enportan Mr Speaker, se sa Lartik 52 a ki pe ganny *repeal* ki ti permet Prezidan *resign* e demann nouvo eleksyon Mr Speaker. Sa pe ganny retire. Aköz nou tou nou konnen - mon pou al en pe plis detay lo la kot en Prezidan i *resign*, apre deswit

apre i re debout dan prosen eleksyon Mr Speaker.

I zis parey en zenn garson i zwenn en fiy. I demann sa fiy maryaz. Apre ki in fini marye avek sa fiy, i divors sa fiy, apre i redemann sa fiy maryaz ankor Mr Speaker.

Sa bann kalite zafer Mr Speaker, nou pe met en lafen avek aköz i pa fer en sou sans. Sa ti lozik lafason ki *United Seychelles/Parti Lepep/SPUP* ti fer keksoz dan lepase.

Mr Speaker, sa Prezidan *once* i *resign* i pa pou kapab rod en manda deswit apre Mr Speaker. Si i *resign*, i bezwen esper eleksyon i ganny fer. Nouvo Prezidan i ganny elekte e li fodre 5 an apre ler term sa Prezidan i fini ki la i kapab re debout ankor konman en kandida.

Sa pou anpes zot bann stratezi lontan pou tat delo, *resign* boner pou fer ki eleksyon i vin pli boner, aköz zot santi zot pe perdi popilarite.

Ouswa zot le tat delo, parey Onorab – enn nou koleg in koz lo la oparavan kot ennler zot le zis *gage* en pe zot sipor. Ouswa ler zot *at a peak of en popularity* zot per pangar zot popilarite pou desann. Zot *resign* pou fer ki i annan eleksyon pli boner.

Mr Speaker, parey mon pe dir, *by repealing* sa lartik i



pou fer ki Prezidan pa pou kapab *call for an election* atraver *resignation* Mr Speaker. Mr Speaker, i annan en kantite mannev zot in servi dan lefase. Menm nou ler nou ti dan sizyenm Lasanble.

La zot pe zwe bon boug akoz zot pa ti fye sa Lasanble. Ouswa zot ti le sey zot sans pli boner. Mr Faure ti dizourd Lasanble an 2020. Nou pa ti fini nou manda 5 an nou. Nou ti fer zis 4 an Mr Speaker. Akoz? Zot ti krwar i pou dan zot lavantaz Me annefe, ti fer zot plis ditor ki dibyen Mr Speaker.

So, Mr Speaker, ler pou annan en *vacancy* dan lofis, *let's say* parey en Prezidan i *resign* ouswa i ganny retire akoz *misconduct* – en *gross misconduct* parey nou'n war dan lefase, kot larzan i ganny vole. I annan koripsyon. Naryen pa ti arive avek sa bann Prezidan.

Be si en Prezidan i decide fer sa bann keksoz, i pou annan *grounds* pou retir en Prezidan for *gross misconduct*. Ki dan lefase sa ou pa ti kapab tous en Prezidan ditou Mr Speaker.

So, an ka lanmor osi ouswa an ka problemn lasante grav, ki en Prezidan i bezwen *vacate* son pozisyon *the presidency*, i annan - sa lamannman i eksplik byen ki pou arive.

E Mr Speaker, *United Seychelles* in pas zot letan zis pou akiz nou konmkwa nou pe sey *consolidate* nou pouvwar atraver sa Lamannman Konstitisyonnèl ki nou pe anmennen Mr Speaker. Kan nou tou nou konn tre byen lekel parti ki dan son listwar in sey konsolid pouvwar dan plizyer fason ki ou kapab mazine Mr Speaker.

Annou mazine Mr Speaker, napa en Prezidan *United Seychelles* ki'n konmans son manda atraver bwat vote – ki'n ganny elekte.

France Albert Rene ti konmans son manda atraver en koudeta Mr Speaker. Apre i ti pas baton avek – i ti *resign*. France Albert Rene ti *resign* le 14 Zilyet 2004 Mr Speaker, e i ti pas baton avek James Michel.

E Prezidan Michel li osi pareyman, an 2016 i ti *resign* e pas baton avek Danny Faure. Zot pa'n konmans zot manda atraver eleksyon. Sanmenm sa ki apel konsolid pouvwar Mr Speaker. Vwala legzanp tipik ki ozordi zot pe sey zis nou, zot pe akiz nou Mr Speaker.

Parey Onorab Sandy Arissol in dir; zot manz zot ta bannann, zot vant in plen in deborde, prezan la zot pe sey anvoy zot bann lapo lo nou. E zot in fer tou posib Mr

Speaker, pour zot reste o pouvwar.

Annou pa bliye Mr Speaker ki ti arive parey eleksyon 2015. *Case* ti al devan Lakour e ti annan bann dimoun zot bann aktivis ki zot non ti ganny *shrug of* lo lalis voter, akoz en bann ti pe sey aste *ID card* dimoun.

I annan en bann ki ti pe sey fer per zot travayer si zot vot pour Wavel Ramkalawan. E sa bann dimoun zot non ti ganny tire lo lalis voter. Zot ti refize pou donn bann parti Lopozisyon en *copy* – en *digital copy of a voters register* ki ti bezwen al Lakour. Kot Lakour ti donn en lord *Electoral Commission* pou donn kopi *voters register*.

Zot pa ti le Mr Speaker zot konnen akoz? Akoz ti annan bokou ban nanm ek bann fantonm lo lalis voter, ki nouvo *Electoral Commission* ler in vini in netway sa lalis avek zot ta nanm Mr Speaker, ki ti pe vote dan bann eleksyon avan ki ti servi pour zot Mr Speaker, ganny en lavantaz dan en eleksyon e vol bann eleksyon lepase. La ozordi zot annan lodas pou vin akiz nou konmkwa se nou ki annan lentansyon vol eleksyon.

Mr Speaker, ozordi si en Prezidan i *resign*, dan 3 mwan fodre i annan en eleksyon. *VP* i ava *discharge* responsabilite sa Prezidan ziska 14enm zour

apre eleksyon akoz an ka i annan en *second round* Mr Speaker.

E mon dakor lo sa zafer lanmor. Si en Prezidan i mor, *VP* i ava kontinyen son term sa Prezidan ziska lafen son manda. Ou konnen akoz Mr Speaker? Mon pa *trust United Seychelles* mon Mr Speaker. Akoz napa en parti ki'n fer plus *assassinat* ki *SPUP/SPPF* dan lepase Mr Speaker. Sa i pou anpes bann *assassination attempt* Mr Speaker.

Nou, nou konn listwar dan lepase. *In fact*, menm zot *Leader* ozordi i pe dir pou dir i annan en bann pou *end up* dan rigol anba pon, Mr Speaker. E zot parti i en parti ki'n montre – atraver *TRNUC* nou'n war kot bokou bann dimoun, bann azan i ganny servi pour touy dimoun, pou fer dimoun disparet.

E ti menm annan en lensidan par lao kot lakaz Prezidan kot en zarm ti ganny trouve lo en propriyete. En garson ti anmase – sa rivolver. Ti al *shoot*. Ti servi pou menas en Endyen kot laboutik Bel Air Mr Speaker. Mon pa fye zot. Ti *shoot* li tou en. Ti *shoot* en Endyen kot laboutik Bel Air. Sa zarm ti ganny trouve par lao kot Prezidan Ramkalawan.

Pa fini Mr Speaker, zarm in ganny dekouver dan lakaz, dan *basement* enn zot pli gran siporter e aktivis ki'n *fund* Pati

*SPPF/United Seychelles* dan lepaste Mr Speaker. Ki mannyer ou kapab *trust* sa bann dimoun? Non, non, non, Mr Speaker.

Onorab Lemiel - ladan menm Mr Speaker, ozordi en parti Mr Speaker zot aktivis in sey met bonm Grand Anse Mahe Mr Speaker, pa bokou letan pase. An plis ki sa Mr Speaker, zot pe koz nou, nou bril *file*. Be bril *file* Mr Speaker. Be Zarden Botanik anler bann *time* ki Onorab Cosgrow ti Minis, pa zot ti brile laba anler pou kasyet bann dokiman *Botanical Garden*?

*SBFA* Mr Speaker, pou kasyet zot bann vol ler zot ti pe pran *loan* pe donn zot bann dalon ek bann dimoun – bann nanm, bann fantonm. Chalo, Chale, Charlette, Mr Speaker. Bann fantonm *SBFA* Mr Speaker. Ou rapel, ti disparet?

*Hard drive* disparet. *Computer* disparet. *File – digital file* ki ti disparet Mr Speaker. Pa ti brile Mr Speaker. *Hard drive* ki ti disparet. Zot ki annan repitasyon fer sa bann keksoz. Parey mon'n dir, zot vant in plen, in deborde, manz zot ta bannann, anvoy lapo lo nou ozordi Mr Speaker, parey zot labitid.

Huh! *File Maison Du Peuple* en lot zistwar ankor. Mon krwar en Manm in deza koz lo la. Mon pa pou al lo la

ankor. Me selman nou tou nou konnen kantite rikord bann *file* ki'n ganny detri dan lepaste pou kas levidans zot bann frod, zot bann vol, zot bann koripsyon ki zot in fer. Ziska larzan ki sipoze aste manze pour pep Seselwa ti disparet sorti kot *SMB* sa letan Mr Speaker.

Mr Speaker, Onorab Lemiel in dir ki pou arive. In tous en pe lo si *the Principal Minister*. *VP* ek Prezidan pa dan pei e *Principal Minister* i la. I pou napa vremen lotorite Mr Speaker, kan sa *Bill* i fer kler poudir sa *Principal Minister* pou annan menm lotorite avek Vis-Prezidan ouswa Prezidan ler sa 2 zans pa la.

Enn se; 3 keksoz ki i pa pou kapab fer se *revoke* lapwentman en Minis. I pa pou kapab dizourd Lasanble, e i pa pou kapab donn pardon. Me selman apard sa, i pou kapab *discharge* responsabilite sa Prezidan or *VP* ki pa dan pei.

Mr Speaker, e si Vis-Prezidan i vin Prezidan, ouswa si sa nouvo Vis-Prezidan i bezwen vin devan sa Lasanble Mr Speaker, pour laprouvasyon.

Si sa *Principal Minister* i vin – i ganny elekte. Lasanble i aprouve pour li vin Vis-Prezidan, en nouvo *Principal Minister* i bezwen ganny laprouvasyon sa Lasanble Mr Speaker.

E si sa Vis-Prezidan apre ki in vin Prezidan dan ka ki sa Prezidan i mor Mr Speaker. In fer plis ki 2 term sa Prezidan ki ti ganny elekte Mr Speaker. I pou kapab debout pour selman en lot term. E si non. Si i *less, then* i pou kapab debout pour 2 term.

Mr Speaker, *Leader* Lopoziyon ti al *over the place*. Ziska Mont Plaisir in arive. Mon pa pou al lo la, la. Mon ava eksplik li dan mon Mosyon ki pe vini semenn prosen.

Mr Speaker, sa *Bill* pe osi *repeal* e retir *immunity* ki Prezidan i annan. Kot ou pa kapab anmenn en *case* – Parey nou tou nou konnen, dan lepase i annan bann Prezidan in fer en pake zafer Mr Speaker, me akoz, zot ti ganny proteze. Zot ti ganny *immunity* anba Konstitisyon, ou pa ti kapab tous zot pour bann lofans ki zot in fer.

E sa zot ti pase Mr Speaker senpleman pou protez zot pour tou sa bann keksoz ki zot in fer dan lepase; Koripsyon, vol dimoun. touy dimoun, krim, Mr Speaker. E nou Prezidan li i dir non, non, non, non. Pa le war sa bann zafer ankor dan le fitir. Akoz li i konnen son lanmen i prop. I pa pou ganny akize pou okenn keksoz; pour vol, pour touy dimoun, pour fer dimoun disparet.

### **MR SPEAKER**

15 minit Onorab.

15 minit. Terminen.

### **HON WAVEL WOODCOCK**

Wi mon pe fini Mr Speaker. Alor Mr Speaker, sanmenm sa ou war ki ozordi nou, nou pe sanz sa ozordi pou tir sa *immunity*. Kan ler sa ti vin devan Lasanble Mr Speaker, annou pa bliye poudir zot pa ti vot an faver.

An konklizyon Mr Speaker – an konklizyon Mr Speaker, zis pou mwan dir; Seselwa ozordi i entelizan. Seselwa i war kler. Seselwa i en nasyon ki konpran tou keksoz.

E zis ou pou get sa lanterman ki zot ti fer Sanmdi pase, kot menm si zot ti sey pey detrwa – en boug R250 pou rod detrwa moter....

### **MR SPEAKER**

Terminen. Terminen Onorab.

### **HON WAVEL WOODCOCK**

...pou met enn de bann pti menn lapoud lo la Mr Speaker.

### **MR SPEAKER**

Terminen silvouple.

### **HON WAVEL WOODCOCK**

...pou sey montre konmkwa zot annan en pe siporter. Mr Speaker, *US* ek sa kalite latitid zot pa pou al pli lwen ki sa. E zot en parti ki vreman fay. Zot

pli fay ki zanmen Mr Speaker. Avek sa 2 mo, mon dir ou mersi.

### **MR SPEAKER**

Mersi. Bon, laparol aprezan pour Onorab Egbert Aglae.

### **HON EGBERT AGLAE**

Mersi Mr Speaker. Mon a dir bonn apre midi *VP, AG's Office* ek ou delegasyon, ek ou *panel*. Mr Speaker, letan mon'n ekout dernyen entervenman ki'n fek koze. I fer mwan krwar poudir i annan zis en sel *speech* ki i fer dan sa Lasanble li. Me selman mon pa pour al ladan.

Mr Speaker, yer ti Lazournen nou bann dimoun trwazyenm-az. E mon le profit sa loportinite pour nou – pour mwan rekonnèt tou mon bann enn trwazyenm-az ki dan mon distrik Port Glaud e tou bann trwazyenm-az ki ankor vivan, ki'n ede batir Sesel.

E osi ki bann ki'n kit nou ki zot lam i repoz anpe. E osi mon rekonnèt lazournen nou bann *teachers* sa semenn. Ki osi ki zot kontinyen devoue pour donn sa bon ledikasyon ki nou bann zanfan i bezwen.

Mr Speaker, letan mon pe regard sa lamannman konstitisyonnel, i fer mwan reflesir lo en ta keksoz ozordi. En ta keksoz aköz plizyer eleksyon in ganny fer dan sa pei, anba sa menm Konstitisyon.

E se anba sa menm Konstitisyon ki *LDS* ozordi in arive vin o pouvwar pour li gouvern e diriz pei.

I montre mwan poudir sa menm Konstitisyon ki la ozordi ki zot in vin avek en lamannman, ti annan son relevans e i ankor annan son relevans.

E letan mon'n tann plizyer Manm koze lo lot kote latab, dayer Mr Speaker, nou bezwen osi, annan en *moral high ground* koman bann Manm Lasanble. Letan nou anvi servi parol Bondye, me apre nou vin kras venen, me apre nou le maltret nou prosen. E apre nou le dan en fason ensilte nou bann oponan politik. Pa mars ansanm sa de zafer la. E letan mon pe koz lo *moral high ground* osi, mon'n tann nonm divizyon dan nou parti.

Wi, Onorab Cosgrow ti dir pou dir se aköz en divizyon dan nou parti. E ki ti anmenn nou, ki ti kout nou eleksyon 2016,2020.

Me osi divizyon se sa ki mon'n dir *moral high ground*, avan ou montre ledwa lo nou zot bezwen tir later dan zot lizey zot osi *LDS*. *LDS* ti en *cocktail* en parti. Nou'n retourn li *SNP* aköz? E la mon pour repet parol, Ton Pat ki in dir mwan. I dir mwan dir zot, "*karma is a bitch*".

**(APPLAUSE)**

**HON EGBERT AGLAE**

Mr Speaker, sa i en lekspresyon Angle. Akoz zot devre demann zot lekor ozordi, demann zot lekor ozordi oli madanm Antao? Ki zot ti fer avek Mr Nicholas Prea? Ki zot in fer avek Onorab Clive Roucou? Ki zot in fer avek Ton Pat Mr Pillay?

Plizyer zot la anndan i annan kont pour rann. E mon le dir zot en keksoz osi. Zot pe koz divizyon, 2025 ki zot pour war divizyon dan zot kan.

Mwan pour mwan Mr Speaker, sa lamannman eleksyon ki pe ganny anmennen dan nou Konstitisyon, i pa pour anpese annan okenn eleksyon.

Nou kapab fer eleksyon *without* sa bann lamannman ki'n fer, e pei i kapab *deal* ek bon pe problem ki nou annan ozordi, dan plas vin ek en serten lamannman parey.

Problem i anta Mr Speaker. Cascade pa ancor kapab rezourd. I annan ancor dimoun i ancor pe reste dan lakaz Port Glaud ki *PMC* in met zot akoz zot pa ancor kapab retournen. E byento pe al ganny 1 an. Lasante problem menm e ladan menm ler Minis i vini i a vin dir nou, problem dra problem lot napa, kan i ancor annan.

Problem drog, Mr Speaker atraver ou *VP* ti dir in rezourd tou problem, eroin. Me selman problem drog i ancor annan en ta dan Sesel.

*Tourism* Mr Speaker, bokou problem. Nou bann pti biznes pa pe kapab ganny sa kantite touris. E zot monte zot koz bon labous, me annefe larealite pa li. Sa bann dimoun pe soufer. Pti biznes ki pe rekipere apre *CCCL*, problem menm.

E osi i annan bann lezot biznes ki pe zis *makes ends meet* pour zot kapab zis pey zot bann det. Trezyenm mwan saler ancor. Sa ki zot in fer dan 4 an Mr Speaker. *Long service allowance*, solman zot le al donn rekognisyon bann dimoun ki'n travay plis, kan zot menm zot ti loter pour koup *long service* sa bann dimoun.

Peser, fermye problem menm. Materyo konstriksyon problem, lakaz, lozman zot in zis koup riban, problem menm. Mr Speaker lalis i long. E mwan sa ki mwan mon anvi fer sorti ozordi, se ki si zot pe vin avek en lamannman parey e ki zot dir zot ki pe anons dat eleksyon, mon demann mon lekor, be ki rol Komisyon Eleksyon?

*VP* avek tou respe ki mon annan pour ou, me se ou ki'n anons dat eleksyon. Eski *State House* ki sipoze? Akoz ou en

reprezantan sorti *State House*. Dan ou konferans ki ou ti fer letan ou ti pe vin avek sa bann lamannman ou ti annons dat eleksyon.

Mon ti a swete mon ti a war Komisyoner Eleksyon o bor ou apre i ti a koz lo la, i ti a dir de keksoz lo la. La mon ti a dir zot pe travay an partenarya, be se ou!

Alor en politisyen ki'n anons dat eleksyon. Pa parey sa ki *LDS* i dir, pour nepi annan politisyen ki pour anons dat eleksyon. Be ki nou'n war? Lekel ki'n anons dat eleksyon? Se Vis-Prezidan. E se sa ki nou bezwen demann nou lekor kestyon.

Annou *être* realis, ler nou dir serten keksoz. En lot ankor keksoz ki pour mwan ki mon krwar Mr Speaker, mon bezwen touse. Se letan nou pe koz lo pas baton. E anba *Election Act* i kler. E mon krwar byento zot pour bezwen amann *Election Act*.

Akoz sa ki zot ki zot pe mete dan Konstitisyon i pa anliny avek *Election Act*. *Election Act* i dir ou, si en Prezidan i mor, ouswa i *resign* ouswa i ganny *impeach*, *Election Act* i dir ou i annan 90 zour pour li *call in an election*. Sa ki ganny dir dan *Election Act*.

E zot pe sanze, mon pa konnen prezan si in annan en konversasyon avek Komisyon

Eleksyon aköz Komisyon Eleksyon pa ankor sorti ditou, pour koz lo sa size.

Mon ti a kontan konnen. Aköz i kontradwir sa ki li son Lalwa i dir. E la ankor, mannyer zot in met li, ki mwan mon konsernen - mon tre konsernen aköz lafason ki in ganny dir se Vis-Prezidan pour kontiny manda aköz in lo sa tiket li.

Ziskan sa manda ki'n ganny *intended* i fini. Be si pa pas baton ki mannyer nou pour apel sa mwan? Donn mwan en lot term ki mon kapab servi. Aköz i klerman ou'n pas baton avek ou Vis-Prezidan pour fini.

Mr Speaker, lo size iminite. Mon pe sey konpran ki iminite ki zot pe koz lo la aköz still nou annan en Prezidan en dimoun i kapab anmenn en *civil case* kont en Prezidan. Apre ki'n sorti dan lofis. Wi, i kapab fer sa.

Be annou eklersi aköz zot dir - i annan ki'n koze in dir pa ekout zot, pa ekout nou lo *US*. Be eksplik nou ki zot pe sey dir par sa. I annan serten keksoz ki i bezwen ganny eklersi pour nou letan ou pe dir Prezidan in fikse zot dat. Aköz mon bezwen dir Prezidan aköz *State House* ki'n anons dat eleksyon.

Li i kapab anons sa dat ki'n ganny preskrir, an menm tan Prezidan i annan pouwar

pour li kapab dizourd Lasanble. Napa problem ek sa mwan, in deza arive dan lepase sa. I dan Konstitisyon sa.

Kwa ki mon pa kler lo la prezan, si en Prezidan dan milye son manda i deside poudir i pa pe ganny sipor Lasanble, i dizourd Lasanble. Zot in dir tou lede eleksyon i bezwen ganny fer ansanm. Apre ki'n dizourd i refer Eleksyon Lasanble Nasyonal. Ki mannyer sa lot term Lasanble in fini li? I pour fini ansanm ek sa Prezidan ler i pour fini son 5 an?

Ouswa pour annan derogasyon ki bezwen ganny mete, pour li kapab. Akoz ou'n koup term Lasanble Nasyonal ki sipoze 5 an parey ou Prezidan ou ganny elekte pour 5 an ki ou koupe. Nou bezwen leklersisman lo la. Osi ou bezwen eklersi nou lo sa zafer 30 zour la ki zot pe donn ekstra.

Prezidan ler i *State House* i annan li, sa ki nou apel bokou pei. I annan son *Chief of Staff*, i annan en Ladministrasyon ki i travay anba la li avek. Pa Prezidan ki organiz inogirasyon. I bezwen annan en departman ki organiz levennman parey zot in organiz levennman trwazyenm-az. Ki zot pa ti siport son Mosyon.

Me selman apre yer swar zot vin koz lo dinyite. Mosyon ti lo dinyite zot pa ti siporte solman zot le koz lo dinyite. So i bezwen annan en departman en group dimoun dan *State House* ki organiz bann levennman.

E pour nou zot konnen 2025 pour annan en eleksyon i pour bezwen annan en inogirasyon en Prezidan. Menm si i al dan premye round ouswa dezyenm *round*. So preparasyon i bezwen ganny fer. En Bidze i ganny mete.

Parey dan Bidze Komisyon Eleksyon ki pour vini la, i pour annan en larzan ki pour ganny mete dan eleksyon. E i annan en larzan ki tou le-z-an i ganny mete pour eleksyon an ka, i annan parey en *byelection* ki kapab arive avek.

So i pour pran en ta letan pour zot al organiz en mwan pour zot al organiz en inogirasyon? *Plus*, i annan en proses *handing over* ki bezwen ganny fer. Me *handing over* i pran en mwan pour *handing over*?

Ki kantite keksoz ki pe al *handing over*? Mwan pour mwan sa largiman la demokrasi, pour donn – zot in koz lo latransparans lot, lot. Be Mr Danny Faure 2016 ki ti vin avek sa prensip, kiltir rann kont, bon gouvernans, e



latransparans. Me ki Seselwa ti fer 2020? I pa ti anvi tousala i ti zete.

E parfwa Mr Speaker, la mon a koz lo Bondye, lo non Bondye. Tou keksoz i ariv pour en rezon dan sa pei. E Bondye ki zer tou keksoz. Li ki dir ki pour arive.

E petet Seselwa sa ki'n arive ti neser pour arive, pour donn zot en legzanp, poudir gete ou ti annan ou en Gouvernman ki ti get ou, ki ti ekout ou.

Ki ti dir ou, *be what you want to be*, bokou ti pe fleri, bokou ariv lo en nivo. Lapovrete ti preski ganny eliminen dan sa pei. *Taxi* drayver ti ganny gete, ti ganny ekoute ler zot ti fer zot pti demonstrasyon, zot *strike*.

Lot departman ti fer pour li. Sa Gouvernman ti ekout zot. Be i domaz zot in ganny en Gouvernman ki 4 an pa'n ekout zot! E la lavey en eleksyon, ki pour deside vin ekout zot, tap zot laport.

Pep Seselwa si zot pa war sa tre kler, mon pa konnen mwan. Bokou zot i konnen poudir zot ti dan byen. Sa ta mesaz ki nou gannyen, sa ta *call* ozordi kot dimoun pe tap nou laport, pe vin demann nou led, i bokou Mr Speaker.

E la ki mon ti a swete mwan, sa bann fame aktivis...

**MR SPEAKER**

15 minit Onorab.

**HON EGBERT AGLAE**

Ki ti par deryer sa 40poursan lapovrete la, fer sa *survey* ozordi la nou a konnen kantite lapovrete i annan dan sa pei Sesel.

Mr Speaker, an konklizyon, si nou pe koz lo sa kalite magouy ki arive ozordi. Ek sa kalite lamannman se pour vol en eleksyon.

Mwan mon dir poudir gete sa zafer bwat vote ki ti perdi Beau Vallon ki ti reste deryer pa kapab ariv ankor.

Sa bann *ballot paper* ki ti vin par faz. Port Glaud i annan 2000 voter ...

**MR SPEAKER**

Terminen Onorab.

**HON EGBERT AGLAE**

... mont ek 2000 papye vote pour dimoun vote.

**MR SPEAKER**

Mersi.

**HON EGBERT AGLAE**

Mr Speaker, mon pour dir ou mersi. Mon konnen laverite i ofans zot. Mersi.

**MR SPEAKER**

Mersi. Laparol i aprezan pour Onorab Larue.

**HON FLORY LARUE**

Mersi Mr Speaker. Bonn apre midi tou dimoun.

*(Interruptions)*

### **MR SPEAKER**

Nou a gard lord silvouple.

### **HON FLORY LARUE**

Mon ler i komans la Mr Speaker, en, *ok*. Mr Speaker, ozordi nou pe koz lo Lalwa pli o dan pei, nou Konstitisyon ki en Lalwa fondamantal. Ki dekri bann prensip Leta, bann striktir e prosedir Gouvernman. E drwa fondamantal son sitwayen. I Lalwa ki pli o dan pei. I definir karakteristik e fason fer sa pei.

Mr Speaker, nou'n vwar ki nou Konstitisyon ti vin an plas an 1993. Letan i ti vin an plas an '93 dan en peryod 3 an Mr Speaker.

La i '96, sa parti ki ti o pouvwar ti'n fini amann li 4 fwa. Ti anmenn 4 lamannman konstitisyonnel, e zot ti fer sanzman avek 24 lartik, dan sa bann premye amannman.

Dan katriyenm amannman ki zot ti anmennen, zot ti anmennen ankor en 24 sanzman ankor. En total 48 dan zis 3an lamannman konstitisyonnel. Mr Speaker sa ti an 96, ozordi nou 202,4 31an apre.

Eski pa ankor ler pour nou reget en pe fason fer Mr Speaker? En Konstitisyon en

dokiman vivan. I sanze avek son pep, i sanze avek bezwen ki nou koman en pep nou le.

Mr Speaker nou ti sort i an '93, '92, '93 anba *one party state*. En sistenm pratikman kominis /sosyalis. Nou ti bouz sipoze dan en sistenm demokratik. Se sa depi 92, 93 nou pe lager pour nou ganny anmenn en demokrasi, en vre demokrasi dan nou pei.

Mr Speaker, sa i parti sa travay pour anmenn la vre demokrasi pour nou pep. Alor la nou pe revizit sa Konstitisyon. Mr Speaker, nou'n ganny dir napa rezon pour nou fer sa ki nou pe fer. Akoz nou pe fer? Akoz nou pa kit li parey?

Onorab Woodcock in dir in donn legzanp letan Prezidan James Michel ti sed laplas. Apre ki i ti'n ganny – Eleksyon Prezidansyel an 2015. Mr Speaker, *up until* 2015, Prezidan James Michel ti trwazyenm Prezidan.

Premye zot ti pran pouvwar avek par fizi koudeta. Apre nou ti ganny Prezidan Rene ki'n la pour en pake letan. Apre nou'n ganny Prezidan James Michel.

I vin en Eleksyon 2015, i demann sa pep. Savedir zis 3 dimoun, 2015 ti annan zis 3 dimoun ki ti'n debout koman Prezidan. I en privelez sa. I vin kot pep Seselwa i demann zot en manda. Son manda i sipoze

5 an. Mr Speaker olye 5 an ki i fer? An Oktob son lannen answit apre Desanm 2015 i *resign*. I *resign*, i pas baton avek son Vis-Prezidan.

Mr Speaker, sa bann letan an Oktob 2016, nou ti ganny nou sizyenm Lasanble e ozordi Mr Prezidan Wavel Ramkalawan i ti *Leader* Lopozisyon. E i ti anmenn premye Mosyon dan Lasanble.

E i ti koz lo sa sistenm prezidans. E i ti dir ki nou bezwen koman en pep konsider bann sanzman koman en Lasanble. Konsider bann sanzman dan nou Konstitisyon, pour nou regete ki mannyer en dimoun i vin Prezidan.

Ou pa kapab zis ou Prezidan, ou anvi vin Prezidan ou debout. Ler ou fini debout 9 mwan apre ou deside ou pa oule la ou pe ale prezan ou donn ou zwer. Ou donn *VP*. Pa mars koumsa sa Mr Speaker.

Letan Mr Michel ti *resign*, i ti dir apre 12 an koman Prezidan ler in arive pour pas pouvwar. Seselwa pa enterese ek pas pouvwar li. I enterese ek elekte son Prezidan! Swazir son dimoun! Se sa ki ti fer komans sa proses, pa dir ki prezan ki Prezidan Ramkalawan in leve dan en sonmey. Prezan ki i pe deside regard sa bann keksoz. Depi Oktob 2016 i ti met devan zot,

devan Lasanble e bokou zot – enn de zot ti la zot ti tande.

So zot pe fer kalonmni letan zot dir prezan nou fek reve koman en parti nou anvi met sa bann sanzman. Mr Speaker, dan sa nouvo propozisyon zot in dir ki nou pe remet pas baton par en laport deryer. Mansonz, mansonz, mansonz Mr Speaker.

Sel keksoz ki nou pe dir i ki sa par maler sa dimoun ki Prezidan i mor, e la nou pe met sa kote, en latanta. Pour nou retir kekfw sa risk en latanta. Pour en dimoun konnen ki kantmenm ou touy sa Prezidan, ki *State House*.

Ozordi i aplik pour Prezidan Ramkalawan en zour ou pour aplik pour en lot dimoun. Si en dimoun i annan sa lentansyon pour touy Prezidan. Sa Vis-Prezidan, i *take over*. Ki fer ki napa en *snap election*, par touy en Prezidan. Sa i enn bann rezon. Apre si par maler, i mor natirelman sa i fer ki Vis-Prezidan i fini sa restan manda ki annan.

En lot ka ki Vis-Prezidan i kapab *take over*, i si sa Prezidan i ganny deklare malad Mr Speaker. Tou le de ka, lanmor avek maladi i pa keksoz ki en dimoun i demande sa Mr Speaker.

Me par kont mon'n tann en Manm sa enn ki'n ganny

met deor, i dir koumsa ki Prezidan pour vini ek enn pti sertifika sorti *Abu Dhabi* pour bat ek nou. Apre i pour donn VP baton akoz i pour deklar li malad. Mr Speaker, ou war letan en Manm napa respe pour son Konstitisyon. Ouswa i pa konn son Konstitisyon, i vini i koz demagozi. Akoz nou Konstitisyon la, anba Lartik 53, i kler Mr Speaker.

I dir nou ki mannyer sa sertifika, ti sertifika ki Prezidan Ramkalawan pour sorti avek *Abu Dhabi* pour vin avek Sesel poudir nou lala, i pe donn Vis-Prezidan Ahmed larestan manda la.

Sa anba 53(4) nou ki vote. I vin kot Lasanble sa Mr Speaker. Ou ganny notis, ou bezwen demann Lasanble pour vot lo la. Sorti kot nou i al kot Sef Ziz. Sef Ziz li i bezwen apwent en *Board Medikal* avek trwa dimoun lo la, 3 dokter.

Letan zot fini donn zot rezilta, Sef Ziz si zot dir enkapab son pti sertifika malad ki i dir i pa kapab kontinyen la - si Sef Ziz i bezwen li sertifye letan sa trwa dokter i donn li son rapor i dir li ki i pa kapab, vre sa pti sertifika i bon, vre i pa kapab kontinyen, Sef Ziz i bezwen sertifye sa an ekrir.

Pa fini sa rapor Mr Speaker, anba 53(8) sa rapor ki montre ki Prezidan pa

kapab gouvernen, i bezwen retourn kot Lasanble ankor pour nou debat lo la. E nou vote. Nou re vote pour nou dir li wi ou kapab pran ou'n pti papye sorti *Abu Dhabi*, asiz kot ou semen Serret akoz ou byen malad.

En gran prosesis Mr Speaker ki dan Konstitisyon e nou ganny en Manm lo kote *US*, vin fer Seselwa krwar ki nou, nou pe pas baton atraver si nou pe dir en dimoun i malad e i pa kapab kontinyen son servis.

Tousala i bann mansonz ki zot koze, zot le Seselwa krwar zot. Sa i sel de rezon ki VP Vis-Prezidan i kapab kontinyen - sa VP ki la, ek okenn lezot VP ki vini dan lefitir.

Mr Speaker, Mr Speaker letan eleksyon i kapab ganny kriye. Bann lezot rezon ki eleksyon i kapab ganny kriye *snap election*. Se si sa Prezidan ki dan sez *State House* i vyol Konstitisyon, ouswa i fer *gross misconduct*.

Sa i bann rezon. Apard sa koman en pep Mr Speaker, sa amannman la, i pe anmenn en dat fiks pour nou pep, pour tou dimoun konnen kan nou pour annan eleksyon.

Apre nou pe *repeal* sa morso ki fer *snap election*. Sa ti ganny mete an 2000. Lannen 2000 dan nou Konstitisyon anba Prezidan

Albert Rene, pour zot kapab apre 1 an *anytime* kriy en eleksyon.

'Tat delo', ti apele, nou pe tire sa Mr Speaker. Pa pour egziste ankor dan nou Konstitisyon sa, nou pe tire nou.

Mr Speaker, en lot zafer ki nou pe, nou pe retire se sa iminite. E mwan mon ti anmenn en *Private Members Bill* an 2019. Sa *Bill* dan son totalite ti pe demande ki nou tou nou vin egal anba Lalwa Mr Speaker.

*Rule of law.* En kaye Lalwa ki aplik pour tou dimoun. Sel letan ki en Prezidan i - sa bann Lalwa pa aplik pour li i ganny iminite se letan i pe asiz koman Prezidan.

Letan i sorti i retourn en sitwayen normal anba Lalwa. Sa ki nou ti pe demande an 2019. Mr Speaker anba sa letan Prezidan Danny Faure nou ti pe demann latransparans.

Nou ti pe demann lot kote ki nou – akoz nou ti napa en mazorite absolli. Nou ti donn zot latransparans bann gouvrenans, rann kont tousala nou ti pe demann zot Mr Speaker.

Sa bann letan Onorab Loze ki ti la. I ti dir nou ki nou ti pe fer en Lalwa pour en dimoun. En sel dimoun, zis pour ou Prezidan James

Michel. I dir nou pa pe fer sa pour okenn fitir Prezidan.

I dir koumsa poudir nou ti annan levidans ki James Michel in mal fer keksoz pandan son prezidans e nou pe vin avek bann lentansyon mal fe. Nou ti annan, nou ti anvi persekit li.

Ozordi Mr Speaker, nou pe retir sa an 2024. Prezidan James Michel pa la li. Ozordi i annan Prezidan Ramkalawan ki la. Nou pe met sa an plas Mr Speaker.

Pour nou kapab dir ki demen si en sitwayen i krwar sa Prezidan ki la in fer en keksoz, i *free* pour kapab demann li kestyon Ankour. Zot Mr Speaker zot ti vot kont sa *Private Members Bill*.

Akoz zot ti pe protez James Michel Mr Speaker. Sa ki zot ti pe fer.

**(APPLAUSE)**

### **HON FLORY LARUE**

Mr Speaker, Onorab Pillay atraver ou, osi ti dir menm parol. I pran konklizyon i dir nou ti pe target en endividi. Nou ti pe fer li avek move lentansyon. Sa ti zot rezonnman akoz zot pa ti war pli lwen ki sa.

Savedir zot, zot ti vot kont akoz zot konnen ki kalite demagozi. E ozordi pep Seselwa pa kapab prosekit sa bann dimoun. E mon anvi fer

kler pep Seselwa lekel ki ti ede pour protez bann Prezidan lepase, se parti *US*.

E bann Manm ki ti la ki ti vot kont sa *Bill* Mr Speaker i Onorab Sebastien Pillay, Onorab Lemiel, Onorab Churchill Gill, Onorab Egbert Aglae, Onorab Audrey Vidot ek Onorab Johan Loze.

Onorab Waven William ti vot ek nou Mr Speaker. Ti siport sa.

**(APPLAUSE)**

### **HON FLORY LARUE**

Akoz bann ki ti la ti konnen mannyer ti ete. Zot, zot ti vot kont akoz zot ti pe protez bann mal fe. Zot pa ti oule sa bann dimoun i pas Ankour.

E la avek sa Lalwa ki ti - son letan in fini e zot bann Lalwa, zot bann fot ki zot in fer zot pa kapab ganny *accounted for* Mr Speaker.

Mr Speaker, nou'n tann dir vole. Nou'n tann nonm vole par tou Manm. Napa enn zot ki'n kapab dir nou ki mannyer nou pour vole. Zot pa kapab dir nou ki mannyer nou pour vole.

Solman nou pour vole Mr Speaker. Prezan i annan en konfizyon. I annan en konfizyon Mr Speaker. I annan enn, Onorab Sebastien Pillay atraver ou Mr Speaker, i dir koumsa ki napa separasyon pouvwar, *ok?* Ki

nou pe travay nou ki ansarz *Electoral Commission*; nou ki dir zot ki pour fer. Apre li menm li, i dir ki nou pa'n kominik avek *Electoral Commission*.

Apre Onorab Aglae i vini i dir, Vis-Prezidan letan i fer lanons, Mr Lucas i devret asiz o bor li.

Mr Speaker, dan sa pei nou annan separasyon pouvwar. Trwa lebra, Egzekitiv in propoz en Lalwa lo *Cabinet* pour li anmenn sa Lalwa. Letan in fini ek son *Cabinet* deside ki i pour amande, la apre ki pour al rod sa lebra ki pour ed sanz sa Lalwa.

Pa avan si fer avan apre pour zot dir li, "ou war zot dan konplo kat san douz avek *Electoral Commission* pour vol eleksyon." Zot nepli konnen ki kalite largiman zot pour anmenn. Anler fodre dir li anler pa fodre dir li. Letan pa dir li, letan pa dir li zot annan en problemm avek.

Be la *Cabinet* in deside, *Cabinet* i anmenn son provizyon devan pour pas Lalwa. Zot bezwen desid en largiman lekel - i pe vole pour nou? Prezan nou pa'n dir li nou, nou pa'n dir li pour li donn - solman i pour donn nou lanmen vole. Be ki mannyer i pour fer si nou pa'n dir li.

Mon nepli konpran zot. Zot divage, solman zot vin koz zis vole, vole, vole soman zot pa kapab eksplike - (*rubbish!*) - Mr Speaker, mon'n tann dir ki sa en mwan dan biro i fatig zot. Zot tou i fatig zot. Solman i annan en Onorab, Onorab Spiro i dir nou koumsa letan ou dan en travay ou pe kite travay ou bezwen donn en mwan notis.

Akfer? Akoz nou annan sa provizyon Mr Speaker. Akoz ki dan lemonn modern dimoun pe koz lo *handover*. Akoz? En pei – Mr Speaker ou konnen akoz pour zot i en problem? 43 an la enn i fer 1 an i deside al asize al *holiday somewhere* apre i pas lot. Napa bezwen *transition*.

Akoz sa enn ki pe vini la i pe asize *State House* ler i pas baton, i pe asize o bor li. Zot pe donn – zot pe eksplik li mannyer i marse. Sanmenm sa i napa tranzisyon akoz i *training on the job* li. I la ek zot, zot abitye zis zot ki'n sanz pouwvar.

La prezan letan Prezidan Ramkalawan in vini in realize premye fwa i annan en sanzman in konpran kwa ki vin avek. Kekfwa zot in manke taler, Danny Faure pa'n dir zot, ki i ti asiz 7 zour dan son biro e Prezidan Ramkalawan ti aksepte ti les li *sort out* pour benefis pei.

Zot pa konnen. Onorab Sebastien Pillay atraver ou Mr Speaker, kekfwa Mr Danny Faure pa'n dir zot. Zot pa koz ek li zot pa ekout li. Letan i ti dir latransparans zot pa ti ekout li zot ti vot kont.

Alor tousala se zot problem pa pran zot problem met lo nou. Letan zot pa konnen ki pe pase. Sa letan tranzisyon i en *need*. Nou pei i bezwen sa pour li fonksyonn korekteman Mr Speaker.

Mr Speaker, pour mwan terminen.

#### **MR SPEAKER**

15 minit Onorab. Terminen.

#### **HON FLORY LARUE**

Mon a terminen Mr Speaker. Mon'n tann zot nonm nou kanmaron; sa bann dimoun lo lot kote latab la zot in nonm nou kanmaron. Be zot ki kanmaron Mr Speaker! Ki'n retourn dan *United Square* dan labou pour zot fer zot pti *rally*.

**(APPLAUSE)**

#### **HON FLORY LARUE**

Nou, nou Prezidan i *State House* i pe travay, i pe ranpli sa kof vid ki zot in kite. I pe met sa pei dan en laliny drwat Mr Speaker! Mersi.

#### **MR SPEAKER**

Mersi Onorab.

**(APPLAUSE)**

*(comments off-mic)*

**MR SPEAKER**

*Order!* Onorab Georges, ou annan laparol.

**HON BERNARD GEORGES**

Mersi Mr Speaker. Bonn apre midi Mr Speaker. Bonn apre midi tou bann dimoun ki pe swiv. Mr Speaker yer ti Lafet Saint Thérèse. E mon profit sa lokazyon pour swet tou dimoun dan parwas Saint Thérèse ki son legliz prezan parey zot konnen i dan distrik Les Mamelles en *bonne fet*.

Yer osi ti zour bann dimoun aze. E parey lo nou kote latab nou rapel, nou ti pas en apre midi ekstraordiner avek nou dimoun anler *State House*. Dan labsans – dan labsans bann swadizan gran siporter bann dimoun aze dan sa Lasanble.

Mr Speaker, pokrit se sa bann dimoun ki koze epi pa fer aksyon. Lala pokrit sa ki definisyon pokrit.

E finalman Mr Speaker, Vandredi i pour Lazournen bann Ansennyan. E mon profit sa lokazyon pour swet tou bann ansennyan isi Sesel *present and past*. Me sirtou bann ansennyan dan sa 4 lekol ki dan nou rezyon, en

ekselan zournen pour Vandredi.

E mon remersye zot - (Onorab Pillay les mwan koze silvouple, donn mwan en sans) - E mon pe koz lo ansennyan ou ti en ansennyan, ou ti en ansennyan donn legzanp silvouple.

**MR SPEAKER**

Onorab Georges kontinyen. Onorab Pillay silvouple aret enteronpe.

**HON BERNARD GEORGES**

Mon profit sa lokazyon Mr Speaker pour swet tou bann ansennyan....

**MR SPEAKER**

Onorab Pillay! Mon pour demann ou pour sorti dan lasal. Sorti, sorti ou'n enteronp tro bokou.

**(APPLAUSE)**

**MR SPEAKER**

Ou kapab sorti retournen *next period*. Donn nou en lape pour lemoman. Onorab.

*(comments off-mic)*

**MR SPEAKER**

Mersi. *Order! Order!* Nou a ganny en pe lord silvouple pour fini sa deba? Onorab Georges kontinyen.

**HON BERNARD GEORGES**



Fer lapenn Mr Speaker, en *ex ansennyann* pe fer *disturb* sa Lasanble swadizan en *Leader* dan en parti politik. Mr Speaker, en Konstitisyon i en Lalwa ki pa fiks, me dinamik e i bezwen ganny modifye pour eklersi serten lartik, ouswa pour rekonnet serten sanzman dan lavi en pei ouswa dan lavi en pep.

Me sanzman en Konstitisyon i bezwen ganny fer dan en fason ki siport la demokrasi, ki elev en Nasyon e ki promouvwar linite Nasyonal. Sanzman en Konstitisyon pa devret ganny fer pour donn en parti politik en lavantaz.

E sa 11enm Konstitisyon ki devan nou ozordi i pa en leksepsyon. Bann ki'n koz avan mwan Mr Speaker, in koz lo sa seri lamannman. *Grosso modo* sa bann lamannman i oule fer ki premyerman eleksyon pour annan en dat fiks. Akoz en manda se en manda.

Lepep i bezwen konnen kan eleksyon pour fer. I pa kapab les a en lot dimoun swa, kan i pour al vote. Dirizan i osi bezwen konnen pour ki i kapab servi pour ki i pa kapab servi en lavantaz lo son kote, ouswa en maler kot son oponan pour li rod vin o pouvwar.

Dezyenmman dan menm laliny, pouvwar pour fer en

eleksyon boner pe ganny aboli. Sa i pa konpatib avek en sistenm prezidansyel tel parey sa enn ki nou annan isi.

En tel sistenm i bezwen stabilite e i bezwen laklerte. Eleksyon boner pa promot ni stabilite ni laklerte.

Trwazyenmman, akoz sa propozisyon pour fer eleksyon lo en dat fiks, i pa posib, pour annan en eleksyon ler en Prezidan i anvi. Alor se pour sa rezon ki Vis-Prezidan pour kontinyen larestan manda en Prezidan ki sorti.

Me sa pa kapab dan tou ka kot Prezidan i sorti. Akoz nou'n aboli sa sistenm pas baton ki *SPPF* in entrodwi dan nou pei, en leksepsyon i bezwen ganny fer pour sityasyon ler Prezidan i mor, ouswa ler i ganny retire pour rezon son lasante mantal ou fizik.

Dan sa de ka Vis-Prezidan pour kontinyen e dat eleksyon pour reste fiks akoz *VP* i ti lo kart sa Prezidan pour eleksyon.

Me si en Prezidan i demisyonnen, ouswa i ganny retire akoz in kas son Konstitisyon, dan sa de ka Vis-Prezidan pa pour kapab kontinyen sa manda son Prezidan.

Akoz i kapab ganny war ki i ti konplis dan sa demisyon, oubyen dan sa aksyon. I pour bezwen annan

Eleksyon Prezidansyel. Sa Mr Speaker, parey mon'n dir, se pour anpes pas baton.

Katriyenmman, ler Vis-Prezidan i kontinyen manda Prezidan, i bezwen vin devan nou Lasanble pour nou aprouv son Vis-Prezidan. i fer ki aköz son Vis-Prezidan pa ti lo son tiket, nou koman reprezantan Lepep se nou ki aprouv sa swa.

Senkyenmman, dat Eleksyon Lasanble Nasyonal pour osi fer ansanm avek Eleksyon Prezidansyel pour menm rezon stabilite ek laklerte.

Sizyenmman, iminite prezidansyel pa pour reste pour en peryod zis apre 3 an, parey i ete ozordi apre ki en manda en Prezidan in fini. Prezan pour nepli annan okenn restriksyon.

Setadir si en Prezidan in mal fer pandan son manda, i kapab ganny pourswiv a nenport ki moman apre e non pa zis pour sa peryod 3 an apre ki in sorti.

Setyenmman, Minis Dezinyen pour sanz son non e vin Minis Prensipal. Sa ti'n deza devret ganny fer, depi ler Vis-Prezidan in ganny met dan Konstitisyon an 1996. Me i pa'n ganny fer, alor se nou ozordi ki pe vin fer sa.

Alor Mr Speaker, vwala bann lamannman ki devan nou ozordi. Mon pa konpran

aköz sa bann lamannman ki senp e ki kler, e ki *obvious* in anmenn sa kantite deba lo lapar Lopozisyon.

Ki'n koz lo tou keksoz apard regard sa Konstitisyon e regarde ki mannyer sa bann lamannman pe vin amelyor pa nou lavi, me pour zot osi. Zot lavi politik pour ganny amelyore anba sa Konstitisyon avek sa bann lamannman, ler zot in pase apre midi.

Mr Speaker, *LDS* i fer keksoz kler, e i fer keksoz pour byennet la demokrasi e pour byennet nou pei.

Par kont Mr Speaker annou regarde detrwa legzanp lamannman ki Parti *US* in fer pandan ki zot, zot ti o pouvwar anba zot plizyer non.

Premyerman an 1996 apre ki zot in war, ki Lopozisyon ti annan en sans dan sa pei ki zot in fer premye keksoz zot in fer, zot in redwir lakantite Manm proporsyonnel ki kapab ganny elekte dan Lasanble.

Zis pour donn zot en lavantaz e pour donn Lopozisyon en dezavantaz. Sa se zot ki'n fer Mr Speaker. Dezyenmman...

### **MR SPEAKER**

Onorab Cosgrow silvouple. Arete enteronpe.

### **HON BERNARD GEORGES**

Li menm li sa, li menm li sa Onorab bomaten ti napa lavwa en sel kou i annan lavwa?

### **MR SPEAKER**

Kontinyen Onorab.

### **HON BERNARD GEORGES**

La i annan lavwa. La i annan lavwa la. Ler pour kritike annan lavwa, ler pour koze i napa. Mr Speaker ler - dezyenm keksoz ki zot in fer ler zot in – ler parti US in met Vis-Prezidan dan Konstitisyon olye retir *Designated* Minister ki zot ti'n devret fer zot in kit li la, akoz?

Akoz sa ti bon pour zot. I donn zot en lavantaz akoz ganny en trwazyenm Minis for dan zot konsepsyon, la demokrasi avek politik.

Trwazyenmman Mr Speaker, an 2000, ki zot in fer dan lannen 2000? Zot in sanz Konstitisyon ankor, pour les zot kapab ganny en nouvo manda.

Vin demann menm avan ki ou 5 an in fini, fer Prezidan kapab vin devan Lasanble, vin devan Lepep e ganny en lot manda. En manda en nouvo manda menm si son manda ki in ganny elekte pa ti ankor fini.

Ankor enn fwa pour donn zot en lavantaz e parey nou konnen se zot ki'n envant sa fame pas baton, ki nou'n, nou'n bezwen vin retire.

E apre Mr Speaker, apre tousala se sa, sa bann se sa bann dimoun ki vin koz en manifesto *not* en manifesto *for the many, not for the few*. Sa ki zot pe dir?

Mr Speaker, US zot zanmen zot in anmenn okenn keksoz, ni koz ni *for the many* ni *for the few*. US in koz zis pour US, zis dan zot lavantaz. E sa pa fodre ki Lepep Seselwa i bliye.

Dan tou sa ki zot in koze ozordi, Mr Speaker, dan tou zot kritik depi yer, sel keksoz zot pe rode se en lavantaz pour zot, se tou. Zot pa kontan ler kart i ganny tale lo lakaz, ler balans i balanse. Non!

Pour zot fodre toultan zot kapab met en ledwa lo balans pour fer sir ki zot, zot anvi zot ava gannyen.

E prezan Mr Speaker les mwan reponn detrwa konfizyon ki Lopoziyon in sey semen depi yer.

Premyerman ki Prezidan pour fer dapre zot, dan sa peryod tranzisyon dan sa 1 mwan. Mr Speaker, mon anvi demann zot en kestyon, ki Prezidan pour kapab fer pandan sa 1 mwan ki i pa t i kapab fer pandan sa 4 an 11 mwan ki'n o pouvwar?

Akoz i bezwen esper sa 1 mwan pour li fer okenn keksoz ler i ti annan tou sa manda pour li kapab fer? Eski zot in demann zot lekor sa kestyon?

Eski zot in – si i anvi fer en keksoz i annan tou son 5 an pour li fer i pa pour esper sa dernyen 30 zour pour li fer Mr Speaker.

Dezyenm keksoz ki fodre pa nou bliye, se ki sa tranzisyon i pa'n fer zis pour protez en Prezidan ki pe sorti. Me in osi fer pour donn en lavantaz sa Prezidan ki pe antre. Pour ki i ganny sa letan pour li kapab met son lekor annord.

Apwent son *Cabinet* fer sir ki i konpran sa ki i pe vin fer. Vini e fer en tranzisyon pezib, pour ki pei i ava kontinyen devlop dan en fason kler.

Me en trwazyenm keksoz ki Lopoziyon in bliye dir nou Mr Speaker, se ki - e mon konnen akoz zot in bliye dir nou. Akoz zot pa zanmen prepare zot, zot pa zanmen lir zot Konstitisyon. Si zot lir zot Konstitisyon ozordi, e mon pa pour dir zot kote.

Akoz mon pa pour donn zot okenn pwen, me si zot lir zot Konstitisyon ozordi zot ava vwar ki i annan dan sa Konstitisyon ki zot, zot in fer - nou pa ti ladan nou.

Sa konstitisyon ki zot, zot in fer ladan i annan en lenterpretasyon ki permet egzaktaman sa ki nou pe fer ozordi kot i ava annan en peryod tranzisyon.

E si zot lir zot Konstitisyon zot pour konnen sa. Alor ozordi zot pe vin fer krwar ki i pa egziste e ki nou ki pe anmenn en keksoz zis pour nou lavantaz.

Ler zot konnen ki sa in la toultan e ki nou sa ki nou pe fer Mr Speaker, parey i nou devwar pour fer, koman en Lopoziyon ki annan en mazorite absolli dan Lasanble.

Se pa les sa a en lenterpretasyon. Se met li kler pour ki tou dimoun ava konnen egzaktaman ki annan en tranzisyon, ki longer sa tranzisyon e ki pour pase dan sa tranzisyon.

Dezyenm keksoz, zot vin dir ki tou sa ki nou pe sey fer la, se pour rod en lavantaz pour sa prosen eleksyon. Mr Speaker, si *LDS* ti anvi en lavantaz nou pa ti pour anmenn sa bann lamannman.

Nou pa ti pour anmenn lamannman pour tir pour war Prezidan pour kapab apel en eleksyon boner. Nou ti a'n fer li la.

Mr Speaker, apre sa fyasko *motorcade* Sanmdi. Apre sa fyasko *motorcade* Sanmdi, tou sa ki Prezidan - ale mon pa ti anvi koz lo la. Me les mwan koz lo *motorcade* enn pti kou Mr Speaker. Les mwan koz lo *motorcade* enn pti kou. En *motorcade* ki in sorti anvil in pas dan nor in retourn anvil.

Zis in fer sa li. In fer sa pti letour dan nor sa se en *motorcade*. E nou'n ganny dir, nou'n tande, nou'n tann zot dirizan dir. *Motorcade* ti telman fantastik ki ler son devan ariv Beau Vallon son deryer i ankor anvil.

Be Mr Speaker be, be, be tou le 4 er i koumsa. Tou le 4 er trafik i koumsa. Sa pa – sa pa en *motorcade*. Sa en trafik sa Mr Speaker, se tou ki ti ete. Les mwan dir zot – les mwan dir zot en *motorcade*. Les mwan dir zot en *motorcade* Mr Speaker.

Akoz sa mon pe koz laverite aköz mon ti ladan. *Motorcade* LDS 2020, li in sorti anvil in fer letour dan nor, in al Bel Ombre tou in fer letour dan nor apre in mont Anse Royale.

Ler mwan mon ariv Anse Royale, mon belser i *call* mwan i dir mwan kote ou'n arive? Mon dir li mon Anse Royale. Mon dir li ou kote ou ete? I dir mwan, mon pe pas devan legliz glacis. Sa a en *motorcade*. Sa en *motorcade* Mr Speaker. Sa en *motorcade*!

**(APPLAUSE)**

**HON BERNARD GEORGES**

Sa ki zot in fer sa. Sa en laprosesyon oubyen parey David Louise in dir – *anyway*. Mon pa – si Prezidan ti anvi, en lavantaz son prosen eleksyon.

Be se tou ki i ti'n fer, ler i get sanmdi i ti'n dizourd Lasanble, i ti'n *call* eleksyon. E dan en mwan dan 2 mwan i ti'n retourn pour ankor 5 an.

**MR SPEAKER**

Onorab, ariv 15 minit.

**HON BERNARD GEORGES**

Mr Speaker. Les mwan mon pe al mon pe al konklir...

**MR SPEAKER**

Terminen aköz mon ti krwar ou pe byen ale lo *Bill*. Be la ou'n ariv lo *motorcade*.

**HON BERNARD GEORGES**

Mr Speaker, mon'n ganny enteronpe par *motorcade* alor les mwan fini silvouple. Les mwan fini. I kler...

**MR SPEAKER**

Mon donn ou enn pti lavantaz aköz ou *Leader Government Business*.

**HON BERNARD GEORGES**

Epi mon'n perdi en minit Mr Speaker avek Onorab *Leader* Lopozisyon ou komansman pa bliye. Pa bliye.

**MR SPEAKER**

Silvouple.

**HON BERNARD GEORGES**

Mon pe konklir Mr Speaker. Mr Speaker zot in fini war *US* in fini war ki dan sa Eleksyon

2025, zot pe al ganny rensé. E zot in fini war zot – e pour sa rezon zot pe rod tou sord leskiz akòz zot pour perdi.

E nou'n tann tou sa leskiz depi yer bomaten. *LDS* pour vol eleksyon. Komisyoner Eleksyon i *LDS*, i annan divizyon dan parti *US*.

Setou Mr Speaker, zot in komans prepar zot lekor pour zot al ganny en defet an 2025. E zot pe tir sa. E zot pe sey anvoy lo nou. Les mwan dir zot ozordi Mr Speaker. Ki ler Wavel Ramkalawan i remont *State House* an 2025.

E ler nou'n balye tou le 26 distrik. Kriye, kriye si zot anvri, kriye ki nou'n prepar en lamannman Konstitisyon pour vin vol eleksyon.

Lepep Seselwa deor laba i ava konnen ki nou pa'n vole nou pe ganny eleksyon parey nou ti gannyen an 2020!

### **MR SPEAKER**

Mersi Onorab. Laparol pour Onorab Gill.

### **HON CHURCHILL GILL**

Mersi Mr Speaker. Bonn apre midi *VP* ek ou delegasyon. Bonn apre midi tou dimoun ki pe ekout nou. Mr Speaker parey ou konnen ozordi nou sipoze pe diskite lo lamannman Konstitisyon.

Me selman kantmenm mon pa le krwar. Me mannyer *motorcade* in antre dan nou

diskisyon i fer mwan krwar ki sa *motorcade*, in vreman kit son mark.

**(APPLAUSE)**

### **HON CHURCHILL GILL**

Mon'n tann lentervansyon avan mwan ti annan en mansyon ipokrit. E li in dekrir sa koman dimoun ki koze ki pa fer nanryen, se zot ki ipokrit.

Dan sa Lasanble depi ler *Truth and Reconciliation* in donn son *report*, nou ankor pe esper sa lalis *perpetrators*. Petet sa i en keksoz ki ti a bon vini. Vi ki nou dan Lasanble i osi donn nou lanmen pour nou kapab ganny sa.

In osi annan mansyon lo '*for many not for few*.' E sa i en keksoz ki tre byen. Akòz apre 2020 Seselwa antye ki pe viv Sesel, zot konnen kwa ki'n ganny koupe ki zot pa'n kapab ganny akse avek.

E i normal ki *the few* zot, zot in fleri e *the many* ozordi nou war, nou tou konnen ki pe pase. Alors larepons i lanmenm la ek nou lo sa bann deba parey.

Mr Speaker, eski propozisyon pour fer 11enm amannman dan Konstitisyon pei partikilyerman bann *clause* ki tous Biro Egzekitiv dan ladministrasyon pei e osi tous brans Lezislativ?

Akoz ozordi Sesel i annan bokou size, ki bokou pli enportan oubyen ki devret ganny priyorite ki sa lamannman Konstitisyon. Akoz tou fason sa ki pe ganny propoze ladan i pa, i napa sa *emergency* ki sa i devret ganny pran priyorite lo bann keksoz ki Seselwa pe kriye la deor, pour nou koman en Lasanble oubyen koman en ladministrasyon ki pe diriz Sesel pour anmenn devan pour sey soulaz zot problem ki zot pe fer fas avek.

Kwa ki pa bon avek sa bann *clause* akoz sanze? Ki vre rezondet? Sirtou ek Konstitisyon ki'n prouve ki tranzisyon sanzman ladministrasyon in ganny fer san okenn problem.

I pa kler dan bann leksplikasyon vre rezon sa bann amannman. Sa dan li menm i kree bokou dout e kestyon. Akoz ki nou bezwen sanz en keksoz ki pe fonksyonnen, anba preteks ki pe anmenn plis klarite. Kwa ki pa kler avek sa bann – avek nou Konstitisyon? Apre ki in servi sa menm Gouvernman ki pe propoz sa bann amannman ki ou pouvwar san okenn problem.

Ki vre rezon? Eski vre rezon i annan pou fer avek eleksyon 2025? Rezon ki mon mansyon sa akoz ler sa Lalwa i pase, tou sa bann

keksoz i annan keksoz pour fer avek eleksyon.

Premye amannman pour amann Lartik 52 kot *clause* 1 i ganny revwar e ganny ranplase. Kot en dimoun ki ganny elekte Prezidan Sesel i pour servi lofis pour be term 5 an. Komansman dat ki i sermante dan lofis e son term i fini ler lot Prezidan Elekte i sermante.

Lartik 52 *clause* 5. Pour ganny *repeal* pour ki Prezidan pa pour kapab *resign* pour rod en nouvo manda, menm si Prezidan i war sa i neserer. Leksplikasyon ki nou'n ganny donner sa i neserer pour vin anliny avek term 5 an en Prezidan.

Mr Speaker, sa provizyon pa'n pran kont akoz lafason ki - (mon ava eksplike ou a konpran) - avek lafason ki'n ganny fer i pe santre, pe donn lenpresyon sa i bezwen ganny fer pour Prezidan ki vini.

Me selman i pa fer mansyon ki a konnen moman ki Lasanble Nasyonal i pe fonksyonnen dan son manda, avek deryer i kapab tire en Prezidan si i le.

Menm si lespri sa *clause* sa Konstitisyon, sa lenpresyon ki pe donner se ki Prezidan pour reste dan lofis pour 5 an. I pa leka si i de tyer Lasanble i deside, i annan rezon valab pour kapab tir Prezidan.

I veditur ki sa lartik i pa neserman vi ki Lasanble Nasyonal pa'n ganny mansyonnen ladan. I pa neserman ki Prezidan oubyen dimoun ki par deryer sa bann propozisyon pe fer en keksoz ki tre byen.

Lartik 55 pour ganny *repeal* e pour ganny ranplase, ki ler Prezidan i *resign*, oubyen ler Prezidan i ganny tire dan lofis, en eleksyon i devret ganny fer pa pli tar ki 3 mwan en fwa ki lofis i vin *vacant*.

Vis-Prezidan pour desarz fonksyon Prezidan ziska 14zour, mon repete 14 zour ki en dimoun in ganny elekte dan Lofis Prezidan.

Mr Speaker, *VP* ler i pe donn nou son larepons. I devret kapab eksplik nou aköz ki pour sa enn *clause*, 14 zour i ase pour tranzisyon pouvwar, me dan ka *clause* avan sa, Prezidan i bezwen en mwan pour kapab pour sa bann tranzisyon pour kapab pran plas.

Sa i veditur an realite Mr Speaker, Prezidan aktyel pa neserman bezwen en mwan, pour ler Prezidan Herminie ganny pouvwar, pour li sermante.

I devret kapab fer deswit. Mon le rapel Seselwa avek Manm Lasanble ki 2020 ler eleksyon ti fini, 6 zour apre ki eleksyon ti fini sermantasyon

ti ganny fer. Pa ti bezwen 14 zour, pa ti bezwen en mwan.

Akoz Seselwa pour elekte Dokter Herminie i pour komans redres sa pei imedyatman, pour tir sa pei dan sa presipis ki i ladan avan i tro tar.

Mr Speaker, ler Lofis Prezidan i *vacant* swa apre lanmor oubyen dapre Lartik 53, Vis-Prezidan pour asim Lofis Prezidan pour leres term ki reste. Be Mr Speaker, eski sa pa pas baton? Mon ava eksplike.

Ler sa mo "pas baton" ti ganny entrodwir dan Lasanble. I ti kler sete ler en Prezidan i donn sa responsabilite avek son Vis-Prezidan pour kontiny en term.

E la menm keksoz ki pe dir ; sa Vis-Prezidan i kapab, i kapab kontiny manda ki reste. Sa i dan sa propozisyon i kler. E en lapros Mr Speaker ki *LDS* ti toultan kont e menm konvenk son bann siporter ki zot pa pour toler pas baton, zot ti menm anmenn plakar e fer deklarasyon an piblik.

Ki zot plito an faver fer nouvo eleksyon dan bann sironstans parey ler i arive. Rezon ki zot in donner, se ki Seselwa ti vot pour sa Prezidan pa ti vot pour Minis Dezinyen oubyen Vis-Prezidan, menm si Vis-Prezidan ti *running mate*



Prezidan ler eleksyon ti ganny fer.

Akoz alor ki la prezan pas baton i ok? Voter pe note. Mr Speaker, Eleksyon Prezidansyel pour dezormen ganny fer 5 semenn avan manda Prezidan Larepiblik i fini. Rezon ki'n ganny donner, se ki sa a permet ase letan pour en dezyenm *round* si i neserer e pour fasilite tranzisyon pouvwar.

Mr Speaker, tou lede rezon ki'n ganny donner i pa fer sans. An 2015 eleksyon ti al an dezyenm *round* e i ti ganny fer san okenn problemm avek sa Konstitisyon ki egziste ozordi.

An 2020 tranzisyon pouvwar ti ganny fer san okenn problemm. Menm si ti de diferan ladministrasyon ki ti pe fer sa tranzisyon. I kler ki sa leksplikasyon pa zistifye pour amann Konstitisyon. Eski alor i annan lezot azanda?

Mr Speaker, dan sa bann lamannman i osi annan masyon ki Eleksyon Lasanble Nasyonal i fer ansanm avek Eleksyon Prezidansyel. Ou konnen napa nanryen dan sa Konstitisyon ozordi ki ti anpese pour fer sa de eleksyon ansanm.

*Clause* 79(8) sa ki enteresan se ki Lasanble Nasyonal son term i pa pour plis ki 59 mwan. Me selman

Lofis Prezidan son term pour 60 mwan. Akoz sa? Ki sa i vedir an term monneter.

Mr Speaker, avan ler mon konklir mon le fer remarke dan lespri latransparans. En keksoz ki nou'n toultan tande isi anndan e menm parmi *Leaders LDS*, ki sa lamannman ki dir Eleksyon Prezidansyel i devret ganny fer 5 semenn avan manda Prezidan aktyel i fini, napa masyon ki si rezilta eleksyon i ganny anonse dan premye semenn e pa bezwen al dan dezyenm *round*, dan sa ka, sa 4 semenn ki reste avan sermantasyon, nouvo Prezidan. Ki bann demars ki i pour kapab ganny fer oubyen ki pa pour kapab ganny fer?

Akoz ki napa okenn detay kler lo la? Pandan sa en mwan ziska sermantasyon, kwa ki Prezidan sortan i bezwen fer ki i bezwen reste ankor 1 mwan dan lofis? Napa okenn masyon oubyen detay ki pour ganny diskite ant Prezidan Elekte e Prezidan sortan.

Eski sa i vedir ki pandan sa en mwan Prezidan Elekte pour zis asize pour esper en Prezidan ki'n perdi eleksyon ler i pare pour sermante, ki pour sermantasyon ki nouvo Prezidan *elect* pour bezwen sermante? Pandan sa en mwan ki kalite keksoz ki sa

Prezidan ki'n ganny elekte pour ganny drwa fer.

Eski i pour kapab ganny sekirite Leta? Eski i pour kapab ganny transpor Leta pour son bann deplasman? Eski dan sa en mwan i pour ganny okenn sipor bidzeter? Eski dan sa letan i pour annan akse avek okenn keksoz Leta?

Akoz Dokter Herminie pour annan bokou travay pour fer. Mon ti a voudre ki Vis-Prezidan i donn nou en leksplikasyon lo la. Akoz dan sa en mwan napa okenn keksoz ki spesifye kwa ki pour ganny fer ant sa de zonm, kwa ki kapab ganny diskite e ki bann serten keksoz ki enportan ki zistifyab ki sa en mwan i bezwen la?

Akoz mannyer sa in ganny drafte sa amannman i pa kler. Rezon ki i pa kler se akoz in ganny mete dan sa 5 an ki form par dirasyon term Prezidan. E sa ...

### **MR SPEAKER**

15 minit Onorab

### **HON CHURCHILL GILL**

E sa vedir ki dan sa letan en kantite keksoz i kapab pase e i pour ganny pase anba leskiz ki manda pa ankor fini.

Alors nou ekspekte ki nou ganny klarite lo la e si i annan keksoz vreman ki sa *President elect* i kapab fer, oubyen tou keksoz i bezwen

kontinyen ganny fer par Prezidan ki dan lofis. Mersi Mr Speaker.

### **MR SPEAKER**

Mersi Onorab. Laparol pour Onorab Regina Esparon.

### **HON REGINA ESPARON**

Mersi Mr Speaker. Bonn apre midi tou dimoun a lekout. Mr Speaker, mersi pour donn mwan sa sans pour dir de mo lo sa Prozedlwa ki devan nou Lasanble.

Mr Speaker mon siport sa *Bill* pour ki i annan en 11enm amannman dan nou Konstitisyon e la mon pour poz en kestyon. Eski *US* ti vyol drwa Lepep Seselwa letan i ti pe amann sa Konstitisyon ki nou pei ti adopte 1993?

Oubyen zot ti pe ranpli en mankman ki zot ti santi i annan dan Konstitisyon pour zot fonksyonman? Ti napa problem sa.

Mr Speaker, zis pour fer rapel Lasanble, ki 2020 ler Lepep Seselwa ti donn *LDS* en mazorite avek de tyer dan Lasanble, nou manifesto ti kler depi komansman ki *LDS* pour fer sa sanzman a en moman donner dilon son manda.

Ki i fer li dan dezyenm lannen; ki i fer li dan katriyenm lannen parey nou pe fer la, sa ti'n fini ganny previ ki ti pour arive.

Parski nou en parti ki krwar dan ranforsi sa prensip responsabilite e etabli en sistenm transparans e demokratik ki pli solid.

Mr Speaker, lentansyon sa lamannman, se pa pour prolonz letan pour reste o pouvwar, parey US i fer nou krwar.

Me i senpleman prolonz sa peryod tranzisyon olye zis donn 24er pour fer li, ki i donn en letan omwen pour prepar sa *handing over* parey Onorab Henrie in fer resorti, ki pour deza tonm dan sa manda 5 an sa Prezidan sortan letan ariv ler pour sanze.

Se sa ki sa peryod ki pe ganny propoze i deza e sa peryod ki pe ganny propoze i deza dan sa 5 semenn avan ki sa term i fini. Ki pour osi donn letan ideal pour si i annan en dezyenm *round* eleksyon. Sa osi i a ganny kalkile. Ki i ankor dan sa dirasyon letan avan ki sa 5 an i ekspire. Oli problem ki zot pe ronfle?

Mr Speaker, parski la Gouvernman pa pe get zis sa - pa get zis sa provizwar pas sa responsabilite avek sa lot Gouvernman ki pour vini, me i pe osi gete ki mannyer nou ranforsi sa responsabilite e rann kont.

De eleman ki pour ogmant sa konfyans dan nou pep e met nou pei lo en lot nivo. An menm tan Mr

Speaker, nide se pa pour bouz - nide se pour bouz devan etabli vre demokrasi, e retir sa laspe egois e enzis, kot en dirizan politik pa ava pe zve avek dat eleksyon.

Sa Lalwa ava deza fer sa provizyon e dat pa ava baze lo en kapris Sef Deta oubyen lo ki Ali-Ali i war ler i bat son kart laba Maison Du Peuple.

I a dan nou Konstitisyon e i a gid nenport ki Gouvernman ki vin i o pouvwar. Mr Speaker, mon war ki sa Prozedlwa i enn i en pa enportan dan listwar nou pei e dan sa transformasyon ki *LDS* pe fer.

Kot ler pei i etabli en dat fiks pour eleksyon ki a dan lavantaz tou akter, tou parti politik ek tou dimoun ki enplike i a konn egzaktman kan ki zot komans fer bann preparasyon e anpes en *snap election* osi.

Avek en dat fiks dimoun an zeneral dimoun i a kapab pli byen fer son plan. Si i anvi son konze dan letan eleksyon, konnen kan ki i pour voyaze pour sa enn ki pa reste Sesel ki anvi vin vote, i pour ed sa dimoun pli byen planifye son lavi.

Sa etidyan ki pe etidye i a konnen ki mannyer i balans son letid pour li kapab fer letan pour li vin vote. Bann lekol a *plan* zot legzanmen ki i pa tonm dan letan eleksyon

akoz bokou lekol i ganny servi pour eleksyon.

Mr Speaker, ozordi bann pei avek pli gran demokrasi parey Lanmerik i en legzanp. Kot dat eleksyon i ganny fikse dan en Lalwa e kot zot osi zot ti amann zot Konstitisyon depi menm dan bann lannen 1933.

Zot ti fer zot ventyenm amannman pour ki i annan en dat fiks pour eleksyon e etabli en peryod tranzisyon ki ekitab. E pour zot eleksyon i fer an novanm tou le 4 an. E sa peryod tranzisyon i ale ziska Zanvye son lannen answit.

Pour sa sikseser pran lofis ofisyelman en *swear in*. pourtant laba napa ni lili pour tire dan *White House*, ni dokiman pour kasyet. Napa ni *file* pour brile parey isi. I zis ki i donn letan pour prepar sa seremoni, *handing over* en pe pli byen pe fer li pli ofisyel dan tout transparans.

Mr Speaker, sel letan ki napa en peryod tranzisyon dan lavi en pei se letan bann ki lafen pouvwar zot pran pei par lafors. E nou konnen lekol parti ki annan rikord koudeta dan sa pei. Ler zot ti pran pei par lafors. Parski zot en parti ki krwar dan vyolans e vanzans. Bomaten nou'n fek tande kot Onorab Wallace atraver ou Mr Speaker, mannyer in koze i a pe ensit vyolans!

Mr Speaker sa Prozedlwa pour osi permet ki Gouvernman i fonksyonn san lenteripsyon e vin pli efikas. E asir en kontinyite e fonksyonnman efikas, pandan letan ki ladministrasyon pe prepare pour sanze ler i ariv son letan.

Si mon zorey in byen tande Mr Speaker, oa krwar mon tann demande ki Prezidan Herminie pour fer ler i ganny elekte. Pandan letan ki i pe espere pour *swear in*? Larepons i senp i pa bezwen prese pour sa.

Akoz i kler i pour bezwen esper tou dilon son lavi pour li vin Prezidan Sesel.

*laughter*)

### **HON REGINA ESPARON**

Si pa dan lannen de mil zanmen.

Mr Speaker, permet mwan tous en lot pwen. Nou ti aboli sistenm pas baton parski nou ti santi ki i en lenzistis. Parski i ti pe soutir kapris e si en Prezidan ki ganny elekte ki nenport ki ler i santi ki i anvi partaz en kou sa manda ek en lot dimoun. E i reste dan *background* i a *enjoy* son pansyon e i a donn en kou en lot son dalon pour dirize. Sa i montre en laspe iresponsab.

Annou get en kou zot rikord pas baton. Enn ler i bon fer zot mazine si zot in bliye.

14 Avril 2004 Albert Rene ti pas baton avek James Michel.

Sa menm Albert Rene la, ki'n mor, antere anba 10 tonn beton laba, Sanmdi zot ti pe sante "Albert Rene pa pour mor koumsa." Vre kanmaron!

E an 2016 James Michel ti son tour pas baton avek Danny Faure le 16 Oktob 2016, zis 9 mwan apre ki Lepep Seselwa ti'n konfyé li en nouvo manda Desanm 2015.

Ziz pour zot menm pep Seselwa, lekel parti politik ki annan sa manni pas baton? Eski LDS, oubyen US? E par kont sa lamannman pa pe pas baton, me i pe senpleman en propozisyon ki pour ganny mete an ka en Prezidan i tonm malad e i vin *incapacitated*.

En keksoz i kapab arive avek nenport ki. Ki annan en laliny kler, pour ki sa Vis-Prezidan i pran labar e i fini sa manda. E sa i diferan ek pas baton e taye aköz balans – e taye aköz balans Lasanble i annan lamazorite lopoziyon parey ti le ka ek 15 lo 10 an 2016.

Mr Speaker, sa Prozedlwa pe osi fer provizyon pour ki nou sanz non-Minis Dezinyen pour ki nou ranplas li ek Minis Prensipal. En propozisyon ki mon napa okenn problemm avek. Parske sa i vedit li sa Minis pli o dan kad bann Minis.

E sa i fer bokou sans parski dan labsans Prezidan ek osi Vis-Prezidan an prensip se li ki pran sarz pour fer sir fonksyonman Legzekitiv i deroul byen.

Mr Speaker, ler en Prezidan i ganny elekte atraver en eleksyon ki zis e lib, atraver bwat vote. I deservi son manda ek lafyerte *focus* lo sa bezwen ganny fer e annan en vizyon kler, lo ki mannyer pour fer avanse la demokrasi e fer en diferan dan lavi son pep.

Ensi ki bann dimoun aze pour ed zot viv dan dinyite. Zisteman "Vyei dan dinyite", zisteman ki ti en term selebrasyon Lazournen Dimoun Aze yer.

Mr Speaker, sa Prezidan Elekte atraver en eleksyon zis e lib ti fer en rankont yer pour onor nou bann dimoun aze. Me malerezman zot, zot ti afront nou bann dimoun aze par pa asiste sa seremoni.

Mersi Msye Prezidan, mersi bann dimoun aze e osi lezot ki ti fer sa zour, sa rankont yer inisyé ensi ki nou bann DA e MNA lo nou kote latab. Parski touzour i touzour en loner pour rankontre nou bann dimoun aze e ed zot detann.

Mr Speaker, sa lamannman konstitisyonnel ki pe ganny fer ozordi e ki pour pase. I enn ki enportan pour lavenir e pour sa zenn

zenerasyon ki pe vini. Parey en madanm aze ti dir mwan yer, sak zour ki nou viv i en kado sorti an o.

E mon poudir osi ki sak zour ki Prezidan Ramkalawan i pase dan sa lofis. I mazin sa ki byen pour sa pep ki'n met li la a latet sa pei. E sa lamannman i enn - ki en pa dan sa direksyon pour rod sa ki pli meyer pour son pei. Kontrerman ek en boug ki kontinyen reve tou le zour.

E ler i leve dan bomaten i krwar ki son rev in fini vin vre, in fini ariv o pouvwar. Mon dir li reste dan son rev, kontinyen dormi e les Prezidan Ramkalawan travay.

Sote, pile, ronfle lamannman pour pase Mr Speaker. Avek sa de mo mon remersye ou.

### **MR SPEAKER**

Mersi Onorab. Laparol pour Onorab Samynadin.

### **HON KELLY SAMYNADIN**

Mersi Mr Speaker. Bonn apre midi VP ek delegasyon e tou dimoun a lekout. Mr Speaker, 11enm lamannman Konstitisyon Sesel, i en propozisyon Lezislativ tre kritik, ki viz ver adres levolisyon bann bezwen nou Nasyon.

*Fortification* fondasyon nou demokrasi, asire ki nou Konstitisyon i reste en

dokiman ki vivan. E ki annan kapasite pour adapte ek bann demann dinamik nou sosyete.

En Konstitisyon pa en lenstriman ki devret reste statik. Me i plito la baz nou sistenm legal, e politik ki vedir ki devret ase rezilyan pour kapab grandi e sanze anmezir ki en Nasyon i devlope.

11enm lamannman nou Konstitisyon i en afirmasyon sa prensip. I rekonnèt ki pour Sesel i kontinyen prospere, nou bezwen asire ki nou bann Lalwa i reflekte bann valer, laspirasyon e larealite pratik nou pep.

Dan son misyon koman en Gouvernman pour fasonn en meyer pei, ranforsi la demokrasi e asir bonn governans. *LDS* pe ozordi akonplir en lot lobzektif son manifesto.

Revwar nou Konstitisyon ek Lalwa pour ki zot kapab reponn a nou bann laspirasyon demokratik. E se sa ki nou pe fer depi Oktob 2020 Mr Speaker. Mon pour sit detrwa rezon aköz ki sa lamannman i vreman enportan pour nou pei e nou pep.

Premyerman dan leker sa lamannman i repoz en komitman pour en ranforsisman demokratik. Sa *Bill* i entrodwir bann reform entegral, ki viz ver logmantasyon latransparans

ek rann kont dan nou lenstitisyon Gouvernman.

I asire ki bann ki'n ganny konfyè dan lofis piblik i servi avek lentegrite e reste responsab anver Lepep Seselwa.

An rafinan bann *checks and balances* dan nou Konstitisyon. Nou pe ede sofgard kont okenn lerozyon ki kapab detri bann prensip demokratik ki sa Nasyon i tenir tandreman.

An fezan sa nou pa pe selman prezerv nou demokrasi, ozordi me nou pe osi sekiriz li pour nou bann fitir zenerasyon. Avek sa lamannman, nou pe bouz en lepa pli devan, pour asire ki sa konfyans ant Lepep ek Gouvernman pa zanmen kase.

Dezyenmman Mr Speaker. Sa lamannman pe osi garanti stabilite ek kontinyite, parey plizyer Manm lo sa kote latab in fer referans al lo la.

En bann provizyon kle sa bil se pour asir stabilite dan nou sistenm politik. Ki defann sa fe ki okenn politisyen pa devret annan drwa dikte dat eleksyon.

I ava aprezan en lobligasyon dan manda Komisyon Eleksyon. Sesel in fer bokou progre signifikan pandan sa dernyen 4 an. Se pour sa rezon ki i enportan ki nou prezerv sa stabilite politik

ki neseseur pour krwasans e devlopman kontinyel.

Sa lamannman i entrodwir bann provizyon pour anpes bann blokaz politik, rasyonaliz prosedir ki desizyon i ganny fer, e asire ki la gouvernans i reste efikas. E ki reponn anver bezwen nou pep.

Pli boner Mr Speaker, nou'n antann en Manm Onorab lo lot kote latab pe averti nou, ki lannen prosenn an 2025 letan *US* i ganny zete dan bin listwar pour leternite, zot pour konteste, zot pour desann dan lavil.

Pe ensit vyolans aköz dapre zot *LDS* pe *plan* vol eleksyon. Onorab, atraver ou Mr Speaker, ganny sa byen kler, ki sa pep malgre ki'n ganny batir dan vyolans le 5 Zen 1977, nou pa pour – nou pa oule ankor versman disan.

O kontrer nou pe donn zot loportinite, 1 an avan pour zot prepar zot byen boner pour ankor en lot gran defet. I paret Oktob 2020 pa ti ase pour zot. Be pa trakase Septanm 2025 zot pour konnen ki savedir *pack and go*.

Mr Speaker, bann reform ki pe ganny soulinyen dan sa lamannman i fer en provizyon en kad legal pour stabilite lonterm. E osi garanti konfyans nou bann partener ki swa lokal ou enternasyonal

kot prosperite kontinyel nou Nasyon i konsernen.

En lot pwen enportan, se sa bann lamannman konstitisyonnèl pe reflekte lavwa e volonte Lepep Sesel. I en *Bill* ki reponn direktman a bann konsèrn e laspirasyon sa pep.

E sa se ki pei i ganny gouvènen dan latransparans e ki nou konstitisyon i reflekte bann valè ki nou koman en pep nou tenir a ker, tel ki laliberte, legalite ek lazistis. Mr Speaker, mon santi ki letan nou pe bouz devan avek sa lamannman istorik. Nou bezwen mazine ki lafòrs nou Konstitisyon i sorti dan linite nou pep.

Mon pe apel anver tou mon bann koleg Onorab pour debout an faver sa *Bill*. An fezan sa nou pour pe demonstre nou komitman pour lentere Nasyon anver lavenir, nou lavenir partaze ensi ki bann prensip dirab nou demokrasi.

Mwan mon enn parmi bann Manm lo sa kote latab ki pour lev mon lanmen byen o avek lafyerte pour vot an faver sa *Bill*. Akoz mon fortman krwar ki nou Konstitisyon koman Lalwa siprenm lo later, pe devret met prensip *rule of law* an aplikasyon.

En lot lobzektif pour nou manifesto. Malgre ki nou'n ganny dir ki nou en bann sez

vid, me mwan koman en Manm ki'n konnen ki savedir debout e konteste dan en eleksyon, mon oule fer Onorab Loze konnen atraver ou Mr Speaker, ki zour mon war son figir lo en *billboard*, oubyen son non lo en *ballot paper* e non pa fye lo en tiket pour nanryen avek son parti, la mon a pran leson avek li.

Antretan mon a les son bann koze mirak koule byen trankil parey delo lo fey sonz. Onorab Aglae Mr Speaker, atraver ou, si ou Gouvènmant ti get dan *welfare* Seselwa. Si zot ti pe ganny posibilite *to be what you want to be*, parey ou'n dir nou taler, me sey dir mwan akoz ki ozordi nou vwar zot dan 10 sez vid dan Lopozisyon ozordi? Sa pti lekspresyon *karma* ki ou'n servi taler, i fer tou byen ek zot.

Preanbil nou Konstitisyon i deklare ki pour nou mentenir Sesel koman en Leta endepandan. Ki swa politikman oubyen ekonomikman e osi mentenir *rule of law*, baze lo rekonesans bann Drwa Imen fondamantal ek laliberte ki'n ganny enskrir dan sa Konstitisyon e lo respe pour egalite ek dinyite bann *être* imen.

Avan mon terminen Mr Speaker, les mwan sit parol Prezidan Wavel Ramkalawan ki ganny trouve lo paz 5 nou



manifesto. “Sa Gouvernman ki mon pour dirize, pour konsyan ki nou pa la zis pour nou lekor, me pour nou ek nou pep.

Nou pour komans lo en nouvo paz, avek respe pour *rule of law*, pour bann lenstitisyon demokratik ki nou'n travay vreman dir pour anmenn an konsepsyon avek en komitman anver lazistis ek legalite. ”

E wi, Onorab Gill, atraver ou Mr Speaker, ou'n byen dir. Prezidan Wavel John Charles Ramkalawan pa pour bezwen en mwan dan lofis pour li prepar li pour li *handover*.

Akoz dezormen i pe al reganny elekte pour ankor en lot manda pour Lepep, par Lepep Seselwa. Kontan pa kontan!

Mr Speaker, sa ki sa *Bill* pe fer asire ki la demokrasi i kontinyen renye dan nou pei, retir pouwar dan lanmen politisyen e moderniz nou Konstitisyon sa dokiman vivan par ki leker nou Nasyon i bate.

Alors se pour sa rezon ki mon pe konfirm mon sipor total pour sa *Bill*. Mersi Mr Speaker.

**(APPLAUSE)**

### **MR SPEAKER**

Mersi Onorab. Bon, nou a termin deba par bann Manm. Mon a prezan apel Vis-

Prezidan pour per fon repons lo deba.

### **VICE-PRESIDENT AHMED AFIF**

Mersi bokou Mr Speaker. Bonn apre midi Mr Speaker; *Leader Business* Gouvernman, tou bann Manm Lasanble, tou dimoun a lekout.

Mr Speaker, i kler ki i annan ki'n koze, me atraver bann deba irelevan e ensinifyan ki mon'n tandé. Mon konklizyon sete, swa zot pa'n lir sa *Bill*, oubyen zot ti annan en sel bi. Vot non, akoz zot krwar zot rol se zis opoze, akoz se zot ki apel Lopozisyon. Zot pa konn zot vre rol. Zot in pri dan *gear*. E paret an plis i annan ki'n pri kan in santi en loder fromaz, zot in sot lo la, tay apre, apre in pri dan en ratyer.

Erezman avek nou bann Manm *LDS*, ki mon'n war zot in lir sa *Bill* an detay, zot in konpran. E i kler atraver zot entervansyon e leksplikasyon pour edik nou dimoun deor, ki pe osi ekout sa size atantivman.

E anvi konpran sa size enn pti pe pli byen. Parske parfwa ler ou lir Konstitisyon i en pe konplike. Pour sa bann ki'n travay dan sa fason konstriktiv, mwan mon dir zot mersi.

Lo lapar tou dimoun, ki pe ekout sa deba. Senpleman akoz in eklersi en Lalwa ki annan sitan lenportans pour nou demokrasi.

Sa 11enm lamannman, en lamannman enportan ki pour moderniz nou Konstitisyon. Non- selman sa i pour retir okenn lavantaz ki en politisyen i annan dan fikse dat eleksyon.

I pour retir proteksyon pour nenport ki kapab anmennen en ka kot Prezidan apre ki i kit lofis e osi anmenn lekonomi dan lafason nou fer eleksyon.

Akoz i permet ki eleksyon pour Lasanble Nasyonal e prezidansyel i ganny fer an menm tan e sov pei de dizenn de milyon Roupri.

Alor akoz annan en dat fiks? Senp tou Seselwa i a konnen kan eleksyon pour ganny fer. Enkli nou bann Seselwa ki deza lo rezis voter aletranze. E ki ti a kontan kapab fer plan pour vin vote. Sa ki nou pe fer se ki nenport ki Prezidan, ki o pouvwar pour napa lavantaz e kapris pour li demisyonnen, akoz i konnen movetan pe vini e i riske pa ganny eleksyon.

Alors i a fer eleksyon boner i a pran par e sirviv movetan akoz son lenformasyon privezye ki zis li ki ti annan.

Pour lezot parti politik ou kandida zot, zot ganny sans byen prepare e pa ganny pri dernyen minit pour al fer *t-shirt*, lansenny ek papye, menm avan zot in ganny sans fer zot preparasyon.

Alors nou tou nou pe benefisyé ek sa lamannman, parti ki o pouvwar, parti ki dan Lopoziyon, voter ki Sesel, voter aletranze. Be oli problem ek sa lamannman?

Apard zis dir zot pe al vole selman zot pa kapab dir mannyer nou pe al vole. Akoz fer Eleksyon Lasanble ek Prezidansyel ansanm? Me ankor i senp Mr Speaker. Redwir kou fer eleksyon e met pei lo en lafyev eleksyon dan en sel zefor. En sel batay e permet nou tou fer nou swa politik dan fason byen organize e efikas.

Ankor enn fwa vi ki dat pour deza ganny dir davans pour Eleksyon Lasanble Nasyonal, person napa okenn lavantaz e tou bann akter politik i ganny menm sans preparasyon.

Mon'n tann nonm sa zistwar pas baton par laport deryer. Pas baton ti ganny fer e nou'n tann plizyer Onorab dir sa, dan lepok *SPPF*, *US*, *Lepep*, kan en Prezidan ti demisyonnen avek lentansyon ki son Vis-Prezidan i pran baton ek li.

Be dan sa fason, zot pas pouvwar konsyaman e san eleksyon. Savedir sa Prezidan ki'n deside demisyonnen, aköz se li ki'n deside, ki son Vis-Prezidan pour vin Prezidan kan li i sorti.

Sa nou'n sanze, e i pa pour zanmen ariv ankor. Me la nou'n al enn pti pe pli lwen. Nou pe dir si ou demisyonnen, byensir ou pa pour bezwen annan eleksyon. Nou pe dir si ou demisyonnen byensir i pour bezwen annan eleksyon pardon.

Me safwasi, ou ki'n demisyonnen, ou pa pour kapab pran par dan sa eleksyon ki swiv. Aköz? Be akfer ou bezwen demann en manda ki ou'n gannyen, ou'n refize fini apre ou vin demann menm manda ankor? Be oli problem ek sa? I apel vole sa?

La zot akiz nou ki nou pe fer parey avek sa lamannman re-anmenn pas baton par laport deryer. Me non Mr Speaker. I pa parey ditou. Sel de lenstans kot Vis-Prezidan i kapab pran labar direktman ek Prezidan se dan de sirkonstans ;

Premyerman Prezidan i perdi son lavi e nou espere sa pa zanmen arive avek okenn Prezidan ki dan lofis. E dezyenm si sa Prezidan i ganny deklare malad oubyen enkapab fizikman ou mantalman, e sa i annan en

prosesis ki Onorab in eksplike ki Lasanble li menm i zwe en rol enportan ladan.

Mon krwar Onorab Bistoquet ki ti eksplik sa byen. Onorab Larue pardon. Alor sa se pa pas baton sa. Sa se en konsekans ki napa nanryen pour fer avek desizyon sa Prezidan pour li pas baton. Si ou tonm malad oubyen ou mor i pa ou desizyon sa. Se li ki deside pour mor pour pas baton?

Byensir non alor pouvwar i ganny pase avek sa dimoun ki'n ganny elekte lo menm tiket dan sa sirkonstans eksepsyonnel. I pa ariv toulezour sa bann keksoz. Kot personn pa fer desizyon pour pas baton. Kot laport deryer i vini ladan? Kot vole i vini ladan?

Mon'n osi tann sa largiman ki Prezidan pe fer sa lamannman aköz sa pour donn li en mwan anplis pour gouvernen menm si i perdi eleksyon. Ankor Mr Speaker, fo. E mon eksplike aköz i fo.

Nou Konstitisyon i fer kler ozordi, ki en Prezidan son manda se 5 an. 60 mwan, 12 mwan dan en lannen fwa 5 - 60 mwan. Anba sa lamannman nou pe senpleman permet nenport ki Prezidan. Pa zis sa Prezidan ki'n ganny elekte direktman pour deservi son 60 mwan oubyen son 5 an an plen. Aköz

se sa ki Konstitisyon i fer provizyon pour li. Sa son term.

Mon'n tann Onorab Pillay e mon krwar Onorab Lemiel osi i fer nou krwar ki Prezidan pour ganny en mwan an plis. Ankor i fo. Sa ki lamannman i fer provizyon se ki dat pour Eleksyon Prezidansyel, li i fikse.

E toultan i ganny fer sa sanmdi ki tonm en mwan avan sa term 5 an i fini. Setou. Dat eleksyon i fer en mwan avan son term i fini. Alor sa Prezidan ki dan lofis, si zanmen i perdi sa eleksyon en mwan avan son term i fini, i konnen ki i reste li en mwan pour li sed laplas.

E ansanm ek sa dimoun ki'n ranport eleksyon me ki pa ankor sermante. E alors i pa ankor vin Prezidan pour zot travay ansanm pour fer sa bon tranzisyon pouvwar dan lape e dan lord e lozik avek en kalandriye ki'n byen planifye.

Nou war sa plizyer Manm in mansyonnen Lanmerik aköz Prezidan i ganny elekte an Novanm, pran son fonksyon an Zanvyé. Zot, zot fer 2 mwan. Sa i zot sistenm.

Nou, nou pe propoz en mwan tranzisyon dan lord, dan lape e swivan en lozik kot sak Prezidan i kapab deservi son manda an plen.

Oli vole? Oli problem ki mon'n tann nonm sitan kantite laba. Ki pouvwar ki en

Prezidan sortan i annan dan son dernyen mwan dan son 5 an? Be ankor larepons Mr Speaker pour sa ki'n lir sa *Bill*, be i senp se pouvwar prezidansyel aköz i ankor Prezidan.

Me byensir se pa li ki'n ranport eleksyon. Ki li i reste li ankor en mwan dan son manda i pour bezwen annan en serten fason fer dan sa letan.

Si i abiz son pouvwar, i pour nepli annan liminite tou fason aköz sa nou pe retire. Dan sa lepok si eleksyon Lasanble i fer ansanm e son oponan, ki'n gannyen.

E li i deside pa konvok premye sesyon Lasanble dan son deryer mwan. Aköz i annan pouvwar i ankor Prezidan. Me personn pa sermante. Be ki Lalwa i pour pase alors li, tou sa pouvwar ki zot pe dir i annan? De tout fason si i konvoke pour li pas en Lalwa ki move, be sa Lasanble ki pa pe siport li, i kapab vot kont.

Alors ki labi ki pour annan? Ki pouvwar ekstra sa dernyen mwan dan son manda 5 an ki i pa pour desot 5 an, i pour donn li?

Ki pouvwar i pour annan? Pour li pous dimoun ki pa'n siport li? Pouvwar pas nouvo desizyon pour son sikseser fer fas avek serten dezord? Si larepons i wi, se sa

ki nou anvi fer, me pa sa lot Prezidan ki lanmenm la dan kontour kapab ranvers tou sa detrwa semenn kan i vin Prezidan. Oli problemn? Oli vole?

Ti annan en lot largiman ou kestyon ki Onorab Lemiel ki ti poze - sa sete sa bann lamannman si i pour aplik ek Prezidan ki la ozordi.

Be larepons i senp Onorab, Lalwa normal i aplik apartir ler i pase. In ganny fer dan tou sa bann lamannman dan lepase ki zot menm dan lepok parti *SPPF* ti pase. Pa bliye dan nou 11enm lamannman sa i apel 11enm ozordi. I annan plizyer ki'n pas dan zot lepok.

Kan sete zot Prezidan ki ti donn konsantman pour Lalwa vin an fors. Alor pa fer krwar sa premye fwa pe al arive. Lamannman Konstitisyon pe al pase, me selman fodre i vin anfors dan sa lot term sa Prezidan. Oli problemn e oli vole?

Mon pa war mwan. Mon tann dir ki si Prezidan ek Vis-Prezidan pa la, ek nou *Principal Minister* ki pe egzers fonksyon Prezidan, konmsi nou pour dan problemn. Me mon pa konnen ki zot pe enkyet. Limitasyon *Principal Minister* i kler, bann ki'n lir Lalwa.

I annan tou pouwar Prezidan, sof pa kapab dizourd

Lasanble Nasyonal. I pa kapab pous Minis, pa kapab donn pardon, pa kapab siny Lalwa, i pa kapab apwent ou retir serten o zofisye.

E i kapab fer tou larestan. I kapab konvok en *meeting* avek Sef Larme; i kapab konvok en *meeting* ek tou bann Minis. I kapab fer *Cabinet*. I kapab fer tousala.

Pei i kontinyen fonksyonnen. Be sa i standar preski partou kot nou konnen kan Sef Deta i pa dan pei pour lo vakans.

Pa bliye osi, ki Prezidan i reste Sef Deta li. E si zanmen i bezwen egzers son fonksyon pour en rezon enportan, i pour fer li menm si i aletranze.

Ozordi, 2024 i annan *WhatsApp* i annan *email*, i annan *Skype*, i annan tou keksoz ozordi. I annan teknolozi e fason fer pour moderniz nou demokrasi. Alor, annou pa pri dan bann lespri lepase oubyen ki pa proaktiv. Oli vole dan tousala? Oli problemn?

Mon tann osi dir par *Leader* Lopozisyon ki ti napa konsiltasyon. Ankor Mr Speaker, totalman fo. Sa lide premyerman ti dan nou manifesto piblik. Alor tou dimoun ti okouran, lentansyon parti ki o pouwar.

Pa dir zot pa ti konnen konmsi nou'n fek reve nou'n vin avek. Me atraver en

*meeting* Konsey de Minis, boner an 2024, Konsey ti met plizyer lide devan *Attorney General* pour konsiderasyon, enkli annan dat fiks pour tou lede eleksyon.

Size tranzisyon pouvwar. Kan i annan levennman tel ki lanmor, enkapasite demisyon sanksyon eksetera, konsey ti donn lenstriksyon *Attorney General* pour prepar en dokiman ki pour detay sa bann lamannman e diskrit avek Komisyon Elektoral.

Zot dir napa konsiltasyon? Sa ti ganny fer le 2 Me 2024. Mon pe donn zot dat. Answit, swivan diskisyon sa ti ganny elarzi pour enkli parti politik dan *meeting* le 13 Zen 2024.

Ti annan sa bann konsiltasyon. E Komisyon Elektoral li menm ti answit fer plizyer rankont dan bann distrik. Zot ti pas partou, pa tousala ki dimoun ti vini, solman ti envit zot.

Kot zot osi zot ti partaz plizyer sa bann lide propozisyon elektoral. Ki finalman pour annan konsekans legal lo lamannman konstitisyonnel. Answit nou ti propoz en *Bill* apre tousala in pase en *Bill* prezan i ganny drafte.

E la i ganny met parey Lalwa i ganny fer provizyon en *Bill* i ganny met devan Lasanble Nasyonal. E avan i

vin la dan sesyon i al dan *Bills Committee*, zot ganny sans lir, zot ganny sans fer propozisyon. Zot menm kapab si zot ti annan vreman kot zot in war ki bor pe al vole.

Zot ti a vin ek sa bann *amendment* ek sa *72 hours Notice* pour dir, e lala kot amannman 4(3), konmsi zot pe al vole. Nou, nou pe dir sanz sa. Be oli? Zot napa. Savedir tou sa bann largiman i totalman vag e fo. Alor pour mwan i fo ler zot dir ti napa konsiltasyon. I fo.

E i malonnet pour zot akiz Komisyon Elektoral ki zot napa zot lendependans ki nou, nou respekte dayer. Nou krwar se bann profesyonnel ki travay isi.

Zanmen zot pran lord ek *State House*. Zot annan zot prop lide. Nou, nou annan nou lafason. Parti politik i annan son lide, toultan nou koz ek zot.

Non Mr Speaker. Gouvernman i propoz Lalwa. An konsiltasyon ek tou parti prenon Lasanble apre i a vin devan zot. Zot aprouv Lalwa baze lo son merit ki nou pe fer ozordi.

E si tou i al annord, Prezidan pour donn son konsantman lo lezisasyon final ki zot met devan li sorti kot Lasanble Nasyonal.

Nou, nou swiv Lalwa Sesel. Tou prosedir pour sanz

Lalwa pe ganny swiv dan en fason demokratik. Si ou pa kontan la demokrasi pa bezwen saboul bann ki respe li.

Pour fini Mr Speaker, mon le konklir ki sa bann lamannman i reprezant en promes ki nou, nou parti LDS ti fer ek pep Seselwa. En promes ki nou'n garde ziska ozordi.

Mon'n tann zot koz lo manifesto nou pa'n gard promes – ou a krwar konmsi zis sa ki nou'n deside anmennen. Me zot bliye bokou keksoz ki annan dan manifesto.

Zis mon a *remind* zot lo paz 10, ler ti dir sa Gouvernman si LDS i vin o pouvwar nou pour ede tir sa pei dan COVID ek tou sa bann problemn.

Be pa laprev i la. Kan zot, zot ti dir nou, ferm pei, pa vaksinen zot ti ankouraz dimoun pa vaksinen, nou ti fer lekotrè, nou'n tir pei dan COVID. Dan en fason ase byen. Ozordi pei pe viv ankor.

Lo paz 27 nou ti dir nou pour fer en lalit serye kont drog. Nou pour koup eroin e cocaine ki pe antre dan pei. Nou pa'n fini problemn drog nou. Selman konbyen dav ki la ki nou'n atrape? Konbyen ki nou'n brile konbyen ki nou'n koule? Konbyen zot, zot in fer zot?

Paz 30 ler nou, nou'n dir nou pour donn lakaz nou dimoun e nou pour fer. Zot ki zot ti dir. Non arete pa fer lenfrastruktir, pran larzan zis donn *welfare* e donn saler. Se tou ki zot konnen. Nou, nou'n fer en lakaz parey manifesto. Si zot war Bel Ombre i annan, plizyer distrik, Cascade i annan. Zot konnen, partou nou pe fer. Kot nou kapab avek resours ki nou annan.

Paz 32; ki koz lo ki mannyer nou pour adapte ek sanzman klima. Sanzman klima, be pa nou'n fer miray Anse Gaulette, pa nou'n fer miray Beau Vallon, pa nou'n fer miray Cap Samy, partou kot lerozyon ti pe pran nou pe aranze.

Me tousala i dan manifesto. Tousala nou pe travay lo la. Be si Onorab Gill i pas en kou laba get en kou. Ler nou pe koz lo paz 35. Nou pe koz lo lazènes.

Dan nou paz 35 nou manifesto, 'Youth'. Nou'n met en nouvo *tartan track*, ki tou sa letan sa *stadium* ou a dir ti pe tonm an rin, nou'n aranze.

Nou annan en nouvo tennis court, la ozordi partou ou war bann zenn ozordi pe vremen al lo teren pe travay. Bann la in ganny en nouvo souf.

Tousala ti dan nou manifesto sa. Selman mon krwar zot pa'n war e zot sel

keksoz ki zot in war pe vole solman personn pa'n kapab dir nou ki bor nou pe vole.

Alors mwan mon le senpleman dir avek zot, ki sa bann lamannman ki la i reprezant modernizasyon. Meyer balans dan pouvwar pour nou tou. Politisyen koman voter.

I annan plis responsabilite. I fer bann dat kler, i fer prosedir kler, bann manda i ganny konplete parey Konstitisyon i fer prevwar. Si 5 an ou fini 5 an. I anpes spekilasyon e labi pouvwar.

Sa lamannman i pour anmenn nou Konstitisyon, nou Lalwa siprenm lo en pli o nivo. Fer nou tou fyer e donn nou sa ki meyer touzour.

Mon konnen Speaker la pour fer nou vote. E se la ki zot pou vwar lekel, ki anvi protez politisyen menm apre ki son term in fini. Nou pour war la, parske nou, nou pe dir fer lekotrer.

La ki nou pou vwar lekel ki anvi ki pouvwar i reste dan lanmen Prezidan pour li kapab desid dat eleksyon. La nou pour war ler pour fer vote Mr Speaker.

Mon remerci tou bann Manm ki'n konpran nou. E ki'n konpran akoz sa bann lamannman i nesaser. Mon espere ki tou dimoun deor ki pe ekoute in konpran poudir nou pe fer sa an bonn fwa. Nou

senpleman anvi ki nou sistenm eleksyon i vin senp.

Tou dimoun i konnen ki zour eleksyon pour ganny fer. E se pa mwan, se pa mwan ki'n anons dat eleksyon. Ankor fo. Mwan mon ti dir e zot toultan fer sa zot. Zot mank en bout dan sa ki ou dir. Toultan zot manipil sa ki en dimoun in dir zot.

Mwan mon ti dir, si Lalwa i pas parey nou pe prevwar eleksyon pour ganny fer le 27. Si Lalwa i pas parey nou pe prevwar. Lalwa pa ti ankor pase, pa ankor pase ziska ozordi.

Mon ti'n fer sa. Be mon a donn ou dat, mon a donn ou dat alor si Lalwa i prevwar parey la. Mon a donn ou dat pour Oktob 2030. Ki manda si tou keksoz i al dapre plan, pour le 25 Oktob 2030 ki manda pour fini.

Sa Prezidan ki pour gannyen, *then* i pour vin le 28 Septanm 2030. E pour manda ki fini le 25 Oktob 2035, mon pe zis swiv sa 5 semenn ler ou mars par deryer. E 2035 i pour le 29 Septanm 2035.

Alors la ou pe al dir mwan ki'n anons dat eleksyon. Mon'n anons pour 4 an davans. Be zot largiman pa fer sans Mr Speaker.

Mon krwar mon'n montre poudir, nou, nou pe travay dan en fason lozik, en fason



kler, en fason transparan e fason pour met nou modern.

Mon remerci tou bann Manm ki'n ed nou pour nou kapab fer sa travay, pour met en Konstitisyon modern devan nou pei ki tou dimoun dayer pour fyer.

Menm bann partener etranze enternasyonal zot krwar, zot zalou nou zot krwar poudir zot ti devret al dan sa direksyon.

Alor mon remerciye zot davans pour vot an faver lo staz merit sa Prozedlwa. Mersi bokou Mr Speaker.

### **MR SPEAKER**

Mersi Vis-Prezidan. Mon ava apel bann Manm pour vot lo *Bill* dan *general merit*. Manm ki an faver lev lanmen silvouple. Mersi. Manm ki kont.

Lo *general merit Bill* pour *Formal Reading Constitution of the Republic of Seychelles (Eleventh Amendment) (No. 2) Bill, 2024*.

24 Manm in vot pour, 7 in vot kont. Napa abstansyon. Donk, mon kapab deklare ki sa *Bill* in pase par Lasanble lo *general merit*. Annakor avek Lartik 91 Konstitisyon ki demande ki i ganny aprouve par de tyer Manm Lasanble.

E prezan Madanm Deputy Clerk i kapab fer *Second Reading*.

### **MADAM DEPUTY CLERK**

Mersi Mr Speaker. *A Bill for an Act to amend the Constitution of the Republic of Seychelles*. Mersi.

### **MR SPEAKER**

Mersi. Lo kote *Bills Committee* dan versyon ki mon annan mon annan final, mon pa war bann amannman. I annan amannman lo sa *Bill*?

Mersi nou a pas dan Staz Komite pour nou pran bann lamannman. Wi, wi, wi ou annan rezon, ou annan rezon.

Mon ti dir – mon ti dir wi, *Leader* Lopozisyon pour kapab antre apre *break*. Yes mersi. Nou a pran en *break* i 4 er 18 la. I 4 er 18. Nou a pran en *break* i 4 er 18, nou a rebran 4 er 35. Mersi. 4 er 35.

### **(BREAK)**

### **MR SPEAKER**

Bon, nou'n pas dan *Committee Stage* nou pou pran amannman. En keksoz ki mon oule fer kler nou pa pe al pran okenn kestyon lo size merit sa *Bill* ki nou'n deza pas lo la dan deba e ki Vis-Prezidan in deza eksplike.

Si i annan kestyon teknik lo *wording* ki nou pou adres avek par egzanp *Attorney General* sa nou a pran. Nou pa pe al pran okenn deba ant Manm avek *panel*. Mersi.

Onorab Andre, ou'n pare pou diriz *amendment*?

**HON CLIFFORD ANDRE**

Mersi Mr Chair. Mr Chair, *Bills Committee* letan nou'n pas dan *Bill*. Nou'n ganny notifiye selman ki *LGB* i annan trwa *minor amendments*, so mon ava les li propoz son bann *minor amendments*. Mersi.

**MR SPEAKER**

Byensir, *LGB* endik nou.

**HON BERNARD GEORGES**

Mersi Mr Speaker. Mr Speaker, mersi pou donn nou sa loportinite. Efektivman mon annan trwa pti propozisyon lamannman ki mon ti a kontan met devan.

E mon demann ou permisyon pou ou servi *proviso* anba seksyon 72(1). Akoz zot vreman bann *simple amendments* e zot ava konpran Mr Speaker nou'n - e mon'n konsilte avek *Attorney General*. Premye lamannman propoze i paz 6, *proposed article* 55(1).

**MR SPEAKER**

Kontinyen Onorab Georges.

**HON BERNARD GEORGES**

Sou-Lartik (2) dezyenm laliny dernyen mo zot ava vwar i met;

-

*“The incumbent President shall not be eligible to stand as*

*a candidate at the election held immediately following his resignation or removal from office under article 54”.*

Se sa mo “*his*” annefe nou'n regarde dan *chapter* ki annan pou fer avek Prezidan son *gender* zanmen i ganny mansyonnen.

E mon demann ou permisyon pou *move* ki sa mo “*his*” i ganny ranplase par “*the president’s*”. So “*The incumbent President shall not be held immediately following the President’s resignation or removal*”.

Pou anmenn li anliny avek larestan sa *chapter*.

**MR SPEAKER**

Mon krwar i bann *minor amendments* ki ou abitye fer. Si amwen ki *panel* i lev en obzeksyon lo bann pwen ki ou pe mete, ou kapab konsider li aksepte.

**HON BERNARD GEORGES**

Mersi. Annefe tou le trwa i dan menm laliny.

**MR SPEAKER**

*Hold on*, Onorab Pillay ki pwen ou annan?

**HON SEBASTIEN PILLAY**

Mersi Mr Chairman. Mr Chairman, mon pwen i lo konstitisyonnalite lamannman ki pe ganny fer anba 4(a) baze lo

leksplikasyon e lentansyon Gouvernman ki nou'n ganyen an finisyon *merit stage* lo *Bill*.

Mon oule demann klarifikasyon avek *Attorney* Zeneral si i konstitisyonnèl dan lespri Konstitisyon sa ki pe ganny fer?

Par lefe ki Vis-Prezidan in dir avek nou koumsa ki poudir dan sa peryod tranzisyon ki en mwan. E nou konpran ki manner ki sa i vini akon konstitisyon i prevwar ki en manda i 5 an.

Me ki eleksyon pe fer avan terminasyon sa manda 5 an, dan sa peryod tranzisyon sa Prezidan e sa i partikilyerman konsern Lartik 4, seksyon 4 lamannman Lartik 52.

Dan sa konteks tranzisyon sa Prezidan ki la i annan en *President-elect* par deryer i kapab fer bann desizyon. Me ler i enplike ki si i fer bann move desizyon, sa *President-elect* i kapab vini vin koriz son desizyon.

Mr Speaker, Konstitisyon i prevwar ki en dimoun i selman Prezidan Sesel ler in ganny *sworn in* koman en Prezidan, oubyen ler eleksyon in ganny fer pou en lot Prezidan.

Alors i teknikman fer sa ki nou pe fer i kont lespri nou Konstitisyon, par les en

dimoun dan lofis, apre ki in fini perdi en eleksyon.

So i in bezwen annan en leksplikasyon kler lo konstitisyonalite sa ki nou pe fer dan Lasanble Nasyonal Mr Speaker.

### **MR SPEAKER**

Mon pa byen ekipe pou reponn lo Konstitisyon. *Attorney General* oule adrese?

### **ATTORNEY GENERAL FRANK ALLY**

Mersi Mr Chairman. Mr Chairman, mon pa'n tro konpran sa kestyon. Me selman mon krwar ki nou pe - ki mon krwar Lasanble pe propoze fer e ki Prozedlwa i annan devan Lasanble se en amannman Konstitisyon.

So mon en pti pe pa apresye ki barenm nou servi pou en amannman Konstitisyon. Vi ki sa Konstitisyon li menm li i pli o, i Lalwa Siprenm.

E li i pe amann son lekor atraver Lasanble Nasyonal. E i pe kree en sityasyon kot en Prezidan ki ganny elekte i pa vin Prezidan ziska ler ki i pran serman. Mersi.

### **MR SPEAKER**

*No argument.* Onorab Georges kontinyen.

### **HON SEBASTIEN PILLAY**

Be savedir Konstitisyon pa respekte drwa Lepep Mr Speaker.

**MR SPEAKER**

*No argument, no argument.* Onorab Georges kontinyen avek ou amannman.

**HON BERNARD GEORGES**

Mersi.

**MR SPEAKER**

Onorab Georges. *Next.*

**HON BERNARD GEORGES**

Dezyenm lamannman Mr Speaker ki mon pe propoze i lo paz 11. Amannman of *Schedule 3*, paragraf 4, "*Time of presidential election*", sou seksyon (2) oubyen sou *clause* (2).

Sa enn ki komans "*Without prejudice*" dan son katriyenm laliny la osi "*his 5-year term*", e mon fer menm propozisyon lamannman pou ranplas li by "*the President's 5-year term.*"

**MR SPEAKER**

Byen. Mon krwar i menm prensip ki ou'n servi taler.

**HON BERNARD GEORGES**

Mersi. E trwazyenm lamannman e dernyen i dan sa *clause* ki swiv, *Clause 3*. Dan premye laliny dernyen mo "*it*", "*the President-elect*

*irrespective of whether it is the incumbent President*".

I kler ki sa mo "*it*" i en Prezidan i pou bezwen en dimoun. Malgre ki i annan serten largiman ki kekfwa ou kapab vot pou en lisyen me annou pa al ladan la.

"*The President-elect irrespective of whether*"- mon pe propoze ki nou pa pou pa repet "*The President elect*" ki nou zis retir "*it is*".

So i ava lir, "*The President-elect irrespective of whether the incumbent President or not shall take the oath etc.*" Mersi.

**MR SPEAKER**

*Panel yes.* Napa obzeksyon sorti kot Manm. Onorab Pillay ki pou pwen?

**HON SEBASTIEN PILLAY**

Mersi Mr Speaker. I annan 2 term ki'n ganny entrodwir e sa se "*President-elect*" e "*incumbent President*" dan nou Konstitisyon ozordi.

I paret poudir nou pa kapab ganny lesplikasyon legal lo kwa ki sa 2 term pe dir pou nou ozordi.

Akoz si sa *incumbent President* ki konvok Lasanble Nasyonal, *what becomes the duties of the President-elect?* *He was the choice of the people* pou elekte li.

So *which means* ki si Prezidan Ramkalawan pa anvi

konvok en Lasanble ler i perdi eleksyon *he can do so. Because the President-elect would not have the power to do the convocation based on the argument ki nou'n gannyen.*

**MR SPEAKER**

Sa pwen. Sa pwen in fini ganny eksplike.

**HON SEBASTIEN PILLAY**

I pa'n ganny dil avek Mr Speaker.

**MR SPEAKER**

In fini ganny eksplike. Eski annan en lot, Onorab Gill ki ou pwen?

**HON CHURCHILL GILL**

*Sorry. Mersi Mr Chair. Mon kestyon i pou AG lo paz 10 clause 8. Kot i dir, "Subject to this Constitution, the term of a session of the National Assembly shall not exceed fifty-nine months."*

Konmsi mon ti a kontan ganny en lesplikasyon si sa i vedir prezan sesyon Lasanble i pour – i pa pou 5 an, i pou mwens ki en mwan. Non - i a donn leksplikasyon. Akoz toultan in toultan parey ler i pe fer li tousel i ale ziska 5 an *unless* i ganny dizourd. Mersi.

**MR SPEAKER**

*Panel* i a zis eksplike si sa provizyon i annord.

**ATTORNEY GENERAL**  
**FRANK ALLY**

Anfet nou pa'n sanz sa provizyon anba Konstitisyon aktyel. Akoz seksyon Lartik 79 anba Konstitisyon aktyel i dir sa. Akoz dan bann sityasyon kot pou napa en - kot Eleksyon Parlmanter pa pou ganny fer menm dat ki Eleksyon Prezidansyel, *then* se sa ki provizyon ki pou *apply*.

Akoz 79 ozordi i dir, *"a general election shall be held during the period starting at the beginning of the fifty-seventh month and ending at the end of the fifty-ninth month of a session of the National Assembly."*

**HON CHURCHILL GILL**

Zis pou mwan klarifye. Rezon ki mon'n demann sa kestyon akoz nou'n konfirmen la ki manda Prezidansyel i pou 5 an, 60 mwan. Me selman nou'n dir ki sa 2 eleksyon pou fer ansanm.

Donk i annan en de balans la enn ki 59 enn i 60.

**MR SPEAKER**

*Order! Panel* i kapab adrese? Nou a les *panel* adrese silvouple. Yes, AG pou adrese?

**ATTORNEY GENERAL**  
**FRANK ALLY**

Mon krwar mon'n fini adrese. Mon pa konnen si i annan *anything*.

**MR SPEAKER**

Ok. Tre byen isi i kler. Onorab Cosgrow, ki ou kestyon?

**HON WALLACE COSGROW**

Mersi Mr Chair. Mr Chair dan ka kot nou annan nou en *incumbent President* avek en *President-elect* pandan sa peryod en mwan.

E Lasanble Nasyonal pa ganny konvoke pou zwenn, e i ariv sityasyon, lekel ki *keep the President in check* baze lo son bann desizyon ki i pran.

Lekel ki protez Konstitisyon li menm par bann desizyon ki Prezidan i pran? Ki swa anti-konstitisyonnèl, anvi ki napa a sa moman en mwan, en Lasanble Nasyonal pou garan nou Konstitisyon e bann aksyon Prezidan i fer ki al kont sa Konstitisyon? Mersi.

**MR SPEAKER**

Vis-Prezidan, wi? Vis-Prezidan?

**VICE-PRESIDENT AHMED****AFIF**

Mersi bokou Mr Chairman, Mr Chairman mon krwar Onorab i konn byen poudir sa sityasyon i pa nouvo. I pa'n ganny kree atraver sa lamannman in toultan leka.

**MR SPEAKER**

Mersi.

**VICE-PRESIDENT AHMED****AFIF**

Non nou pa pe fer naryen *worse*. In toultan leka.

**MR SPEAKER**

Si i pa'n adrese, ou pa kapab demann li pou aranze. Mersi.

**VICE-PRESIDENT AHMED****AFIF**

Annefe mon a dir Mr Speaker, mon rapel an 2016 kan mwan mon ti antre dan Lasanble Nasyonal i ti an Septanm, be nou ti komans an Oktob me selman zot pa ti ankor-

Ti annan en Prezidan me selman ti napa en Lasanble Nasyonal. Parske nou, nou pa ti ankor-nou - ti'n ganny elekte me selman nou pa ti'n ganny konvoke.

Nou pa ti'n ganny konvoke koman en Lasanble, alor ti menm sityasyon, egzaktaman menm sityasyon. In arive dan plizyer lenstans dan lepase.

**MR SPEAKER**

Mersi. Mon a osi fer remarke ki sa bann kestyon ti devret ganny leve dan deba Nasyonal. Mersi.

*(Interruptions)*

**MR SPEAKER**

*Order!* Mon a pran kestyon.  
*Order!* Mon a pran kestyon  
Onorab Aglae.

**HON EGBERT AGLAE**

Mersi Mr Speaker. Rezon ki mon pe demann sa kestyon, akoz mon ti demande taler dan mon deba.

79 *ok*, letan in dir ki dan lenstans ki Prezidan i dizourd Lasanble. E zot, zot premiz bann largiman ki zot in fer lo deba, sete pou fer tou lede eleksyon fiks, en dat.

Prezidan i deside dizourd Lasanble li, i fer ki prezan sa dat ki fiks i sanze la i pou napa en dat fiks pou eleksyon. Ki mannyer prezan ou pou aranz sa ou pou fer li vin en dat fiks?

Ouswa si ou pou fer en dat fiks ki pou fer ki touzour manda Lasanble dan sa ou pou pli mwens. Ki mannyer ou *align* sa prezan ou?

**MR SPEAKER**

Vis-Prezidan ou kapab adrese?

**VICE-PRESIDENT AHMED**

**AFIF**

Mersi bokou Mr Speaker. Mr Speaker, i paret mwan prezan ki zot in lir lamannman, prezan ki zot lir Konstitisyon.

*(laughter)*

**VICE-PRESIDENT AHMED**

**AFIF**

Staz merit, staz merit zot, zis zot ti pe mazin vole. *Anyway*, mon ava eksplik ou akoz prezan ki zot lir.

I kler poudir si dan sa lenstans kot nou ete, kot Prezidan ek Lasanble ti ganny elekte dan menm lepok. E si tou i al pare tou lede i ganny elekte dan menm lepok 2025 epi pli tar, epi pli tar Prezidan i dizourd Lasanble.

Otomatikman Onorab, otomatikman dat Lasanble Nasyonal son eleksyon e dat Prezidansyel pou sanze zot pa pou reste senkronize apartir sa pwen.

Selman pou Prezidan i reste, parske li i pa'n ganny tire, pou li ou konnen kan i pou sanze? Si li i demisyonnen, si i ganny retire. La i pou si i ganny retire si i demisyonnen si i tonm malad la son dat pou sanze.

Me selman dan premye lenstans kot nou ete nou'n donn sa posibilite pou tou lede senkronize. Mersi bokou Mr Speaker.

**MR SPEAKER**

Mersi. Onorab Andre, eski i annan lot amannman oubyen nou'n fini?

**HON CLIFFORD ANDRE**

Non Mr Chair. Sa ki nou annan sa ki Onorab Georges in fer sa bann *minor*

*amendments. Apard sa tou i ok.*

**MR SPEAKER**

Tre byen. Bon nou a pas dan Staz Lasanble pou nou pran Mosyon lo *Third Reading*.

**HON BERNARD GEORGES**

Mersi Mr Speaker. Mr Speaker - (mwan ki'n ganny laparol Onorab Pillay reste trankil silvouple pou en fwa dan ou lavi) -

**MR SPEAKER**

*Go ahead* silvouple. Pou Mosyon.

**HON BERNARD GEORGES**

Mersi Mr Speaker. Mr Speaker, anba Lartik 76(1) nou *Standing Orders*, - (e an depi lefet ki Onorab Loze pe sey anpes mwan koze) - mon *move* ki *the Constitution (Eleventh Amendment) (No.2) Bill, 2024 as amended*, i ganny aprouve- i ganny aprouve par sa Lasanble i ganny lir en Trwazyenm Fwa. Mersi.

**MR SPEAKER**

Mersi. Manm a vot lo Mosyon *Third Reading*. Manm ki an faver lev lanmen silvouple.

*Sorry*, eskize mon pa ankor demann segonnman. Onorab Arissol?

**HON SANDY ARISSOL**

Mersi Mr Speaker. Parey labitid nou fer segonnman e mwan mon ti a kontan segonn Mosyon prezante par Onorab Georges. Mersi bokou.

**MR SPEAKER**

Manm a vot lo Mosyon pou *Third Reading*. Manm ki an faver lev lanmen? Manm ki kont? Mersi.

Lo Mosyon pou *Third Reading of the Constitution Republic of Seychelles (Eleventh Amendment) (No. 2) Bill, 2024 as amended*, 24 Manm in vot pour, 8 kont e 0 in *abstain*.

Donk, mon deklare ki *Bill* in ganny aprouve par Lasanble annakor...

**(APPLAUSE)**

**MR SPEAKER**

Mersi. Madanm Deputy Clerk a fer *Formal Third Reading*.

**MADAM DEPUTY CLERK**

Mersi Mr Speaker. *This Act may be cited as the Constitution of the Republic of Seychelles (Eleventh Amendment) Act, 2024*. Mersi.

**MR SPEAKER**

Mersi Madanm Deputy. Bon, *Bill* Konstitisyon amannman in aprouve par Lasanble. *Ok*, nou'n ariv a lafen nou travay.

Mon remersye *VP* ek son delegasyon pou zot



partisipasyon pou en long sesyon. Mon remersye bann Manm pou zot kontribisyon e Lasanble pou *adjourn* ziska Mardi prosen 9 er. Mersi, *adjourn*.

**(ADJOURNMENT)**